

臺灣文獻匯刊

■ 陳支平 主編

第二輯

第二冊

◎◎ 九州出版社
◎◎ 廈門大學出版社

臺灣文獻匯刊

第二輯 ◎ 第二冊

閩頌匯編(二) Ⅲ

◎◎九州出版社
◎廈門大學出版社

散賊腹心

題第四本爲請頒

特勅欽賜公侯總兵印信以昭

特典散賊腹心事竊海賊繁多勦殺難盡臣故頒
發重賞破格招徠僞鎮僞兵雖多接踵歸順
而賊首如僞中提督將軍伯劉國軒僞後提
督將軍伯吳淑僞左武衛將軍何佑僞兵部
陳繩武僞侍衛馮錫範僞將軍楊德僞右武
衛將軍林陞僞左虎衛將軍江欽僞水師中
衝鎮陳昌僞二鎮吳潛俱戀妻子懷疑遂巡

未肯歸順查劉國軒原係漳州城守千總吳
淑原係海澄公標副將俱各獻漳州城畏罪
猶豫臣雖屢次會同平南將軍賴 侍郎達

巡撫吳

將軍管提督事楊

往招終

以疑貳尙未獻忱臣思鄭經彼以臺灣爲退
步志必不降此斷不可往招以緩賊黨接順
之心內如何佑陳繩武馮錫範楊德又爲鄭
經結姻舊臣不必招致外今如劉國軒爲海
中首事頗能用兵細察其志似與吳三桂爲
主而以海上爲附者其志不小今三桂已服

誅國軒氣沮目下似有可動之機冒請

皇上赦其前罪授以公爵吳淑原無反志城已垂危其標員串合賊兵事已做成迫協以不得不然之勢臣偵探密報吳淑時望漳城流涕嘆氣止以畏罪不敢前來時下亦有進退兩難之狀冒請

皇上赦其前罪授以侯爵各給兵權任事至水師總兵陳昌林陞江欽吳潛冒

請各授總兵實職任事此數人若一解體投誠鄭經孤掌難鳴海賊不難立盡根株矣案查順

治十三年間奉

上差頒發海澄公印招撫海逆鄭成功彼時成功以海澄一邑之公未經受降續僞總兵黃梧

校獻海澄縣業經前督臣李具

題卽將海澄公印封與黃梧奉

旨俞允外緣係請頒

特勅欽賜公侯總兵印信事理臣謹具疏密

題伏乞

勅部議覆施行

以昭酬功

題第五本爲請

勅海澄公速行遵

旨赴京以昭酬功至仁事案准兵部咨開爲敬陳
管見事該議政王等會覆奉命大將軍康親
王等題前事等因康熙十七年七月二十日
題八月初一日奉

旨議政王貝勒大臣會議具奏欽此該臣等會議
得奉命大將軍康親王等疏稱將軍喇

賴總督姚等啓稱海澄公黃芳泰年

治十三年間奉

上差頒發海澄公印招撫海逆鄭成功彼時成功
以海澄一邑之公未經受降續僞總兵黃梧
投獻海澄縣業經前督臣李具

題卽將海澄公印封與黃梧奉

旨俞允外緣係請頒

特勅欽賜公侯總兵印信事理臣謹具疏密

題伏乞

勅部議覆施行

以昭酬功

題第五本爲請

勅海澄公速行遵

旨赴京以昭酬功至仁事案准兵部咨開爲敬陳

管見事該議政王等會覆奉命大將軍康親

王等題前事等因康熙十七年七月二十日

題八月初一日奉

旨議政王貝勒大臣會議具奏欽此該臣等會議

得奉命大將軍康親王等疏稱將軍喇

賴總督姚等啓稱海澄公黃芳泰年

城竭盡忠義全家殉難

皇上特賜黃芳世承襲公爵管轄兵丁黃芳世病故之後又將公爵令黃芳泰襲替今疏內稱海澄公黃芳泰年幼軟弱伊標兵八千名實不能管轄等語海澄公黃芳泰乃矢盡忠義功臣子嗣既年幼不能管轄兵丁仍留管轄邊界之兵恐其不能管轄標兵致生釁端不止其身致罪且于地方無益相應將海澄公黃芳泰調取來京安置得所昭示

朝廷酬功至仁應請

勅下大將軍康親王等及該督撫等將海澄公黃
芳泰併黃芳世之子家人及伊等家口盡行
起送來京如族人有情願來者亦將家眷一
併起送水陸俱給驛站應付到京之日作何
安置之處聽該部議奏海澄公標下官兵應
交與該督撫提等遴選堪用者歸入各標營
伍其不堪用者令其安插得所可也等因康
熙十七年八月初二日題本日奉

旨依議速行欽此移咨到臣又准兵部咨開爲冒
昧再辭等事該議政王等會覆海澄公黃芳

泰題前事等因康熙十七年九月初六日題
十一月初四日奉

上旨議政王貝勒大臣會同確議具奏欽此該臣等
會議得查先經海澄公黃芳泰具題請辭奉
上旨黃芳泰承襲公爵已有成命着卽祇遵不必控
辭該部知道欽遵在案其海澄公黃芳泰公
爵請將兄之子黃溥承襲之處應毋庸議再
查黃芳泰有世襲拜他喇布勒哈番黃芳泰
現既襲一等海澄公其伊拜他喇布勒哈番
應准兄之子黃溥承襲至疏稱忠勇王黃芳

度等骨骸俱未埋葬臣與臣兄黃芳世之子
家口暫住汀州內地俾得就近卜擇并葬不
至暴露等語查黃芳泰等俱係功臣應令地
方官以禮款待暫駐汀州埋葬骨骸可也等
因康熙十七年十一月初八日題本月十四
日奉

旨依議欽此移咨到臣但查奉

旨黃芳泰及黃芳世子黃溥家人家口起送來京
之部文于康熙十七年八月二十六日到漳

又查奉

旨黃芳泰暫駐汀州埋塋骨骸之部文于康熙十七年十二月初三日到漳今已七閱月矣未見公臣舉動管塋之事且公標舊兵陷入海澄者以公在汀州均竟奔赴汀州且賊首劉國軒又係汀州人今在漳在汀均多冒克公府之人是奸是歹有司文武不敢過問在公臣黃芳泰感激

皇上殊恩厚待功臣之意自是忠盡自矢但公實係老實至誠之人難察良頑其標下之人甚多混雜兼以陷兵投誠往來雜踏又以汀州

地棍舊時敗兵群起投克公府汀漳接壤
海重地未便久留况僞將軍吳淑吳潛等在
賊統領重兵海澄公一日在汀不去吳淑等
一日不敢來漳投順今公臣已奉

旨將黃芳泰調取來京安置得所并黃芳世之子
家人及伊等家口盡行起送來京是公原應
遵

旨赴京者也伏祈

皇上勅部議覆應將黃芳泰及侄黃溥家人家口
盡行赴京至營葬之時公臣躬自告假回漳

皇上自有優恤功臣

隆恩

特典似不必家眷標員授克陷兵盡任汀州方可
營葬者也營葬事小封疆事大海澄公在汀
在京之事小吳淑校誠不校誠之事大事有
關係臣不得不具疏

上聞緣係催公遵

旨赴京事理臣謹具疏密

顯伏乞

皇上睿鑒施行

設兵省餉

題第六本爲

請調援兵回浙另設經制額兵以省二十四萬之
錢糧以得官兵之實用事竊因海賊狂逞前
後共調浙江官兵七千五百名來閩援剿今
俱屬浙江提臣石 統領矣但此項兵丁
來閩日久有思家逃歸者有遠接粵東者有
因水土不服病故者種種不一頗難得兵之
用且此七千五百之兵在此每年支行糧餉
銀八萬二千兩行糧米二萬七千石在浙又

支坐糧餉銀十一萬二千五百兩坐糧米二萬七千石又因調此七千五百名之兵來閩

經浙江督臣李 題

請招兵五千名照例給發餉米分隸各標每年又支坐糧銀七萬五千兩米一萬八千石是因來閩之七千五百兵每年實費

朝廷銀米共計銀四十一萬二千五百兩臣愚以爲莫若卽在閩省招兵七千五百名以補浙兵七千五百名分守之地將浙兵發回浙江新內有額在閩省克兵者聽從其便卽浙江新

招五千名此援勦之七千五百名一回則新
招五千之兵應散歸農如有不願歸農願來
閩省食糧者亦聽從其便如此則止出養兵
七千五百名之餉銀其七千五百名兵之行
糧銀米共計銀一十三萬五千兩與浙江新
招五千兵之餉米共計銀一十一萬一千兩
二項共銀二十四萬六千兩俱可節省矣在
浙兵得免久戍之苦在閩省得收臂指之用
在浙省新招之兵亦免盡散歸農之擾又省
朝廷錢糧二十四萬六千兩之多是一舉而數善

備焉但此新招七千五百名之兵止須設援
勦總兵一員遊擊守備各三員及千總各官
每年不過費俸乾銀三千二百七十餘兩餘
兵四千五百名附入臣通省各標兼轄復可
省設官糜餉之費矣臣謹具疏密

題伏乞

勅部議覆施行

諭調紅毛

題第七本爲

請差耑員捧賚

勅諭調取紅毛夾板以尊

國體蚤奏蕩平事切查向年攻取廈門實藉紅
毛之力居多今荷蘭國王遠差奉貢願出來
板助勦廈門是該國嚮風慕義之忱可嘉尚
矣小國既有尊奉

天朝之心

天朝亦應有優禮外邦之典况調其大船來攻海

逆豈可徒發一紙

勅諭寄帶於爨官之手不特輕褻其事并非優待
外國之意而且于尊隆

國體之道尚未盡也且今調取烏船並江浙之
船尚如此艱難今調取夾板臣不得不仰請
皇上鄭重其事卽于閩省原任道府擇其能言達
禮者一員爲正廳縣一員爲副贊捧

勅諭頒給賞賚使外邦仰慕堂堂

大國規模非同隘小而該藩感激

皇上遣使重事隆恩自必踴躍發船樂助滅賊之

恐後矣臣謹密疏具

題伏乞

皇上睿鑒

勅部議覆施行

閩頌滙編

康熙十八年六月

日

請撥協餉

題第八本爲

請撥協餉置辦軍器火藥給散校誠俸餉以資進
勦免動兵餉事切照海寇鴟張征調繁興器
械砲位藥彈實軍中第一喫緊空拳奚能制
勝配造難以後時臣等哀集衆議今秋水陸
舟師並進犁庭掃穴務奏蕩平以紓

皇上南顧但必藉兵力精強器械齊備方能戰必
勝攻必克也撫臣早見及此臚列款項鉅費
餉計非五六十萬不能措理題

請開捐納事例方應目前急需竝候部覆未見
奉行臣查近奉增兵一萬零八百名又海澄
失陷緣旗官兵一萬零三百三十六名又督
撫提三標添兵八千九百名當時未經估計
製造第兵一名應給盔甲一頂副腰刀一口
再兼隨技操執配造長鎗鳥鎗弓箭等項并
水師船隻應給砲位器械藥彈等項辰下急
需若不多方措處辦造臨時將何策應且校
誠官兵俸餉一時缺給恐無以風動海上之
人目今鼓舞嚮化更當加意厚待臣再四思

維憂心如焚臣豈不知軍餉浩繁

國用匱乏安敢請撥餉銀第事有緩急時有經權欲求一勞永逸之計合請我

皇上俯念閩疆大師雲集征勦大事勿惜小費伏乞

勅部先撥協餉銀四十萬兩勒限製造軍器火藥等項并給散投誠官兵俸餉方解目前急需若待各官捐助與亟開事例之銀濟用此乃遠水近火臨渴掘井皆緩不及事之計昨撫臣具疏欲體照江南造船事例先動正供錢

糧俟開廣納事例銀兩照數補還但正供錢糧已經撥給兵餉毫無餘剩若將此銀那動一兩官兵卽少月餉一兩此時官兵奚堪數月兵餉不給此萬萬難動者也伏祈

皇上速撥外省餉銀四十萬兩到臣軍前星夜製備以資大舉如有捐納銀兩若干應留作康熙十九年兵餉不過前後那移兵餉軍器兩無有悞矣事干請動餉銀臣謹具疏密

題伏乞

勅部迅賜議覆施行

統轄漳潮

題第九本爲漳潮地接海聯賊兵哀延莫制仰
祈

勅議統屬以專責成以收速効事切今海賊糧少
臣等沿海布置無隙可乘但漳潮海面相聯
銅山甲子至南澳卽係廣東海汛賊兵接續
相通哀延千里中分閩粵此疆彼界統馭乏
員片帆往來米糧滿載號召山民下海克賊
今聞潮州文武亦在嚴行禁絕然無如在廣
東大兵西出督臣遠駐肇梧鞭長莫及在潮

不便問漳之官兵勇懦海禁寬嚴在漳亦不
便問潮之官兵強弱海禁清疎此絕彼行終
無實濟畫疆分界賊易藏逃豈可以同一海
面之漳潮而竟分爲兩省之各屬格格不通
政令不一此賊之所以逍遙往來而肆無顧
忌也查平南將軍賴 久鎮潮州兵民懾服
請

勅部議兼理漳潮庶兵民咸知遵守而兩府不致
睽隔練兵勦賊嚴界絕糧賊無旁遁政有畫
一矣臣謹具疏密

題伏乞

皇上睿鑒勅部議覆施行

閩頌
淮編

授誠文官內考其文義粗通者林上苑等九
員授誠武官內考其技射頗強者李秉漢等
三十八員伏祈

皇上下沛

特恩將此考選數十員授誠之官先行選用寄憑
到閩賊渠既頒

勅印隆以高爵大位之恩微員復卽急選各有職
業功名之望賊自聞風恐後斷不眷戀海島
將見空巢來歸不惜用數十人之名器以招
多賊實過得勝兵數萬人矣除各官名冊咨

部外臣謹密疏具

題伏乞

皇上睿鑒

勅部破格議覆施行

康熙十八年六月

日

請發砲位

題第十二本爲

請發西洋砲位以資攻擊事切今海寇與我師對壘連營數十里晝夜用砲攻擊日用火藥甚多然數十砲之內而僅中一二砲者臣卽朝夕操演砲手亦不能多中甚是憂懼且留漳之紅衣發煩皆舊壞不堪自去年十月起至今止共擡出大砲施放傷損六十三位時下竟無砲攻打臣無奈只得就於漳府城外建爐鑄造甚是艱難考藍大等官見臣如此拮

摺稱

朝廷有新鑄西洋砲甚是輕便止用八人十人卽可擡行臣思海賊營盤有與臣營隔四五里者有隔一二里者有止隔半里聲叫聲應者若得此砲攻打砲準定賊之敗亡必矣若砲身沉重勞夫動衆臣亦不敢

上請以苦沿途民夫今聞用夫八名或十名卽能擡行一位砲準體輕不勞多夫而能擊賊臣方敢冒昧

上請伏乞

皇上恩賞西泮砲十位俾臣得以効力疆場蚤得
遂平海之志矣臣謹具疏密

題伏乞

勅部議覆施行

康熙十八年六月

日

設立海澄

題第十三本爲設立海澄縣治招集難民永圖
鞏固事切思當日建立海澄縣治之意大約
因其險要易爲固守耳不料數十年以來海
賊猖獗竟以海澄爲必爭之地得失之間關
係甚鉅臣愚以爲賊欲犯我內地必須侵奪
海澄如我師進兵自必先廈門而後海澄卽
爲固守計亦必舟師重兵環守廈門而後海
澄可不必再用重兵也況今賊踞海澄凡屬
海澄縣所屬百姓皆以縣治爲宗主戀戀海

澄不肯外出投順臣雖密遣往招仍皆安土
重遷但愚民難以慮始而可以圖終不若因
勢而利導之請卽於海澄所屬之尖山建一
海澄縣治不過土垣石梁挖濠深溝設立四
門內蓋瓦房三間以爲縣堂大門三間上墜
一扁大書海澄縣三字草草結構名雖城而
實寨也所費不過百餘金臣自捐造不累小
民在目前使小民知

本朝已另有海澄縣咸思歸宗投誠不戀賊地易
於招集至平海之後再行

題請或以新縣作治大其規模不必留一必爭
之地致貽後患或應仍歸舊縣彼時應請
睿裁定奪者也臣謹具疏密

題伏乞

勅部議覆施行

康熙十八年六月

日

飛調鳥船

題爲特

請飛調江南新造赴楚鳥船至閩早奏蕩平事康熙十八年七月十六日准兵部咨開該議政王等會覆江督阿 題前事江南改修鳥船需費錢糧甚多且自江南越海取至福建其事所關亦爲要緊相應

勅下該總督將軍巡撫等進取金門廈門等處破滅海賊之時將以前靖南王歸正時新造海船三百隻巡撫具 所造船五十隻應用

未爲不敷或此等船隻卽可應用不取江浙
船隻或福建所有船隻萬難克用江浙之船
取到福建並無可虞撥發官兵必能取去或
江浙船隻難以取至福建宜於福建省造船
破賊之處文到作速定議急行具題其江南
鳥船暫行修理俟福建總督等題到之日再
議具題可也奉

旨依議速行欽此移咨到臣准此該臣等議得前
因海賊狂逞非厚集舟師不能滅賊臣等心
急平海故臣等於去年十二月初八日有備

陳勦賊情形等事一疏請在本省於現在二百五十隻船外撫臣再造五十隻又請調紅毛船二十隻并江浙船二百號也後覓調紅毛之

勅諭未去奉

旨查卽不用紅毛國船可以破賊必候紅毛船臣等啓覆江浙船隻挑選官兵至閩卽無紅毛船臣等亦可誓師鼓勵破賊後以江浙之船又未能來故復請調烏船並請新提臣萬統帶至閩此數番展轉委曲之緣由也

今提臣萬 已經疏請烏船俱要改修先
帶官兵赴閩在案江南督臣阿 復疏請
閩省撥兵遠駕賊踪波濤可慮不如閩省製
造奉

旨會臣等議閩省船隻或可應用不取江浙之船
或萬難克用撥兵往取江浙之船必能取去
或江浙船難以取至宜於福建造船仰見
皇上憂心焦思將種種窒碍難行之處層層設想
真可謂無思不到矣臣等報

國心堅滅賊心切凡有一隙之明無不激切敷

陳焉肯知有不言言有不盡除添造船隻一面行司發價預備物料候公議定日應否舉行外至撥兵往取江浙之船能來與不能來并閩省船隻足用與不足用臣等俱係陸路之人不能遙度妄覆臣有檢舉微臣明知故忍上負

國恩特舉賢能等事一疏保舉原任水師提督施如蒙

皇上俞允祈卽

命施如蒙馳驛星赴江南面驗鳥船江浙之船吳否

堪令閩省官兵統帶至閩并兼程赴閩酌議
現在船隻是否足用彼以曾破廈門之官輕
車熟路一言可決實勝臣等揣摹憶度之詞
萬萬矣如以水師提督已補萬 查調任
水師提督王 以定海將軍管提督事卽
施 曾蒙

國恩授靖海將軍或

命施 以將軍總統水師事務則將軍提督可並
收得人之效矣至廣東應否添立水師萬
色可否移調廣東仰祈

皇上睿裁臣等奉

旨會議事關水務必得熟識諳練之人方能條對
精詳因前有保舉施 之疏就近請乞

聖裁或可面詢施 則海上情形

皇上灼見於萬里之外矣自去年立議至今已
經十月茫無頭緒八月將至若再仍前因循則
滅賊無期臣等不得不激切冒昧亟以施
爲請也臣請會同巡撫臣吳 將軍管提

督事臣楊 合疏密

題伏祈

閩頌滙編

皇上鑒宥勅議施行

康熙十八年七月

日

撥餉給俸

題爲第八本爲

請撥協餉置辦軍器火藥給散校誠俸餉以資進
勦免動兵餉事康熙十八年九月十六日准
戶部咨開福建清吏司案呈奉

御前發下紅本該議政大臣等會覆福督姚

題前事等因康熙十八年七月初一日題奉
旨已有旨了欽此欽遵于本月二十二日密封到

部該臣等會議得福督姚

疏稱海寇鴟

張征調繁興器械砲位藥彈盔甲腰刀弁校

誠官兵俸餉實係急需速撥外省餉銀四十萬兩勒限製造支給方解目前急需俟開捐納事例如有捐納銀兩照數補還應留作十九年兵餉等因前來查核誠官員職名兵丁數目未經送到不便懸撥錢糧應令該督將核誠官員職名兵丁數目及所需錢糧數目查題到日令該部議其器械盔甲等項查舊有者應用若不敷查明數目具題到日亦該部議至捐納之處先經福撫具題戶部議准具題奉

旨福建通水路不必捐納欽遵在案應毋庸議者
也康熙十八年七月二十八日題八月初一
日奉

旨依議欽此欽遵密封到部密咨到臣准此案照
先爲第二本爲先發授誠官俸兵餉等事准
兵部咨開該議政王等會覆福建總督姚

題前事等因康熙十七年六月二十二日
題七月十六日奉

旨已有旨了欽此該臣等會議得福督姚 疏

稱閩省授誠官兵議捐給銀四錢稍安衆心

不料捐者寥寥而後誠復叛入海時下海澄等縣相繼淪陷賊每暗結後誠官兵內應臣傳集各官悉照額俸全給每兵一名先給銀八錢各官亦量委閒員各司職業臣目擊封疆危急止得先行措給事關動支錢糧謹具疏密題等因查總督姚 因福建海澄等處淪陷欲安後誠反側之心既已支給俸餉應如所題支給將官兵數目及用過銀數攷造清單具題該部核銷可也等因康熙十

七年七月二十二日題六十三

旨依議速行欽此到部密咨到臣准此又爲先發
校誠官俸兵餉等事准戶部咨開福建清吏
司案呈奉本部送准兵部密咨內開議政王
等會覆福督姚 疏稱閩省校誠各官悉
照額俸全給每兵一名先給銀八錢應如該
督所題支給仍將官兵數目及用過銀數造
冊具題核銷等因前來相應移咨福建督撫
將給過校誠官兵銀兩造冊報部查核可也
等因呈堂奉批行送司奉此移咨到臣准此
除將器械盔甲等項逐一清查數目備造清

冊另疏

題報聽候部議外該臣看得閩省恢復從前投誠官兵每名每日止給米八合三勺月捐給鹽菜銀四錢實不克用及海澄等縣相繼淪陷投誠官兵心不可問臣接任時目擊漳城危急投誠又在親離呼吸之間只得先行措給傳集各官照俸全給每兵一名給銀八錢業經臣具

題部覆支給俸餉應如所請將官兵數目及用過銀數續造清單具題該部核銷等因遵

行間今奉部覆令臣將拔誠官員職名兵丁數目及所需錢糧數目查題到日令該部議等因遵查得康熙十七年六月起前督臣郎任內流下拔誠官二百零一員兵二千一百七十八名又臣自康熙十七年六月初二日起至十一月十四日止共招撫過僞官兵一萬二千八百七十六員名除歸農外現在効用食俸官五百九十四員食糧兵三千九百八十六名又自康熙十七年十一月十五日起至康熙十八年四月十五日共招撫

過僞官兵一萬二千二百七十七員名除歸
農外現在食俸官八百七十員食糧兵四千
六百八十五名又招到大夥後誠業經

題報廖璵黃靖賴祖金福廖興五鎮食俸官三
百零二員食糧兵三千二百七十九名又另

疏

題報鄭奇烈食俸官五十三員食糧兵四百零
四名又另疏

題報陳士豈食俸官五十五員食糧兵五百九
十一名以上官共二千零九十員共該俸銀

八萬三千五百六十五兩共米七千八百九十八石四斗每米一石約計價銀二兩零共銀一萬五千七百九十六兩零俸米二項共銀九萬九千三百六十一兩零兵共一萬五千一百二十三名共支餉銀一十五萬四千八百七十一兩二錢共米五萬八千零七十六石七斗每石約價銀二兩零共銀一十一萬六千一百五十三兩零餉米二項共銀二十七萬一千兩零以上官兵俸餉糧米通共銀三十七萬零三百兩零目今正在會師大

舉急宜廣行招撫散賊黨羽若將已經投誠官兵掛欠俸餉不行找給其何以風動海上之人向化來歸哉臣再四思維計無所出惟有額請

皇上垂念大兵將出賊心動搖亟宜勦撫並用使彼黨散勢孤則滅亡可待伏祈

勅部先於隣省協餉銀內迅賜撥出銀三十七萬零三百兩零星速到漳發臣軍前俾臣得以敬款黨而鼓軍心庶幾奏蕩平四月十五日以後現在籌餉之費該官兵異名容臣另疏

題報先將各官兵員名備造清冊咨部外事干
請動錢糧臣謹會同巡撫臣吳 合疏密

題伏乞

睿鑒勅部議覆施行

康熙十八年十月

日

撥餉置辦軍器

題爲第八本爲

請撥協餉置辦軍器火藥給散校誠俸餉以資選
勦免動兵餉事康熙十八年九月十六日准
戶部咨開福建清吏司案呈奉

御前發下紅本該議政大臣等會覆福督姚

題前事等因康熙十八年七月初一日題奉
旨已有旨了欽此欽遵于本月二十二日密封到

部該臣等會議得福督姚

疏稱海寇鴟

張征調繁興器械砲位藥彈盔甲腰刀弁校

誠官兵俸餉實係急需速撥外省餉銀四十萬兩勒限製造支給方解目前急需俟開捐納事例如有捐納銀兩照數補還應留作十九年兵餉等因前來查按誠官員職名兵丁數目未經送到不便懸撥錢糧應令該督將按誠官員職名兵丁數目及所需錢糧數目到日令該部議其器械盔甲等項查舊有者應用若不敷查明數目具題到日亦該部議至捐納之處先經福撫具具題戶部議准具題奉

旨福建通水路不必捐納欽遵在案應毋庸議者
也康熙十八年七月二十八日題八月初一
奉

旨依議欽此欽遵密封到部密咨到臣准此遵行
間又爲急請製造制賊火器以揀必勝等事
本年九月二十三日准戶部咨福建清吏司
案呈奉

御前發下紅本該本部等衙門會覆福督姚

題前事康熙十八年七月二十九日題奉

旨戶兵工三部會同議奏欽此欽遵於八月二十

一日密封到部該臣等會議得福督姚

會同巡撫吳 疏稱閩地山多海阻旣無

平原曠野馬騎可以衝突而又菁嶂叢林濠
塹溝河並非短兵所可接戰惟火器鎗砲尚
能及遠今賊與我師對敵用鹿鏡在前排鎗
在後我兵與賊對壘俱用排鎗我兵排鎗不
能到賊而賊之鹿鏡早到我兵之身所以中
傷甚多破賊之法惟蕩寇鏡較鹿鏡更遠今
各營除弓箭馬兵外每兵一百名選二十名
打蕩寇鏡十門選十名打線鏡十門選五十

名打排鎗五十門二十名分配弓箭藤牌牌
刀大刀各營均照此數配用又賊用大龍煩
攻打萬松關我兵被傷甚多制賊取勝必製
造大砲及達到之器但鳥鎗排鎗鹿鏡線鏡
蕩寇鏡威遠紅衣用鐵用炭用工實有多寡
不同不得不先行題明併請動錢糧等因具
題前來查本年七月內該督題請西洋砲位
議政王等會議既發湖廣見存西洋砲二十
位將製造紅衣砲之處無容議其製造各項
鎗鏡威遠砲應照該督所題准其製造其製

造所需銀兩于協餉銀內動支節省製造仍
將造過數目用過價值題報工部核銷可也
康熙十八年九月初二日題本月初四日奉
旨依議欽此欽遵密封到部密咨到臣准此除將
核誠官員職名兵丁數目及所需錢糧數目
備造清冊另疏

題報聽候部議外該臣看得砲火器械乃軍中
第一要務自入閩所得勦賊器械業經前督
臣卽通行備查分發各營記用卽解到
省者亦經在臣就近分發各營外尚缺各標

鎮營所報缺少盔甲弓箭鎗刀砲藥等項約計工料銀二十一萬兩亦經前督臣具

題先撥銀十萬兩以資製造在案續因抽調各營官兵共一萬零三百三十六名前往堵剿海澄失守所有器械盡行失陷近又奉增兵一萬零八百名又督撫提三標新設額兵除撫標甲械業經在省領給外惟督提兩標在漳額兵七千四百名又在漳水兵二千名以上通共三萬零五百三十六名俱係新募之兵未經估給器械查每兵一百名應給鐵盔

一百頂鐵甲五十副綿甲五十副除配執大刀藤牌不給腰刀外其餘兵丁各執腰刀一口并所用軍火甲械砲位等項既已分別馬步戰守名目必須分派各兵所執弓箭銃砲排鎗排刀大刀藤牌等項庶無參差然漳州現在對壘缺少砲械時刻難緩臣復以急請製造制賊火器等事激切籲請奉

旨戶兵工三部會同議奏欽此是我

皇上明見閩省征勦急需無容稍緩茲部覆准其製造于協餉銀內動支第未奉撥發何項銀

兩且大舉在即不得不于協餉內那動製造軍器給兵操練然一挪協餉製造器械滿漢官兵卽缺月糧支給臣又不敢糜費謹於

請撥協餉製辦軍器火藥等事一案又於急請製造制賊火器等事一案將兩案內所需火砲器械等項通共約計需銀三十三萬二千餘兩軍器項款多端難以瑣屑入疏今已逐一臚列備造清冊送部核覆但現在會師滅賊製械兵糧俱難缺少查前撫臣所題備辦海諸費浩繁等事一案俟撫臣另疏

題覆惟是臣在漳州與賊對壘刻期進兵萬難
遲緩仰祈

皇上勅部迅將鄰省在庫銀兩撥發三十三萬二
千餘兩星速解臣軍前以便完工給兵殺賊
并還大兵協餉庶得鼓勵士氣蚤奏蕩平况
排鎗弓箭各項軍器臣自凜遵頒定部價事
平

奏銷不致糜費者也除將清冊咨部查核外事
干動支錢糧臣謹會同巡撫臣具

合疏

客

題休乞

層鑒勅部迅賜議覆施行

閩頌滙編

康熙十八年十月

日

潮州船隻

平南將軍都統賴 總督福建部院臣姚

會

題爲潮州船隻事奉奉命大將軍和碩康親王
諭內開據臣等啓稱欲破此海逆不可全仗
一路水師官兵現在潮船隻水師再選福建
廣東綠旗官兵酌量配搭船隻少有不足臣
與總督量捐添造數隻二十日內必能完工
此船盡行配搭官兵進攻廈門提督萬
率領福州船隻水師出閩安鎮進攻廈門在

漳州等處官兵亦夾勦賊聞潮州船兵前進
必然遣發賊船往彼堵禦乘此勢分之際將
陸地盡行恢復亦不可諒提督萬
進攻
廈門亦屬輕易如此舉行上不費

朝廷錢糧又不碍于福建船隻出洋兩屬有益但
調此項船兵係別省船隻水師乞請親王鑒
裁速行具題請

旨可也等因到本親王照得該將軍啓稱不可全
仗水師一路官兵等語甚屬有理是以先經
本親王將該船兵未熟練器械未齊備斷不

可輕易進勦等因兩議具

題部覆提督萬

至閩省之日將舊有船隻

作何配搭官兵進勦金門廈門等處逆賊于
該督將軍巡撫等公同詳議速行具

題大將軍康親王等兩議之處無容議等因將
我們置之不議也況且該督姚等先添

造船隻招募水手俱于六月內齊備八月進
勦逆賊今至十月所造船隻未曾齊備招募
水手未曾足數原有二百五十隻船修造部
遣官員前來督修于破賊調紅毛船隻遣官

前去不知該督等于何年何月進勦逆賊之處據何憑據請

旨又該將軍啓稱添造船隻不費多日二十日內必能完工福建船隻出洋之日斷不違誤等語該督約于六月內完竣船隻至本年十月尚未告竣八月內進勦等因至今未有形影該督親身所在事體尙且如此何況別省親身未到必能保舉完工斷不違誤之理況且破滅海逆之處着該督等公同詳議速行具題此事該督等所見明白該督徑行具

題調別省船隻關係請

旨本親王不知洞悉不便輕舉朦混具

題爲此特諭到臣等敬此該臣等看得欲滅海
賊非厚集舟師不可故臣前疏內有議分撫
臣前赴福州興化務造足戰船三百號并請
皇上調集江浙大船二百號并紅毛夾板二十號
後因江浙之船未果臣復有請飛調烏船之
疏奉

旨應候水師提臣萬 赴閩於新舊船配兵進

取廈門金門與該總督將軍巡撫等公同確

商速

題其鳥船江南督撫改存餉閩船不足用聽督
提等以徃福建等因欽遵在案臣隨移咨水
師提臣萬 閩省船兵果否足用應否調
取江浙之船去後隨准提臣回咨本提督思
閩省大小船三百隻應配官兵三萬一千九
百五十名今現在止兵一萬九千一百二十
一名尚少水兵一萬二千八百有奇是所缺
者兵也若以船爲不足用而議造議調其缺
兵配船不更多乎勢必耽延歲月貽誤師期

孰若姑就現在之船迅調陸營精兵配坐相
機進剿之爲便當卽臣撥興化鎮兵二千名
晉江營兵一千名同安城守右營兵一千名
漳州水師二千名又調撫臣前

題聯絡船兵三千名又提臣萬

題請江南砲手二千名臣又同昭武將軍提臣

楊 共抽撥陸兵三千名共酌撥兵一萬四

千名齊赴水師提臣萬 配船以備逃亡

死故及老弱不堪方足應用去後等復思

今水師提臣萬 志切游賊報

國苦心練兵修船刻期大舉但江浙大船并鳥
船及紅毛船均未至閩今止一路進兵再得
別船相幫方爲萬全若再遠省請調又恐遲
悞大舉因思潮州尚有鳥船船艚但不知尚
有若干堪用果否堪成一旅隨密遣隨征知
縣陳 等前往密查據稱潮州止有修好
鳥船四隻尚有七隻方纔修理碇石衛苗總
兵有大鳥船二十八隻有二十一隻堪用有
現成船艚船一百零六隻前來回報尚恐未
確又復咨差江東總副將管六奇前往密察

相同但舳舻尙少臣等先捐銀四千兩差隨
征知縣陳 等資往潮州督令在潮文武
火速修造不足之價卽行找補去後但此項
兵船一出卽可先勦潮州達濠久年未平之
賊又可爲水師提臣在省出兵并漳州大兵
聲援賊旣欲留兵固守海澄灣腰樹等處又
欲分兵堵禦省城所出水師兵船又欲分兵
堵禦潮州所出水師兵船左支右吾應接不
暇臣等三路水陸官兵訂期乘虛直搗賊巢
嚴立賞罰條格鼓勵大小官兵滅賊平海在

此一舉伏祈

皇上飛檄廣東提臣侯

將在潮之烏船十一

隻星夜兼工修完配兵弁新造船艚船一百
零六隻亦蚤配兵弁調碣石總兵苗之秀烏
船二十一隻星夜至潮合縣所有不足船艚
七十餘隻并七十餘隻官兵臣等竭力捐造
募足不敢復費帑金并祈

皇上勅下潮州文武迅將臣等捐船呈報催完所
有統領此項船隻之江東副將詹六奇懇祈
皇上先給總兵銜劉遠經副將蔡茂垣等先給副

將銜劄以示鼓勵此外應設將備另容

題請臣等謹疏密

題伏乞

勅部迅賜議覆施行

閩頌滙編

康熙十八年十月

日

募兵配船

題爲特

請飛調江南新造赴楚鳥船至閩早奏蕩平事案
准兵部咨內開查福建水師提督萬 旣
稱江南解到鳥船止可行于江湖難以航于
海洋改修堅備方可出海准臣先帶官兵由
江西赴閩速配閩省見在船隻相機撲勦等
語相應如其所題聽提督萬 親帶官兵
作速赴閩到閩之日于閩省福州等處舊有
及新造船隻作何配兵進取金門廈門破賊

海賊之處與該總督將軍巡撫等公同確商
作速具

題等因奉有

依議速行之

旨欽此移咨前來隨咨移水師提督萬 遵照

部議提督至閩省之日將舊有船隻新造船
隻作何配搭官兵此等船隻即可應用不取
江浙船隻進勦金門廈門等處逆賊于該督
將軍巡撫等公同詳議速行具

題云後續准水師提督萬 咨稱福建新造

及舊有其大小鳥船一百三隻約計配兵二萬四千四百四十名大小趕繒船一百六隻約計配兵八千七百八十名雙帆哨船九十一隻約計配兵二千七百三十名通共約計該兵三萬五千九百五十名除議裁減兵四千名外今福建新募水兵僅得一萬五千一百二十一名內督臣姚調在漳州同安配坐八漿船用兵二千名外實在兵一萬三千一百二十一名又閩安協額制兵三千名併臣所帶岳州水師鎮標兵丁三千名共編

兵二萬九千一百二十一名較之配船尙少
兵一萬二千八百二十九名是所缺者兵也
若以船爲不足用而議造議調其缺兵酌船
不更多乎勢必耽延歲月貽誤師期孰若姑
就現在之船迅調陸營精兵配坐相機進剿
之爲便也等因到臣臣恐有誤出海之期當
卽撥興化鎮兵二千名晉江營兵一千名同
安城守兵一千名漳州經制水師兵二千名
又謹奏臣等

題臨終船兵三千名又提臣已題

請江南砲手二千名臣復同將軍提臣楊 抽撥
福州興化泉州漳州延平建寧汀州各城守
兵并連江羅源長樂福清雲霄詔安漳浦各
營兵共三千名通共酌撥兵一萬四千名業
經分檄星催着令能幹弁員統領尅期抵省
似可足資調度以副師期外臣復查南臺船
隻現有

上差部員監修不日完竣則進勦金門廈門等處
水師提臣熟籌調遣務期發宜前項船兵出
洋果否堪以破賊作何配搭進勦克取金門

題伏乞

睿鑒勅部議覆施行

康熙十八年十月

日

題伏乞

睿鑒勅部議覆施行

康熙十八年十月

日

閩頌滙編

[illegible]

請裁客兵

題爲大舉期不可悞水陸在在添兵再

請裁無益多費之客兵以膳有益少費之主兵事

切照海賊掘水通濠引溝築寨實非馬兵可

以衝突又因遷邊設界缺少綠旗官兵沿邊

防守本年正月初一日敬奉親王密諭臣與

平南將軍賴 叅贊都統禪 巡撫吳

將軍管提督事楊 會商啓王具

題不如裁減大兵四千名添設綠旗官兵二萬

一千一百五十名一可以省錢糧二可以資

戰守又恐一經具

題倘奉

俞旨裁減大兵之後然後招兵誠恐一時不能招足邊汛空虛所關不小故今臣當卽分遣能員張培麟閻國柱金光英等二十五員齎銀或一千二千兩或三四千兩不等四出各省招兵陸續續報到二三百名或四五百名不等臣當卽逐名點驗給賞外卽發漳州府支給銀米并前自募兵三千二百名共到兵一萬三千六百九十五名當同提臣於二月

三月內亦卽隨到隨發分撥各邊要口防勦
矣後因康親王未蒙具

題則此兵錢糧無從開銷故臣于五月初二日
有賊盛兵單等事一疏懇將前

題自膳兵丁三千二百名請撥給餉臣可以竭
力復膳後到之兵數千名又於七月初一日
具有第二本爲

請減大兵稍增綠旗以省百萬錢糧等事一疏同
日又具有第六本爲

請調援兵回浙另設經制額兵以省二十四萬錢

糧等事一疏俱蒙部覆不允臣當卽遵移昭
武將軍管提督事臣楊 巡撫臣吳 令
其酌撥別兵換防以憑補伍分散去後當經
提撫二臣以此兵藹不可撤復有賊盛兵單
國用匱乏等事一疏具

題留兵請餉至今未見部覆兩番題覆動經半
載此兵旣不能撤月糧又不可少現在月月
給發捐膳力實不能請餉尙未蒙

允進退兩難下情急迫今于本月十一日准水師

提臣萬 有特

請飛調等事一疏議于本月二十二日先由定海
操演除抽調各府並興化晉江同安兵七千
名配船出海外臣慮提臣孤軍獨戰難保萬
全封疆事大不得不又於泉州同安漳州潮
州四處捐膳水兵一萬一千二百名以壯聲
勢接應夾攻並戰是閩省水陸在在添設官
兵如許之多而請發現在戮力之兵餉尙未
蒙給者臣思總因

國帑匱乏故部臣難以允從耳臣又思額外請
餉則多費錢糧莫若撤去現在三倍給餉之

客兵卽可以膳現在招到無餉之主兵如調到浙江之客兵是矣今查帶來浙兵水土不服病死逃亡甚多兵不如前留之無益且此七千餘兵又有行坐兩糧又有浙省招募五千名頂額之糧是此一名之兵現食三名之糧矣不若將此兵

請調回浙募兵補額卽可以此兵之糧養新招一萬三千六百九十五名之兵矣但此兵自二月已經措餉養膳至今臣等竭盡心力止可捐膳以後新增四路之水兵不能再補從前

借給陸兵之餉銀况前臣等具疏已裁去包
衣大兵一千副每年亦省錢糧十餘萬兩仰
祈

皇上憐臣等止知報

國不知有家止知殺賊不知有身一片愚忠

恩賜各兵將各兵准自二月起支免臣等賠補俾
臣等得以効力疆場卽肝腦塗地所不辭也
至新募水師臣等各行量力捐膳不敢復請
帑金臣謹會同巡撫臣吳 昭武將軍官

陸路提督事臣楊 水師提督臣萬 合

詞客

題伏乞

皇上勅部議覆施行

康熙十八年十一月

日

請粵東舟師會勦

平南將軍都統賴

總督福建部院姚

謹

題爲閩省舟師四路俱集粵東船兵報多參差
恐悞大舉特

請嚴飭粵東提鎮諸臣速備舟師器械出海會勦
蚤奏蕩平事切照海逆鴟張蔓延震鄰釀禍
叵測水師提臣萬
念切同仇志圖滅賊
整棚舟師相機調度定於十一月二十二日
統領官兵先出定海地方操演練習俟舟師

一齊會同水陸官兵夾勦經提臣

報明在案臣思今止一路進兵誠恐勢孤未獲萬全故於各府海面添設舟師以爲聲援臣隨于泉州港募水兵二千名配船六十隻同安港募水兵二千名配船六十隻漳州港募水兵四千二百名配船一百四十隻各撥官兵出港共圖滅勦現在將齊不悞大舉外惟查潮州有修好鳥船十一隻並新造舢舨船一百零六隻又總兵苗之秀鳥船二十一隻臣與平南將軍臣賴 捐造七十四隻業經臣

等會疏于十月二十五日

題報請

勅潮州文武各官迅將前項船隻配撥官兵砲械
齊全尅期出海先勦達濠逆島弁勒限星速
至閩分頭夾攻無悞大舉今准碣石鎮臣苗
之秀潮州水師鎮臣劉顯芳有稱火砲未齊
器具未備者有稱船小難以出海者但臣等
捐造舳舳七十四隻一切兵糧器甲砲火悉
係臣等捐備外至粵省兵船自有隨船應備
之火砲器械卽偶有一二小船不堪出海亦

應以堪出海者卽爲配齊况閩粵唇齒相關
兩處合力兵齊船備旣可以攻廈門亦可以
勦達濠兩省皆有大利豈可推諉遲悞今風
信及時屢檄嚴催尙未報到難容遲緩若轉
盼來春風信不順徒糜錢糧實難辭責雖經
臣嚴檄飛催隔省不無岐視合無仰請

皇上下奮乾斷立限廣東提鎮諸臣迅將船隻修
造完固配搭官兵器械齊備依期出港直搗
賊巢滅賊平海在此一舉事關軍機呼吸謹
合詞密

題伏乞

勅部立賜議覆施行

康熙十八年十一月

日

閩頌滙編

[illegible]

題明兵餉

題爲

題明事康熙十八年八月初六日准戶部密咨

開福建清吏司案呈奉本部送捧接

御前發下紅本該本部密覆福督姚 題前事

等因于康熙十八年五月初九日題奉

旨該部議奏欽此欽遵于五月二十九日密封到

部該臣等查得福督姚 會同巡撫吳

提督楊 疏解經制各營兵丁每月給米

三斗部定折銀四錢今征調來漳士卒日在

行間與賊對壘若循舊例月給米價銀四錢
米價騰貴不能買其一半征兵困苦已極請
給本色等因具題前來查兵丁月米將本處
米石支給無本色米石每米三斗折銀四錢
支給此係定例今閩省需用糧餉浩繁之際
該督並不籌畫節省反以每米一石價有二
兩五六錢不等請買給本色不合相應將該
督所題之處毋庸議者也等因康熙十八年
六月十七日題本月十九日奉

旨依議欽此欽遵抄部移咨到臣准此隨卽咨移

巡撫提督并照會各鎮轉行各協營及行布
司糧道漳州府遵照去後續爲征兵日食待
哺折給尤難濟命懇恩詳給現米以資飽騰
以鼓用命事准昭武將軍官提督事楊 咨
前事內開准福寧鎮總兵黃大來漳州鎮總
兵吳三畏并擬協營將弁郭忠孝林葵詹六
奇馬勝等僉稱切本職等自舊年十月隨師
鳳山至今堵守邊牆與賊對壘披甲枕戈晝
夜勞苦惟望按月給發糧米以資日食各兵
効力疆場同心勦禦雖衣食不克亦勉強互

相激勵務期奮勇滅賊上答

朝廷豢養之恩茲聞奉有部文按月糧米不准概
給本色照例改給折色切思漳屬滿漢雲屯
米價騰貴查月給米折只有四錢尙不足買
米二斗則行間大小各營兵丁勢必半月忍
饑况漳郡彈丸非產米之地際此逆寇當前
咫尺堵禦各兵持銀覓米往返村落懸釜待
炊已難殺賊而遠出未回逆寇萬一豕突則
邊牆失守關係尤大不已相率咨請移會仍
給本色以甦兵食等由到本將軍准此爲照

兵丁糧米旣准部文不准概支本色自當勉從撙節惟是腹裏內地守城守汛名兵雖月關折價不敷買米猶勉強支持獨有大小各營抽調南征現在行間之衆自舊年十月至今屯劄鳳山等處一帶相持經年與賊咫尺對壘荷戈環甲砲火攻擊晝夜不停其勞苦之狀卽近日

上差大人單索所經臨而目擊者然必藉按月糧米給以本色俾現米炊爨稍資宿飽得以朝夕壁壘盡力防勦也茲議改給折色查

漳郡邊海彈丸兵馬雲屯米價騰貴今各兵
月領折價四錢尙不足買米二斗則其餘半
月勢難枵腹荷戈况各兵刻刻防守邊牆與
逆賊咫尺對面若令各兵持價往返村落覓
買升斗以備晨炊尤恐一離邊牆對面賊衆
不時豕突乏兵備禦則所關於軍機非細也
且征兵數萬一時給銀買糴價更騰貴無論
兵丁覓糴維艱卽民間亦難於平買則兵民
交困况查閩省各兵馬戰兵一名每名除明
扣小建只支餉銀一兩四錢守兵一名每名

除朋扣小建只支餉銀九錢三分六釐顧馬
兵除乾銀而外與步戰守兵各有父母妻子
弁自己衣帽鞋襪俱取給于此餉銀之中今
在行間若得月支本色糧米勉爲支持猶可
月存數錢寄資俯仰弁置備隨身衣帽身家
稍安始得盡心報効倘必改給折色各兵買
米不敷日食斷不能忍饑殺賊勢必將所關
月餉移來買米湊用是窮兵家深內顧之憂
身切凍餒之患而欲各營將領督率之以衝
鋒用命乎且前此支給本色各營兵丁尚有

不足食用者棄伍脫逃屢屢見告今若折給
尤屬不敷恐脫逃者衆何以資勦禦本將軍
固知

國用匱乏當仰體節省之意且前已費貴部院
盛心何敢再瀆惟以身在巖疆目擊征兵窮
苦又不敢不備述情形爲之懇請也貴部院
三軍司命軫念士卒無所不至尤祈勿靳繁
瑣再爲剴切會

題將現在行間大小各營兵丁月米仍給本色
俟事平之後照例改給折色庶征兵飽騰有

資而邊疆得收戰守之實效矣等因到臣准此查得奏銷錢糧係屬撫院職掌隨再咨移巡撫查明征兵給過本色糧米主稿會

題請銷去後續爲咨商酌給征兵糧米以資宿

飽事本年十二月初十日准巡撫福建部院

吳咨內開准貴部院咨前事內開爲照

漳屬天南自海澄失陷以來寇踞山頭深溝

高壘耽耽虎視希圖狼奔豕突綠旗官兵日

事行間與賊對壘所資宿飽惟此一分糧餉

案准部咨內開有米之處給米無米給折本

部院目擊沿邊士卒晝夜荷戈擊柝勞苦情
狀殊堪憫惻所有應支月米案據漳州府詳
稱自本年正月起至七月止俱係動餉採買
但錢糧奏銷悉隸貴部院爲政業經本部院
咨請宏裁在案今又准昭武將軍提督楊
咨開以腹裏官兵槩行支折將本色糧米解
漳貯倉支給行間士卒但上游至漳地方綿
袤更兼嶺峻山巔作何挑運與民無累合就
貴部院請煩察照迅賜卓裁會

題併祈示覆施行等因到部院准此案照前事

先准昭武將軍提督楊 咨同前事業已檄
行糧餉道確議詳報續據詳稱制兵日增米
無所出但腹裏各營支折行間士卒支本均
屬餉項尙部覆未允增撥餉銀春夏間之本
色無項堪買則非今日之所得預定也隨卽
據詳已經咨覆昭武將軍在案矣今照行間
士卒月米領折勢必于出產地方遠行購覓
方資宿飽第萬一警息頻聞守禦奚賴本部
院復准昭武將軍再行咨商緣由亦已飭行
糧餉道從長確議隨據該道詳稱該本道查

看得經制鎮營兵丁月糧每米三斗折銀四錢此定例也但漳州府現在勦海滿漢兵馬繁多支給孔殷漳屬非產米之地食衆米少則價值日騰商販皆由粵潮汀延各郡遠糴肩運至漳脚費愈多徵調府州綠旗兵丁均在營盤之內與入旗滿兵同支糧米不能獨與米折而任其離汛買米此該府照價辦放詳請

題明部覆未允但念各鎮營綠旗各兵與賊對壘執戈前驅奮勇先登與滿漢各旗均効力

于疆場既經給與本色于前今日扣追將見
兵食愈缺何以鼓敵愾而壯士心合無呈請
憲臺俯鑒營盤之內關支糧米大兵制兵計
日唱散糧米難以異同恩賜會

題從前已給糧米准與大兵一例支銷本色又
目今現在搗巢征兵月糧米折四錢實有不
敷三斗之數征伐大計先事籌畫應否擬實
入

告仍行該府辦給本色以資飽騰以圖亟奏膚功
俟海寇蕩平之日永支米折統候憲臺批奪

遵行等緣由經批仰詳督部院具

題去後但沿邊兵丁晝夜防禦勞苦情狀月米誠不可缺若以支折恐青黃不接之時價值驟湧遠購維艱情屬可憫第從前支過本色與腹裏槩支折色將本色糧米解漳貯倉支給行間士卒不致累民是在貴部院權衡碩畫爲日事勦禦士卒請命挈銜會

題聽候部議可也等因又據督糧道李榮宗詳同前由又准將軍管提督事楊 咨開准撫部院咨開准貴將軍咨前事內開請煩察照

俯念各兵經年與賊對壘勞苦已極其從前
支過本色糧米檄行漳州府准作開銷以免
追賠以鼓用命施行等因到部院准此爲照
各鎮營官兵俱係荷戈在壘臨敵對陣之時
所有月糧固應給以本色資其飽騰特因買
價費倍于折奉部議不准該府以碍難報銷
請各營補還原非得已茲准大移據各營咸
稱窮卒難干措處補還咨本部院檄行漳州
府將從前支過本色糧米准作開銷但此項既
奉有部行不特該府未敢准造卽本部院亦

不便報銷是在貴將軍主裁會同總督部院
商確特疏將現在壁壘臨陣對敵窮兵萬難
責其補還食過糧米苦情懇切陳請本部院
亦當列銜恭聽

皇上勅部議覆諒

天恩俯憐海疆士卒之苦自當

俞准庶可免于追補三軍之士從此咸荷生成否
則本部院雖飭行該府究竟不能報銷者也
相應咨覆請煩查照施行等因到將軍准此
案照先據漳州府呈詳各標官兵在漳先支

過本色糧米價倍于折碍難報銷請乞咨移
督撫兩臺會議具

題將給放本色准作開銷等情業經本將軍移
行各鎮營查議續准據各覆稱各兵經年與
賊對壘身冒鋒鏑以性命博此一分糧餉若
以支過之米責令補還貧難削骨且從前支
過之米乃征兵計日授食必令補還價銀是
昔日仰恩宿飽今翻爲剝膚苦累等緣由回
覆前來復經本將軍移咨貴部院暨撫部院
酌准開銷在案嗣准貴部院覆開爲照征兵

糧米嗣後或一月本一月折則本部院一處
惜兵苦心至從前准其開銷乃撫院具

題奏銷者猶祈移咨撫院本部院亦移咨撫院
可也等因准此本將軍又經備咨撫部院察
照去後今准覆開前因合再咨會爲此備咨
貴部院請煩察照俯念官兵勞苦已極從前
支過計日授食現米委難責令賠補價銀主
稿會

題早賜一日准銷則三軍早授一日之鴻慈當
踴躍報効于疆場矣等因各到臣准此該臣

看得經制各營兵丁每兵月給米三斗有米之處給米無米之處每米三斗折給銀四錢此閩省昇平時之定例也豈意舊歲逆賊狂逞徵調來漳官兵衆多一時米價騰貴且各兵與賊對壘擐甲枕戈勞苦萬狀傳領米折日食不飽各營兵丁逃亡在在見告臣等目擊情形暫給本色合疏

題請續准部覆未允臣卽遵移撫提二臣併行道府查議扣給去後今准撫臣吳提臣

楊咨覆前因又據督糧道李榮宗詳請緣

由前來臣見各兵顛連困苦情狀不特已食之米斷難追補卽日後折色之發難以強從臣等再三斟酌自八月起一月本色一月折色嚴飭各將弁約束聽領然此特一時慰安之計究竟已給本色之米未奉筭銷復給本折各半之米又難設處目今需餉浩繁司農仰屋臣等俱叨

皇上隆重深恩敢不仰體樽節輾轉焦思點金乏術今惟就通省制營兵丁應需本折糧米之內按地方米價之貴賤裒多益寡庶幾無損

國帑耳如延建邵汀福寧腹裏內地並無太兵
駐劄米價平廉每石不用一兩三錢三分將
米折銀兩發該地方官照市值就近買米給
兵該府額徵秋糧征完船運省城支給綠旗
不敷本色又福寧州不通舟楫米價亦廉兵
丁月米除配給秋糧之外不敷月米亦將米
折銀兩發該州就近買給通盤會計酌盈濟
虛悉以腹裏米折米買之羨餘湊買在漳征
兵半給之本色是于兵有益于民無損庶幾
不致重費

國帑也至從前已給十八年之本色窮兵出征
日久艱苦萬狀委難追補臣等惟有合額

皇仁俯恤准銷用勵邊卒此臣等萬分不得已之
極思總爲足兵足食矢圖滅賊固守封疆起
見臣謹會同撫臣吳將軍官提督事臣

楊合詞密疏具

題伏乞

勅部迅賜議覆行臣遵奉施行

康熙十八年十二月

目

閩頌淮編

閩頌滙編

[illegible]

請用藩員

題爲

請用靖藩轄下賢能文武以廣

浩蕩之恩事切照靖藩耿 自康熙十五年九

月內

王師進閩該藩卽率轄下文武將吏歸誠之後
奉康親王令諭遣發該藩官兵會同滿漢大
兵從福州進勦恢復興化泉州漳州三府著
有成功業經前督臣郎 會疏

題報在案茲今漳泉等處海寇復肆鷁張自去

年九月靖藩移漳之後在在會同滿漢官兵
摧鋒陷陣勞苦最著如原左鎮總兵曾養性
右鎮總兵江元勲左副都統連登雲等之功
居多其都統馬九玉已經

皇上現加官保任用外所有兩翼鎮兵丁已經奉
裁其兩鎮總兵官曾養性等并兩營各將升
范維傑賈振魯等六員現在身先士卒勤勞
主事豈可置之閒散不爲錄用又如進士宋鴻
舉人董大勲李朝柱金興國隨征軍前黽勉
疆場其敏練長才均足資用伏祈

皇上特廣浩蕩之恩大開使過之典仰請

勅部議覆將臣所開藩下文武各官或令軍前効
力遇缺

題補或令給咨赴部遇缺先用以彰激勸以鼓

人心臣謹會同巡撫臣吳將軍官提督

事臣楊水師提督臣萬合詞密

題伏乞

睿鑒勅部議覆施行

康熙十八年十二月

日

題明出師

題爲欽奉

上諭事康熙十九年正月初七日准兵部密咨內
開康熙十八年十二月二十日奉

上諭總督姚

提督萬

今欲多調水陸兵

丁破滅海賊進取金門廈門屢經具題其事
所關最爲重大當日擊破海賊克取金門廈
門曾用荷蘭國夾板船隻茲入海進剿旣少
前堅固大船而荷蘭國船兵又未會到以我
船入海誠恐萬一不能如意着議政王貝

勒大臣會同詳議具奏欽此欽遵該臣等會議得海賊竊踞海澄等處恣意擾民應速行殄滅以安閩省但海賊盤踞水面已久必須兵強船齊方可攸徃前取金門廈門既用荷蘭國船兵破賊今亦應用荷蘭國船兵合力舉行則有濟大事實爲顯然

上諭允當相應遵行請

勅總督姚

將軍楊

巡撫吳

提督萬

等若以伊等所備兵力能破海賊斷無踈虞真有灼見則聽伊等酌量而行少有疑慮

不可以前曾具題憚于更改免強妄舉此事

所關最爲重大聽總督姚 將軍楊 巡

撫吳 提督萬 等詳商妥確具題可

也等因康熙十八年十二月二十一日奉

旨依議速行欽此移咨到臣准此遵卽備移將軍

提督臣楊 巡撫臣吳 水師提督臣萬

去後隨于正月十一日准昭武將軍管

提督事楊 咨稱爲照水面征戰與陸路之

馳擊勢異本將軍生長北方素未嫻習且自

入閩以來卽率兵南下其水師之官兵慣練

與否併新收之船隻大小堅固及一切配搭
砲火器械等項實俱未深知茲奉

上諭以事關重大行令確議具

題本將軍既未深知詳悉未敢輕爲致喙但用
夾板船夾擊必不可少統祈貴部院鴻裁勝
筭斟酌詳慎主稿挈街會

題可耳今准前因除卽咨詢水師提督萬

確議見覆俟咨覆到日另文咨會外等因又
于十一日准將軍提督楊 咨稱查出洋剿
賊事關重大所以

上諭再行會議在本將軍未見現在春日融和風
信南北不時非若隆冬北風盛發我兵可占
上風似應稍俟荷蘭國夾板船到日合力夾
擊以仰體

上諭慎重之意以收萬全之效是否有當惟候貴
部院咨商水師提督再加從長酌妥會
題可也等因于正月十二日接准提督萬

咨開捧讀

聖諭敢不益加慎重但思海寇鴟張荼毒日甚生
民水火刻望徯蘇茲我新舊大小船艦現有

二百四十隻配坐官兵砲手二萬八千五百
八十名業已齊到定海逐日操演與賊相對
而聯絡大小船五十餘隻亦將報竣出洋若
待荷蘭國船并力合攻兵力加厚固爲萬全
然荷蘭國船未必即到縱能速到亦在五六
月間而轉瞬三四月南風盛發我舟泊在定
海乃屬下風難以征進勢必抽回閩安鎮內
再圖後舉彌歷日月其勢已摧且蓬縶日久
勢必朽壞又當再行修理師老財殫民生愈
瘁加以逆寇游移沿邊擄掠將此嗷嗷待斃

之民卽逞逞思亂之衆寇氛愈熾撲滅尤難
不轉爲閩方大害哉且兵者形也戰乃勢也
現今海逆雖盡選精銳分遣僞總督林陞朱
天貴等結踪扼海壇南日湄州崇武沿海
一帶地方而我師操演既熟鼓勵已就將士
踴躍爭先皆樂一戰本提督因形因勢擬此
正月中旬審候風潮便利一股由內港石牌
洋征進一股由外洋觀音澳貺尾征進兩股
夾攻直迫海壇加以上風臨之斷可取勝旣
取海壇再覘動靜如可乘勝長驅當卽浴會

水陸夾攻務求萬全或稍有未得其利暫駐
海壇再行會商可也倘延至夏初南風不利
我師雖多亦奚益哉可否進止合就咨商等
因准此隨於本月十四日復咨移商巡撫吳
水師提督萬 內開接來咨甚見貴
提督爲

國殺賊至意此本部院祈求而不可得者細繹
大咨內如所稱三四月南風盛發我舟乃屬
下風勢必抽回再行修理師老財殫民生愈
瘁審形度勢候風便利分兵兩股夾攻直殲

海壇上風可以取勝此皆諳熟地理海性風
信形勢至當不易之論甚服慷慨論偉畧但駐
海壇再覘動靜在鄙見則以爲貴提督大力
如可以取海壇則竟可臨廈門似當訂期各
路水陸并進蚤奏蕩平若量力審勢尙不可
以取廈門似不若仍駐定海暫養銳氣似無
暫住海壇徘徊中路之事總之貴提督此一
戰也關係閩省安危若一戰而勝則海賊披
靡平海可必若一戰不勝則盜賊蜂起海勢
復熾所關最重不可輕也本部院不諳水師

難以遙定應聽貴提督爲政祈審度兵力知
彼知已誠如

上諭所云能破海賊斷無踈虞真有灼見則請貴
提督示覆訂期會同進剿如尚在未定不能
必其必勝則須慎重再行操練等候紅毛船
隻貴提督與本部院均爲封疆大臣功罪皆
不敢辭惟擇有利于

國家而無悞于封疆者行之可也伏祈詳細審
裁確賜示覆以憑會

題去後正月二十一日准巡撫部院吳 咨

開該本部院詳繹大咨籌度精詳誠爲仰體
廟堂慎重大舉之至意卽本部院初奉

上諭之日亦再四思維誠不可輕舉妄動或致疎
虞所關匪細但必須親往舟師審度情形果
萬萬不能制敵安容水師提督萬 竟自
輕進是以于本月十二日到定海閱視見將
士齊心奮勵新船堅固且大與舊船連艚衝
擊操勝可恃水師提督萬 之直任攻取

海壇者誠非孟浪至于一過三四月風汛轉
南賊佔上風我船反受其侵壓卽定海亦不

能駐劄勢必抽回內港而示賊以餒師老氣
衰且坐待荷蘭船隻五六月到再待至八九
月風汛進兵此半年有餘糜費錢糧無筭又
船上蓬索楨具朽爛應修事事堪慮誠如水
師提督萬 來咨所陳利害不若乘風汛
之順利船隻之堪用無待荷蘭船到先水陸
進攻賊窟之爲得也然此在未奉

上諭之先屢蒙貴部院備示勝籌切齒鄭逆荼毒
生靈相期本部院枕戈待旦共滅此而後朝
食所以仰報

朝廷委任之恩全在斯舉業久經會議僉同提督
萬 統領舟師由定海趨海壇一路迫進
廈門本部院親赴同安會同貴部院將軍提
督楊調度陸兵分從海倉松嶼潯尾石滸等
處攻勦與舟師水陸並進并力搗勦其舉廈
門賊巢此成議具在未有疑議也今接大咨
似必須待荷蘭船到方可進兵固屬動出萬
全之筭但坐待半年數月之久有賊反乘風
侵犯之患師老銳氣銷阻之虞又糜費

國家錢糧浩大再修理蓬繚楨棋艱難矧我船

原非小弱將卒心力俱齊又何殫而不速進
兵滅賊是以復再議定水師提督萬 竟
統舟師攻取海壇本部院亦即刻日統兵前
赴同安親與貴部院將軍提督楊 會商分
攻海倉松嶼潯尾石潯等諸路一以分狡賊
之勢力一以壯水師之聲援迅掃逋寇機不
可失惟希貴部院一面主稿合詞

題覆一面整頓兵馬卽行進兵幸勿猶豫至于
水師提督萬 咨內所云先取海壇再商
取廈門此用兵次第原非中路徘徊之意倘

貴部院終有他慮本部院卽當與水師提督
萬一議任而行之諒貴部院滅賊志切必無
岐視戮力同心所仰藉于貴部院暨將軍提
督楊者非淺也等因到部院又准昭武將軍
管提督事楊 咨開爲照水師官兵船隻准
撫部院咨開已經親臨閱視似操有必勝之
勢但本將軍自解臬圍以來卽統師南下與
貴部院同在漳州鳳山經年與賊對壘其船
隻官兵委未目擊是以未敢輕易懸定茲奉

上諭諄諄慎重在

九重洞悉水陸異勢特令再加確議今准大咨
以進取海壇勝則

國家之福倘有不測其勢難以逆風退師定海
仰見貴部院詳慎深心至本將軍職司陸路
若以爲可進則未知船兵之虛實安敢妄爲
附會若以爲不可進則水師機宜應聽水師
提督爲政本將軍惟當整勦兵馬于陸路佇
候師期夾擊耳第此舉關係全省安危同任
封疆之重必計圖萬全戰無不勝方可紓

廟堂南顧之殷似當仰遵

上諭稍俟荷蘭船兵尤爲穩妥因奉有會議之

旨不得不再加慎重統祈貴部院碩畫再咨商撫
部院定奪

題覆等因到部院准此隨即備咨再商巡撫部
院爲查水師進取海壇勝則貴部院暨水師
提督之妙筭

國家之洪福矣但以新湊官兵未經久練海壇
一不可得則逆風難歸四海五湖此船將不
可問今本部院現在漳州千八葉一百四十
隻外又捐造趕繒舳舳等船一百四十隻

部院若有同心亦于同港于現在八槳一百三十隻外再造舳舻等船百餘隻各膳精練水兵八千名至秋紅毛船已到萬提督再操練半年兵更精熟漳同兩路兵船齊足彼時進兵萬無一失若在此時本部院愚見實實見未萬全不便輕舉喪師辱

國違悖

上諭大有未便伏乞貴部院與提督再商萬全可也等因備覆去後本月二十五日又准水師提督萬 谷開本月二十一日辰時准貴

部院咨覆前事內開貴提督如可取海壇則
徑可以臨廈門似當訂期各路水陸並進若
量力審勢尚不可以取廈門似不若仍駐定
海暫養銳氣似無暫駐海壇徘徊中路之事
本部院不諳水師難以遙定應聽貴提督爲
政祈審度兵力知彼知己誠如

上諭所云能破海賊斷無踈虞真有灼見則請貴
提督示覆訂期會同進剿如尚在未定不能
必其必勝則須慎重再行操練等候紅毛船
隻等因到本提督准此具見貴部院多方籌

畫持重周詳但兵行之要當順天人案查貴部院去冬大咨以本提督水師勢單欲以十路進攻互爲聲援碩畫弘謀成議具在本提督于未欽奉

上諭之先日在定海操練卽擬此正月中旬乘風時便利刻期征進乃于本月初八日辰時

聖諭頒至軍前令諸臣慎重大舉本提督若稍有徘徊審顧之念安肯星刻飛咨切陳利害直以進攻海壇爲已任耶且廈門金門原非高城饒野必爭之地不過逆賊竊踞巢穴要在

掃除逆黨爲急耳今逆黨厚集海壇本提督
擬就海壇先滅衆寇暫擬停泊伺覘動靜咨
商搗穴此實師行次第而進之議安肯中路
徘徊致煩疑慮抑兵貴神速未聞巧久苟在
我天時旣順人和旣得地利旣審以順討逆
以仁伐暴便可前征然謀事由人成事在天
若必責以保其必勝顧此畏彼機至不征時
來不戰卽再持三五年竟是如此工夫其如
國事民生何哉且荷蘭船來否莫定遲速難期
若必待其到時方持以爲必勝切恐瘡痍目

甚挫銳日久敵愾民情兩不可問亦豈可保
爲萬全之計耶但本提督方畧自歛實冀貴
部院爲政匡所不逮總期救民利

主上報

國恩他所不計茲本月十二日巡撫部院吳已
經親臨定海面約統領陸師赴同安各港八
槳聲援去後本提督惟候風利刻日進征海
壇會師乘勝搗穴伏祈貴部院卽便主稿會
題迅調陸兵先據圍頭處所安設砲火使上下
賊艘不得寄泊仍祈勿忘前議十路進攻之

處着實調集弁力大舉是所厚望也今准前
因相應咨覆等因到部院准此復卽再咨切
商定議爲照本部院急於滅賊之心如焚如
溺倘料貴提督之兵必能取勝恨不得急請
進兵滅此朝食又焉肯屢咨瀆請求貴提督
審慮周詳計出萬全耶但貴提督寔止孤軍
而且新配下船操練未久卽本部院與巡撫
部院各統舟師親出同安汪東兩港然止可
爲遙應之兵張其聲勢與貴提督之戰實勝
不能助敗不能救也本部院雖係諸生不諳

水性然自入任以來盡皆衝險之地從戎二
十年且在閩日久留心水陸竊謂海壇之賊
可以智走不可以力取也若必極力以攻海
壇計斯下矣若一攻海壇而不得我兵焉能
逆風退歸則全省大事去矣大帥之道必計
能進能退可戰可守而後謀定而進戰則必
克退守亦無慮也今准大咨以爲謀事在人
成事在天我輩封疆大臣焉可不計萬全諉
之天時人事耶古云君相不言命蓋言君相
操勝敗之權生死之數故也本部院自滇黔

告變身經六十餘戰皆身先士卒冒火砲矢
石之下留此餘生者又何憚而不贊貴提督
之速進乎誠以所關匪細不得不再四瀆請
如大咨云若必責以保其必勝顧此失彼則
本部院益不敢輕舉矣今已二月矣若至今
秋大戰相去不過七閱月此中敵愾亦未必
遽有所增民情亦未必倍有所苦也至于路
進兵除潮州路奉

旨停其來閩泉州路已准撫部院密商併入同安
進兵外若果貴提督一路決意進兵則此七

路蚤已全備斷不敢悞自當極力並進聊爲
聲援若遽忘前議則貴提督視本部院爲何
如人伏望貴提督詳察新兵力量細思

上諭深遠回慮却顧必計萬全秋間大舉似爲至
當若水師提督巡撫部院主意已決不採芻
蕘亦祈飛賜回咨以憑兩議具覆恭請

睿裁等因各咨覆去後又于二月初二日准巡撫
部院具 疏稿爲天時正順人心正銳亟
宜乘機進勦謹報微臣出師日期仰祈

聖鑒事切照鄭逆盤踞廈門沿海數千餘里數百

萬生靈受其荼毒誠神人共憤凡在閩大小
臣工將士百姓無不欲滅此而後朝食者久
矣故自去冬臣新造戰船工竣水師提督萬

卽于康熙十八年十二月內分配將兵
上船先由閩安鎮駕出定海大洋操演惟俟
舊存大小戰船修完及江南砲手到齊卽盡
行配駕相機進剿臣業與督臣姚 將軍
提督臣楊 水師提督臣萬 公同商議
水陸並發務掃逆窟努力以報

國恩在此一舉矣嗣于十九年正月初五日接

到兵部咨文欽奉

上諭經議政王貝勒大臣會同詳議以此事所關
最爲重大令臣等詳商妥確具

題臣恭繹之下仰見我

皇上睿謨周密慮出萬全臣等雖志切滅寇安敢
輕舉妄動有負我

皇上慎重大舉至意但荷蘭船隻春季夏初必不
能到今修理舊船俱已完工江南砲手亦前
後到閩果否足以破賊若不身至海洋審察
情形何敢懸度以決進止臣隨于正月十二

日到定海水師閱視訪問自提臣萬而

下各鎮營將弁莫不鼓舞踴躍求蚤殺賊建

功而提臣萬總兵林賢陳龍黃鎬楊嘉

瑞副將田萬侯等尤感激

天恩隆重奮身圖報誓不與賊俱生下至官兵二
萬八千有餘以及聯絡鄉勇澳民三千餘衆
亦各人人思奮勦賊報効臣見人心鼓勵至
此固足以氣吞逆醜知賊亡不久矣設或船
隻果小操練未精亦未可輕爲嘗試乃備訊
習知賊營者云賊船雖多不若臣所造新島

船長大堅固駕駛便利提臣萬因與臣

熟籌今將士之心與制勝之具既奮勵堪用
如此若必待荷蘭船到至蚤亦在五六月間
此坐俟半年之久無論師老氣衰且曠日持
久虛糜錢糧浩大又時過二月風汛轉南我
船卽在下風賊反佔上風難以取勝非候至
八九月不能舉兵而現今鄭逆悉調賊船賊
兵厚集海壇距我定海駐師之地不遠咫尺
相對若至三四月賊船一得順風知我師不
能逆風征戰斷無不肆出侵犯設將我船兵

抽回閩安內港以避其鋒則人情漸餒賊勢
益張卽沿邊各汛更滋擾害且各船蓬綵楨
棋淋曝自春徂秋難免朽爛再措費修葺艱
難似不若乘目今風汛之便利將卒氣勢之
勇銳先攻海壇一得海壇則賊之門戶已墮
賊心自然崩阻乘勝進取金門廈門遂可不
遺餘力今猶恐賊力全注海壇未易克舉必
須水陸夾攻以分賊勢使賊彼此不能兼顧
斯取勝不難今議定提臣萬 竟率水師
攻取海壇臣親統臣標官兵疾赴同安縣會

同督臣姚 將軍提臣楊 調度陸兵配
駕新造八槳船由海倉松嶼潯尾石潯分路
進取廈門倘仰仗

天威一舉而滅數十年之逋寇此臣與諸臣之願
也卽或賊渠未能盡殲使逆徒震懾遁歸臺
灣舊巢沿海邊疆亦得暫爾寧息所恃者惟
在

社稷之威靈

廟堂之勝筭固非臣愚昧驚劣所能及也除欽奉
上諭機宜聽督臣姚 具疏合詞題

報外臣謹于正月二十四日率領將兵由省城前
赴同安所有出師日期理合具疏密題奉行
一切

欽案部件應請照例寬展容臣旋師之日次第完
結題

報伏乞

皇上俯鑒勅部議覆施行等因到臣准此該臣看
得賊船以二百餘號令偽鎮朱天貴統領久
駐海壇近又以偽鎮林陞統領賊船一百號
駐劄臭塗灣料賊之計有二若我師竟攻海

壇則海壇之賊出迎而臭塗灣之賊船前來
夾擊我師分兵迎敵勝敗尚在未定此賊之
下計也若我師進攻海壇而海壇之賊不戰
而往東大洋一開反可抄出我師之後上據
定海下據臭塗我師卽得海壇腹背受敵反
爲不便此賊之上計也當卽飛咨撫提二臣
務期萬分慎重弗以封疆爲輕戲外但臣與
昭武將軍管提督事臣楊 巡撫臣吳

水師提督臣萬 報

國之心實同而意見微有各異撫臣與水師提

臣則急於滅賊不俟紅毛船到卽行進兵者也將軍提臣與臣則欲新配水師再行操練半年容臣漳州添造船兵練熟撫臣同安添造船兵齊熟俟紅毛船到一同進兵者也原擬兩地各商停妥或一議具

題或兩議

請裁會

題具覆今撫臣旣於正月二十四日拜疏出兵是意已決勢難挽留臣等不敢以意見稍異畧爲退諉臣當卽會商平南將軍臣賴

臣則急於滅賊不俟紅毛船到卽行進兵者也將軍提臣與臣則欲新配水師再行操練半年容臣漳州添造船兵練熟撫臣同安添造船兵齊熟俟紅毛船到一同進兵者也原擬兩地各商停妥或一議具

題或兩議

請裁會

題具覆今撫臣旣於正月二十四日拜疏出兵是意已決勢難挽留臣等不敢以意見稍異畧爲退諉臣當卽會商平南將軍臣賴

康熙十九年二月

日

一

閩頌滙編

閩頌滙編

[illegible]

配練投誠

題爲增兵不費

國餉勦賊實有兼支謹疏

題明編伍配練以濟實用事切照閩省沿邊遼
濶要口繁多所築臺寨皆設重兵一遇有緊
或賊偷糧卽于寨內發兵出擊非若康熙六
年每臺止兵五名十名每寨止兵數十名而
已也茲際水陸大舉夾勦選將振旅勢必遴
調防寨官兵衝鋒破敵然寨兵調出則汛守
單虛當今

國用匱乏斷不敢再請兵餉臣思閩省投誠官兵蒙

皇上隆恩各官照銜支給全俸兵丁每月給餉銀八錢米三斗計自康熙十六七年養以至于今者年深日久無不感德思奮案查前督臣李 當時征伐海寇挑用投誠官兵同心協力攻破賊巢金門廈門等島獻俘奏凱已著明驗但每月只給八錢難以責其用命臣今議將投誠現在食糧各官兵每百名之內挑選精壯八十名其老弱二十名止給月

米三斗不給月餉聽作火兵即將此二十名
老弱兵之月餉加之精壯兵八十名之內是
精壯兵每月可得一兩之餉稍足資其飽騰
矣總計現在官兵分爲隨征十八營選有才
能身家各官立爲營將統領兵丁每兵給與
盔甲器械編成隊伍按隊給鑼鍋帳房旗幟
操演訓練聽令調遣以之隨我綠旗臨陣亦
可以壯聲勢以之分撥協防臺寨亦可以抽
出經制官兵殺賊是不再費

朝廷之錢糧得資精兵之實用仰請

皇上俯允臣請庶投誠士卒無愧素餐大舉捷伐
克有攸賴矣臣謹會同巡撫臣吳 將軍
官提督事臣楊 合疏密

題伏乞

勅部議覆施行

康熙十九年二月

日

此頁無文字

總督福建少保兵部尚書姚公奏疏

閩中 子民 錄

增兵勦賊

題爲增兵不費

國餉勦賊寔有兼支謹疏

題明編伍配練以濟實用事切照閩省沿邊遼
濶要口繁多所築臺寨皆設重兵一遇有緊
或賊偷糧卽於寨內發兵出擊非若康熙元
六年每臺止兵五名十名每寨止兵數十名
而已也茲際水陸大舉夾勦選將振旅勢必

遴調防寨官兵衝鋒破敵然寨兵調出則汛
守卑虛當今

國用匱乏斷不敢再請兵餉臣思閩省投誠官
兵蒙

皇上隆恩各官照銜支給全俸兵丁每月給餉銀
八錢米三斗計自康熙十六七年養以至
于今耆年深日久莫不感德思奮案查前督
臣李 當時征伐海寇挑用投誠官兵同
心協力攻破賊巢金門廈門等島獻俘奏凱
已著明驗但每月止給八錢難以責其用命

臣今議將投誠現在食糧各官兵每百名之內挑選精壯八十名其老弱二十名止給月米三斗不給月餉聽作火兵卽將此二十名老弱兵之月餉加之精壯兵八十名之內是精壯兵每月可得一兩之餉稍足資其飽騰矣統計現在官兵分爲隨征十八營選有才能力身家各官立爲營將統領兵丁每兵給與盔甲器械編成隊伍按隊給鑼鍋帳房旗幟操演訓練聽令調遣以之隨我綠旗臨陣亦何以壯聲勢以之分撥協防臺寨亦可以抽

出經制官兵殺賊是不再費

朝廷之錢糧得資精兵之實用仰請

皇上俯

允臣請庶授誠士卒無愧素餐大舉撻伐克有攸
賴矣臣謹會同巡撫臣吳將軍管提督

事臣楊合疏密

題伏乞

勅部議覆施行

康熙十九年三月

日

閩頌滙編

[illegible]

請安投誠

題爲欲爲投誠計久安不得不大破舊例事切
惟投誠者不難于招撫而難于安插而更難
于使安插之久遠不變但後人學問遠不及
前人而反自謂過之無端更改以致窒礙難
行耳今欲行一事必查前人之所爲者其苦
心積慮之處體貼備至而後從而因革損益
之庶相去不遠矣投誠一事前督臣李

勞形劬思深謀遠慮布德施恩可謂無所不
極其至臣一一倣而行之其最大者有四事

一爲授誠官給俸兵給餉此事最得授誠之心今臣已經倣行具

題奉

旨俞允在案今無庸再議一爲授誠候選官寄憑至聞此事最得授誠之心前臣疏請未荷

俞允今臣再疏補請于後一爲界外仍舊遷棄此事殊未盡善前經臣具

題部覆奉

旨會議在案今無庸再議一將授誠官兵發往外省屯墾此事最傷授誠之心今應將本省界

外田地給與屯墾今臣具疏

請行于後共分兩疏恭呈

御覽臣爲安插投誠官兵起見謹密疏具

題伏乞

勅部議覆施行

閩頌滙編

康熙十九年四月

日

請用投誠

題爲

請照舊例錄用投誠寄憑至閩蚤滅海賊事切照
海上各盜在我則視爲賊在彼則曰取功名
人有一技寸長而不得見用于

本朝鬱抑無聊思得一官而甘心焉且鄭經祖孫
父子僭稱名號竊踞海上已五六十年故人
亦以落海爲進身之階初不自知其爲盜也
臣竭力招撫克復金厦今從海者明知鄭經
事不可爲而猶同奔臺灣甘心老死絕域者

皆以爲在臺灣則儼然一官一投誠則革職
一齊民耳蠢爾無知一至于此臣幾法盡術
窮卽現在投誠數千官員皆言前督臣李

破格

題用文武各官數百十員現任者歷歷可數今
姚總督兩疏止

題用遊擊許完一員此外並無錄用我等何日
得有出頭日子卽臣差官前去蓼羅澎湖招
撫各盜亦言爾投誠兩年至今尚是白身自
顧不暇我今卽去亦何益乎臺灣爲數省盜

藪藏垢納汚山海潢池皆以爲主此輩圖官
戀賊牢不可破在臣不必比擬前官而同一
投誠前後頓殊非所以示鼓舞况臺灣亦須
勦撫並用則現在投誠亟須加恩選補以作
榜樣臣查新舊投誠官內其有才能者不過
一百餘員爲數不多伏祈

皇上大沛隆恩准將現在投誠一百餘員

賜照舊例錄用寄憑至閩則現在投誠者自各欣
欣嚮榮而甘奔臺灣者亦樂歸恐後矣除投
誠各官員名另行造冊咨部外臣謹密疏具

題伏乞

勅部議覆施行

康熙十九年四月

日

投誠開墾

題爲

請將界外田地給與投誠官兵屯墾事切查今之沿海爲盜者皆遷移之民無田無地挺而走險耳投誠之後若不給與俸餉無以安其身心若經年累月盡行槩給則

朝廷有限金錢難以爲繼若盡令歸農內多無農可歸無事可做者勢必仍舊爲盜若仍散發各省屯墾則前者吳三桂一變各省墾屯各兵盡起爲盜何曾一毫有利于

國乎臣再四思維千難萬難然查前事之得夫
卽爲後事之行止前因界外地土未復船隻
又已燒燬若將投誠衆多官兵仍在閩省後
患正無了時亦萬不得已始令散處四方耳
今若將界外地盡行復還而海外要汛又
設提督總兵大臣重兵分守是官兵在外而
投誠在內也則此沿邊之地給與投誠官兵
又復何慮其爲鬼爲蜮乎況前因遷其地土
故走而爲盜後因發往外省令棄其故土而
復爲盜今還其遷地樂其故土人人皆有安

土重遷之思田園地宅之戀卽迫之爲盜亦
不可得矣界外田主經今二十年死亡過半
查有主還民之外餘應盡給投誠官兵開墾
以安反側以省

國帑者也况前時沿海設立五遊七寨如銅山
金門廈門鎮海高浦平海等處皆設衛所官
兵南澳則設總兵後改副將澎湖則設遊擊
古人良法美意洵可效行數年之後未始不
可將投誠之衆安順已久漸倣古制沿海星
羅則海患可永除矣臣謹密疏具

閩頌滙編

題伏乞

勅部議覆施行

康熙十九年四月

白

米料情形

題爲兵糧旣難刻緩民食復苦不支亟請良籌
以甦急困事准昭武將軍管提督事楊 寧
海將軍喇 會咨前事內稱兵以衛民何
堪庚癸之頻呼民以養兵嗟此顛連而堪恤
泉郡士馬雲屯糗糧芻茭之需屢苦不給雖
經貴部院設法區處而徵應仍苦不前茲各
旗營兵馬糧料壓欠枵腹嗷嗷萬難刻待卽
有些須借貸而民間米價騰貴亦無門可以
藉糴日復一日升斗莫給此兵之太困苦也

屢檄行有司作速徵應據稱米穀糧料出自
民間今者閭閻十室九空釜塵爨冷往往採
野草以充饑轉溝壑而待斃鳩形鵠面之狀
慘不可言彼旣救死不贍豈能重應征求以
濟軍需之急此又民生之大困苦也至若地
方有司供億不前法宜叅處但使事有可辦
故意遲延自應特掛彈章以儆玩愒今倉廩
旣已空虛民間無從採辦雖有桑孔亦苦點
金無術必欲飛章叅寃亦未足壓服下僚此
又官吏之大困苦也前貴部院捐銀外府買

米站運協濟舟車之來絡繹不絕似宜米價
稍平皆緣食之者衆目下米價每石將近五
兩騰貴尤甚不知將來何所底止目下軍士
待哺勢難湏臾稍緩合咨貴部院鴻裁調劑
務使兵民兩濟其困不惟本將軍深感舟誼
卽闔郡軍民均蒙再造等因准此又據興泉
道副使張仲舉泉州府知府蔣毓英詳稱泉
地荒歉兵民乏食厯憲臺饑溺由已之至意
捐買米石運泉接濟洵曠世仁慈也但涓涓
翼運之米有限泉郡蒲漢綠旗兵馬不下三

萬饑民數十萬食齒浩繁自三四月以來米價日騰目下每米一石價至四兩九錢五兩不等欲從鄰封買糴查上之興化府米價每石三兩三四錢下之漳州府米價每石三兩二三錢較之泉州市價每石減省三分之一奈挑運至泉又費腳價所省不多時正青黃未接轉瞬價湧無底兵民交困危急情形殆有不忍言者乞賜飭行上下興漳二府罷禁發糶疏通糧食兵民咸沾更生等緣由又爲米料時價日增軍需供億浩繁請亟

題明等事據漳州府知府吳延貴詳稱四月二十五日據龍溪縣申報正月至三月米價每石自二兩三四錢以至二兩八錢一分穀每石一兩二錢二分以至一兩四錢二分及至四月初旬上河米船少到米每石價至三兩一錢九分今則米每石價貴三兩三錢六分穀每石價至一兩七錢八分草束自正月至三月皆從僻遠鄉村採買每束一分八厘以至二分三厘今四月每束二分八厘以至三分不等似此價值日增將來採買報銷維艱

申報到府隨查致貴之由實因漳郡產穀稀少在漳兵馬旣已就漳購應尙賴延汀站運協濟奈泉州饑荒與漳接壤奉文疏通商賈多就漳地掀販赴泉散賣是以按月時價遞湧當此新舊相懸未接價貴若是以後時值猶未可量但糧料顆莖皆係動餉購買價值亟當嚴檄上報不致因循浮冒伏乞憲察題明庶免將來駁詰等緣由各到臣據此該臣看得泉州歲歉饑荒前此海寇未平誠有兵變民亂危急之虞經臣倡先陸續變措捐銀

一萬兩又率通省司道府捐銀一萬兩委員
從上游建邵出產地地方買米由水陸站運至
泉稍甦殘餒隨即具疏

題明并請復開銀米事例在泉州府捐納救荒
在案新經奉行各省尚未週知是以捐納者
甚少臣痛念民瘼復陸續奏捐銀四千兩買
米接濟終屬杯水車薪茲准昭武將軍寧海
將軍二臣以泉郡四月米價將近五兩移請
調劑兩濟兵民又據泉州道府詳稱四月米
價每石騰貴四兩九錢五兩不等以與郡米

價每石三兩三四錢漳郡米價每石三兩二三錢又據漳州府詳稱漳地接壤泉州郡米穀商販赴泉自正月至四月米價每石二兩三錢迺貴至三兩三錢六分穀價每石一兩二錢二分迺貴至一兩七錢八分草價每束自一分八厘迺貴至二分八厘三分不等詳請報明免致將來報銷駁詰等由竊閩省漳泉地方被寇播虐大兵征勦民苦供億者三載于茲矣今值海逆蕩平投順遷民弁入內地者不下十餘萬且值年荒歲饑兵民交困辰

下四月泉郡米價騰湧特甚漳郡雖藉延汀
站運協濟米料價值迺貴如斯若至七月秋
成殆不可問但泉郡兵枵腹民啼饑臣不勝
慟惻除多方設法輓運并廣示勸諭捐納銀
米急救荒歉外所有兵民困苦米料價騰情
形臣謹會同巡撫臣吳 昭武將軍管提
督事臣楊 合詞密疏具
題伏乞
睿鑒勅部議覆施行

閩頌滙編

康熙十九年五月

日

招撫條例

題爲海賊負水繁多用兵勦殺難盡特廣招撫
條例宣布

皇仁蚤奏蕩平事准兵部密咨內開職方清吏司
案呈奉本部送密封內該議政王等會覆本
部覆福督姚 題前事等因奉

旨議政王貝勒大臣會議具奏欽此密封到部該
臣等會議得福督姚 疏稱海賊嘯聚島
嶼遠隔汪洋但賊黨繁多敗必歸海一時難
以盡勦查前任督臣李 善於勦撫并用

官則給俸兵則給餉不論投誠文武一槩題請降級實授今臣謹叅酌詳議招撫條例十款內給賞之數約非十餘萬兩不能完事臣現在竭力措給併行合省官員勸輸共濟但十款內除給賞銀兩者臣已捐給外題請投誠人員應照康熙元二年例叙用等因開造招撫事宜十款文冊前來查康熙元年福建浙江廣東三省差官招撫海賊接踵多有來歸應照前例差官招撫但今閩省有大將軍康親王將軍大臣滿州大兵停其差官請

勅下太將軍王將軍督撫提等令其分途招撫開
明投誠人等功之大小具題到日量功從優
加恩議叙至見今投誠官兵支給俸餉之處
先經該督題明臣等會議照伊所題准其支
給在案今嗣後投誠官兵亦照康熙元二年
支給俸餉安插得所其賞賚投誠官兵給與
蔬菜口糧等項銀兩該督既稱行合省官員
勸輸其濟賞賚應如所題准行俟將捐過銀
數造冊具題到日該部照例議叙至投誠人
員照功之大小議叙令其得所既照康熙元

二年例議該督列款具題之處俱無容另議
等因康熙十七年十月十六日題本月二十
一日奉

旨依議欽此密封到部移咨到臣准此隨即檄行
布按二司及各道運府廳州縣一體欽遵捐
輸去後續於康熙十七年十等月初一等日
起至康熙十八年四月十八日止陸續據原
陞任漳州府知府周昌等共捐助銀二萬五
千一百兩解赴臣軍前轉發漳州府隨收隨
發賞資各起投誠官兵業於康熙十八年五

月祔九日備造各官捐助過銀兩數冊

題叙在案又自康熙十八年四等月十九等日起止康熙十九年四月初五日止陸續據汀州等府清流等縣知縣王鼎新等通其捐助銀一萬九千六百九十兩批解赴臣軍前轉發漳州府隨收隨給賞賚各起投誠官兵業于康熙十九年四月十一日備造各官捐助銀兩數冊

題叙在案俱准吏部咨覆捐銀各官照例分別加級紀錄外以上二項通共收過各官捐助

銀四萬四千七百九十兩今又據各官泉州
府知府蔣毓英等續報捐助銀三千六百三
十七兩五錢現在彙疏開列各官職名分別
題叙外查自康熙十七年六月初四日起至康
熙十九年七月暫止節次招撫到投誠官兵
共賞過銀一十二萬六千九百九十八兩六
錢內除三次各官捐助銀四萬八千四百二
十七兩五錢臣自捐過銀七萬八千五百七
十一兩一錢又捐賞鞍馬袍褂等項通共用
銀九千九百七十四兩四錢七分賞各官

數目各在案第目今

國用浩繁錢糧匱乏又值閩省荒旱百姓流離
困苦之際慘不忍聞卽合屬各官日擊時艱
見在撫綏賑救之不暇實難勉力捐輸無可
措給臣思父子荷蒙

皇上浩蕩特恩髮膚尚且不愛安敢遑惜身家臣
前所以頒立賞格極力招撫而海上不逞之
徒聞風向化接踵來歸者相率恐後矣閩海
幸已蕩平惟是投誠官兵顒望俸餉嗷嗷待
哺若不按月支給誠恐反側生心爲患匪細

業于協餉銀內通融措發目今綠旗官兵仰給月餉時刻難緩相應仰請補給還欸以清錢糧者也惟是臣先捐過銀七萬八千五百有奇又捐賞鞍馬袍褂等項用過銀九千九百有奇雖纖塵無裨于

高深而海賊投誠衆多使賊內外離心上下解體方能水陸奏功則招撫一節實有裨益所有捐過投誠銀兩數目備造清冊咨部察核外臣謹密疏具

題伏乞

皇上睿鑒施行

康熙十九年八月

日

閩頌滙編

[illegible]

設立駐防

題爲請照例設立駐防以節

國帑并定兵民分居疆界以甦民困事切照海賊敗遁臺灣根孽猶存况邊海重地反叛不常閩省必須滿師駐劄今康親王奉

命班師大兵撤回猶留滿師三千分鎮福州漳泉臣與撫臣再四商酌大兵來閩日久今駐之兵與前去之兵均一勞苦似宜俱行撤回更換永遠駐防之兵况留援勦大兵必須分外添給艸料當此

國用匱乏之際換設駐防則可省此一項錢糧
至大兵入閩之後兵民襍處民苦已甚今大
兵撤回所留之甲卽後日駐防之甲不過千
副若復另圈民房又是一番擾動查康親王
入閩住有藩下房屋今似應將藩下房屋凡
未經康親王大兵駐過者一間不許多住以
彰

皇上矜恤藩下官兵之心如藩下房屋凡已經康
親王大兵駐過者照數查出給兵以免百姓
重復出房給兵之苦如果查藩下房屋不足

兵住不得不下藩下房屋接連之處圈出民居若干給爲防閩大兵之屋如此則兵民疆界攸分無擾而

國帑可以稍節矣臣謹會同巡撫臣吳合

疏密

題伏乞

勅部議覆施行

康熙十九年八月

日

平海善後

題爲謹陳平海善後十策永奠海疆事康熙十九年四月初七日准兵部清字咨內開據總督福建部院姚 題前事等因康熙十九年三月初七日題于本月二十一日奉

旨議政王貝勒大臣會議具奏欽此欽遵該議政王臣等會議得據福建總督姚 疏稱臣等統兵水陸並進旣恢復海澄縣復連尅厦門金門兩島

皇上洪福齊天致使海氛屏跡然善後事宜不可

不詳加斟酌臣愚昧無知謹叅酌往事之得失審察今事之應行謹臚列十事冒瀆

聖聰垂察一大兵宜行盡撤等二件另議外查得
總督姚 條奏廈門等島沿海要地官兵

防守俟荷蘭國船到日滅海賊尅取臺灣會
同廣東官兵勦滅海賊劉國軒沿海仍舊展
界新增綠旗官兵陸續漸撤浙江調來官兵
應行撤回核議官兵給與俸餉等情關係最
重要應與總督姚 將軍官提督楊 巡

撫吳

水師提督萬

勅令會同將每件一一確議速奏再議俟

命下之日將總督姚

條奏八款俱錄出發與

該督將軍巡撫提督可也等因于康熙十九年三月二十二日具奏于本日奉

旨依議速行欽此欽遵抄出到部移咨到臣准此隨經臣備將清字咨文逐款譯出移咨巡撫臣吳將軍官提督臣楊水師提臣萬酌議示覆會

題各去後茲准撫提諸臣各議覆前來正在回

奏聞又奉

上差兵部侍郎溫 會同刑部尚書介 禮部侍

郎吳 昭武將軍管提督事楊 巡撫部

院吳 水師提督萬 并臣前往界外

逐一驗視緊要處所設兵鎮守業經兵部侍

郎溫 等會議具疏

題覆外惟是會議平海八款內有多經部臣會

議具題請

旨但臣等原奉詳議酌 題之案尚未

題覆相應補牘

題明仰請

睿裁勅部議覆遵行

一欵廈門金門急宜固守不可輕棄今經兵

部侍郎溫 刑部尚書介 禮部侍郎吳

昭武將軍官提督事楊 巡撫部院

吳 水師提督萬 併臣會議將廈

門金門設兵鎮守已經

題覆在案所有抽分膳兵應俟邊界定後再行

議覆

一欵沿海內外要汛各須分守以壯廈門聲

勢今經兵部侍郎溫 刑部尚書介 禮

部侍郎吳 等會議各汛俱分水陸官

兵鎮守澎湖南澳且不必守已經

題覆在案抽分膳兵應俟邊界定日再行議覆
一欸請

勅先勦粵寇莫使滋蔓再縱今查得銅山南澳已
經恢復平南將軍用臣捐船殺敗海寇今
潮惠已經蕩平無庸再議

一欸臺灣斷須次第攻取永使海波不揚此
欸在臣必欲親率舟師勦滅臺灣永除後
患以報

國恩今經兵部侍郎溫等會議俟沿邊設兵完備之後相機再議已經

題覆在案

一欵福建邊界急請開還今兵部侍郎溫

刑部尚書介禮部侍郎吳等議得

止還金門廈門銅山海壇四島遷地昭武

將軍楊巡撫部院吳水師提督萬

倂臣皆議邊界漸須還民已經兩議

具

題請

旨。在案。該臣等再議得復還邊界。乃今日救民裕國之良謀。且海汛地方。延袤遼濶。已經魚議設立水陸官兵防守。則所遷界外之地。已在官兵防守之內矣。其原舊界限。似應復還。遷民開墾。輸課不惟又可以沿海抽稅。膳養水兵。上可以足

國關疆而下。亦可救無告窮民於饑溺之中。又可將投誠官兵安插開墾。免費撥給月餉。矣。衆議僉同。特請

乾斷。勅議還界施行。

一欸新增綠旗官兵宜設法陸續漸撤不便
一時並裁致生意外今經兵部侍郎溫
等會議將水陸官兵議定裁數陸續裁去
免使兵單已經具

題在案

一欸浙江調來之兵應請先行撤回今查得
浙兵已經盡行撤回浙江今無庸議

一欸校誠官兵衆多急請撥餉安插以弭後
患臣等會議得校誠官兵爲數甚多然此
輩必須給以俸餉以資俯仰方安反側之

心故臣等將康熙十九年五月以前給過銀米會啓康親王

題覆撥餉見候部覆今議若不給以俸餉羈縻其身心勢必復逃山海爲賊海患復燃關係甚大不得不仰籲

皇上下沛

洪恩特賜

乾斷將未發俸餉乞賜全撥以弭邊患方爲萬全以上平海善後八款部覆奉

旨行臣會同將軍撫提諸臣確議速奏遵經逐款

備晰會議外臣謹會同巡撫臣吳昭武

將軍管提督事臣楊水師提督臣萬

合疏密

題緣係條議欵數事理字多踰格貼黃難盡伏

乞

皇上全覽勅部議覆施行

康熙十九年八月

日

安設要汛

題爲邊海要島等事康熙十九年八月二十二
日准兵部咨咨內開該議政王等會覆侍郎
溫等題前事康熙十九年七月十一日題
本月二十七日奉

旨議政王貝勒大臣會議具奏欽此該臣等會議
得侍郎溫等疏稱南澳係二省接壤之地
不便設立兵丁應將設立兵丁三千名之處
毋容議若南澳賊踞廣東福建二省兵馬會
合勦除銅山令一鎮標下兵三千名又副將

一員兵一千名鎮守海澄提督萬 親身

標下三營兵丁駐劄廈門令總兵一員標下

兵三千名提督萬 標下二營兵丁駐劄

金門海壇此二處總兵各一員兵三千名駐

劄閩安令副將一員兵二千名駐劄浯嶼圍

頭永寧日湖獺窟平海烽火門七處相應陸

兵水師酌調其相防守該總督將軍提督巡

撫提督等量撥官兵鎮守如賊寇大夥侵犯

該總督水陸提督巡撫等合力夾勦賊寇至

水師提督所管六處地方兵丁將何處官兵

鎮守何處之處聽伊等酌量而行至在銅山
廈門金門海壇田地百姓仍有耕種者准其
耕種納糧此耕種田地百姓并鎮守兵丁向
內來往行走者該管官詳加稽察兵民與賊
通同將禁物賣與賊寇者照依越界之例正
法該管官若行察獲呈報上司寬免其罪不
行查出被傍人出首將該管官治罪水師見
有二萬五千海澄廈門等六處設立二萬駐
劄外尚剩五營遊守千把兵五千名此官其
理應卽行裁去但臺灣尚未掃除各處俱用

防汛相應交與該督撫提將老弱逃故內停其募補裁兵一千名卽去一營之官再照缺少者補入至水師總兵四員副將二員某人鎮守某處之處該督撫水師提督等擬定報部之日換給

勅書等因查侍郎溫等親履沿海地方確看形勢與該督撫提等會議具題其廈門等處官兵駐防等事均應如其所題于銅山廈門金門海壇各設總兵官一員兵三千名鎮守閩安鎮以副將一員兵二千名銅山設副將一

員兵一千名今提督萬

統兵三千名駐

劉海澄將伊標下兵二千名協駐廈門此四

鎮二協水師俱聽提督萬

統轄其南澳

不必設兵如有賊踞閩粵二省會師勦滅至
于廈門等各島所有田地百姓願耕者聽其
耕種納糧其耕地之民戍守之兵向內地來
往行走聽該管官嚴行稽查如有不肖之徒
與賊通同貿易者將犯法人及汛守官兵俱
照越界之例重處至見在水師兵二萬五千
名應留兵二萬名其五千名亦如所題裁去

此應裁兵五千名將老弱者陸續查汰逃故之缺不准頂補兵減一千卽裁一營之官渚嶼等處地方作何設兵鎮守之處聽該督等酌量而行水師總兵等各官以某人鎮守某處該督提等公同詳定具題到日該部換給勅書可也等因康熙十九年八月初一日題本月初四日奉

旨依議欽此欽遵抄出到部移咨到臣准此隨咨移巡撫臣吳將軍管提督事臣楊水師提督臣萬酌議示覆會

題各去後于康熙十九年閏八月初七日准水
師提臣萬 咨開爲照銅山廈門金門海
壇等處悉係要島本提督調集四鎮營弁自
行闡定左鎮拈守海壇上至慈澳下至興化
界右鎮拈守銅山上至井尾下至南澳前鎮
拈守廈門後鎮拈守金門隨卽通行遵照與
閩安協轄兵二千防守原汛上至北茭下至
慈澳毋煩再議外至若烽火門上至沙埕下
至北茭議以閩安協右營兵一千守之平海
上至福清界下至惠安界議以遊擊章雲飛

兵一千守之日湖上至莽田界下至福全議
以晉江營兵一千守之圍頭上至福全下至
小嶝議以同安右營兵一千守之浯嶼上至
破竈下至井尾議以王朝俊兵一千守之銅
山副將一員議以興鎮中營兵一千與詹六
奇更換聽右鎮調度守之此水汛所宜本提
督酌量人地所當與貴部院詳加商確而七
處之陸汛則尤望貴部院之并賜咨示者也
等因到臣准此臣即于本月初七日復移咨
水師提督內開爲照分用四鎮固以貴提督

爲政然奉

命有聽該督提等公同詳定具

題到日該部換給之語則本部院自應與貴提督詳細商酌請教會議妥確然後會疏

題覆方爲至當況金廈銅山海壇四處有險易之不同四鎮中亦有謀勇之各別若不細商人地相宜卽以拈闡爲準恐日後貽誤封疆况崇武故事貴提鎮留中蚤已洞悉諸鎮優劣又不得不爲鰓鰓過計也自兵部侍郎溫宣解之後本部院無事不以和衷共濟爲

念諸事一遵鴻裁不肯與貴提督稍有異同
此本部院一片素心也惟此事尙煩貴提督
再爲確商賜覆施行等因咨移去後又于本
月十四日准水師提督萬 咨本月初十
日准貴部院咨開前事等因到提督准此爲
照分鎮邊疆自當公同詳定會疏具

題緣四島各係要處四鎮亦畧相當而彼此浮
議紛紜不一故本提督不揣狂愚令各拈闡
以示至公然後咨商貴部院酌量定奪茲准
大咨慮恐人地弗宜有悞封疆深思遠慮者

也合就咨覆爲此合咨貴部院請煩察照安
邊重務酌量定奪以便會

題汛撥分汛施行等因到臣准此爲照恢復廈
門金門彼時卽荷貴提督將右鎮陳龍撥守
金門左鎮林賢撥守廈門後鎮楊嘉瑞前鎮
黃鎬同守銅山此舉實屬人地相宜似應仍
照貴提督前議但銅山現以兩鎮防守海壇
地方尚缺官兵希貴提督酌裁或於黃鎬楊
嘉瑞二員分留一鎮守銅山一鎮汛守海壇
可也今就咨覆爲此合咨貴提督請煩察照

酌定示覆施行等因備移水師提督去後續
於本年閏八月二十三日准水師提臣萬

咨開本月十九日據援勦左鎮總兵官林
賢咨呈內稱本年閏八月十八日承准本提
督照會本月十七日准總督姚部院咨開爲
照恢復廈門金門彼時即荷貴提督將右鎮
陳龍撥守金門左鎮林賢撥守廈門後鎮楊
嘉瑞前鎮黃鎬撥守銅山此舉實屬人地相
宜似應仍照貴提督前議但銅山現以兩鎮
防守海壇地方尚缺官兵希貴提督酌裁或

於黃鎬楊嘉瑞二員分留一鎮守銅山一鎮
汛守海壇可也合就咨達請煩察照酌定示
覆施行等因到提督准此擬合就符照會到
職照依事理即便仍照原汛鎮守施行等因
承准此該本職看得本年三月內邊島勦復
各標官兵船隻會泊廈門彼時議守未定本
提督暫撥四鎮分泊以資防禦續有汛守四
島之

旨查本職于康熙十七年六月內巡撫吳部院委
職開該營制時因泉圖急迫奸宄易生所招

轄下官兵多屬福清長樂連江人氏本提督以職標人地相宜派令鎮守海壇洵爲封疆至公起見將士樂從且廈門現在本提督威靈彈壓而金門銅山左右聲援綦布亦云周密合聽本提督酌定咨覆也爲此備由咨呈伏祈察奪施行等情到提督據此爲照邊疆設鎮貴審人地之宜茲廈金兩島雖夙係賊巢而海壇勢處上流久爲賊險銅山地連南澳亦屬賊衝長城鎖鑰悉藉雄材援勦左右二鎮汛防於此實爲不爽至於金門廈門呼

吸可通本提督雖駐劄海澄而時常往來廈門共相彈壓則前後二鎮亦無可虞人地之宜似無過此者但恐浮議不一故竊倣掣簽之例使各拈闔以示至公緣准大谷隨即俯聽裁撥照會該鎮仍舊汛防而該鎮闡分已定將士樂從咨呈本提督則因所樂之心以成至公之令似亦難爲更議者本提督忝典水師邊疆之寄所宜慎重寧敢孟浪付託以自貽伊戚致厓台慮乎等因到臣准此又于本年閏八月二十一日准巡撫臣吳

前事內開爲照分守各汛機宜備繹大咨見
實部院籌畫調度精詳但右鎮陳龍分守金
門左鎮林賢分守廈門後鎮楊嘉瑞前鎮黃
鎬同守銅山似係初抵廈時所分之地近因
會議准有水師提督萬 咨開調集四鎮
自行闡定左鎮拈守海壇上至慈澳下至興
化界右鎮拈守銅山上至井尾下至南澳前
鎮守廈門後鎮拈守金門隨即通行遵照在
案查今貴部院咨內所開仍屬初分地界是
否應照今次水師提督萬 咨內所議倘

貴部院別有卓見或令四鎮確分一定之汛庶無彼此參差而責成攸專矣事關守禦邊疆重大伏候貴部院與水師提督議相符一酌定處所會疏具

題可也計咨回會題稿一本寫題稿一本等因准此臣復咨撫臣內開安設四鎮官兵本部院原無別有卓見卽以右鎮陳龍守金門左鎮林賢守廈門後鎮楊嘉瑞前鎮黃鎬分守銅山海壇亦非本部院另立一意乃悉照水師提督前議仍聽水師提督爲政者也茲接

大谷以水師提督闡定左鎮守海壇右鎮守
銅山前鎮守廈門後鎮守金門通行遵照在
案而本部院有彼此參差之議但此番安設
官兵須會議周詳人地相宜方保無虞且事
關守禦邊疆重大似未可以草草闡定冒昧
會

題在本部院仍照水師提督前議者以金門廈
門實與銅山更爲險要陳龍林賢又四鎮中
最爲能將金廈二區費

朝廷數百萬金錢費大兵多少性命全荷

朝廷洪福恢復此地焉敢不擇能將把守爲盤石
之計乎查水師提督前分鎮守實爲公明至
當終始可以無有疑議今番闡拈實不若前
議之萬全故不敢從水師提督之後議而從
水師提督之前議者在本部院虛心衡度而
後出此非敢故爲異同另立偏見也況奉有
着該督撫提公同詳定具

題則貴部院與本部院均可參酌末議以爲疆
圉之計似未可以一闡定之也應否以水師
提督爲一議本部院另爲一議貴部院酌其

可否或同一議或兩議一併具

題請

旨庶于封疆有裨而本部院亦可免專擅之愆矣
去後臣于本月二十四日復移咨水師提督
內開爲照安設四鎮官兵本部院原無別見
卽以右鎮陳龍守金門左鎮林賢守廈門後
鎮楊嘉瑞前鎮黃鎬分守銅山海壇亦非本
部院另立一意仍悉照貴提督前議仍聽貴
提督爲政者也茲接大咨因所樂之心以成
至公之令但安設官兵守禦邊疆貴在人地

相宜似未可聽其私心之便草草闡定冒昧
會

題在本部院仍照貴提督前議者以金門廈門
實與海壇銅山更爲險要陳龍林賢文四鎮
中最爲能將金厦二區費

朝廷數百萬金錢費大兵多少性命全荷

朝廷洪福恢復此地焉敢不擇能將把守爲盤石
之計乎前貴提督分鎮汛守實爲公明至當
始終可以無有疑議今畚闢枯實不若前議
之萬全故不敢從貴提督之後議而從貴提

督之前議者在本部院虛心衡度而後出此
非敢故爲異同另立偏見也況奉有着該督
撫提公同詳定具

題則本部院忝有疆圉之寄似未敢以一闡定
之也應否以貴提督爲一議本部院另爲一
議兩議一併具

題請

古定奪庶于封疆有裨而本部院亦可免無罪矣
等因備移水師提督去後續於九月初三日
准水師提督咨覆內開爲照沿邊設鎮貴度

人地海壇勢據上風爲福興要地又與厦金
相去懸隔設若賊寇窺伺逆風敲戢以相夾
剿則鞭長莫及故必選擇能將自爲操縱始
可無虞查左鎮林總兵夙嫻水戰康熙十七
年巡撫部院吳 嘗委以總統水師之任
歷著戰功故本提督細加審量竊謂該鎮處
此爲不爽也至右鎮則仍汛金門前鎮則仍
汛銅山後鎮移汛厦門而本提督駐劄海澄
仍以時來往厦門共相彈壓盤石之計實爲
萬全等因准此又准
巡撫臣吳

咨開四鎮分汛海疆事屬貴部院主稿定議
自無不籌畫周詳本部院前接繹大稿因止
見分地一如前議未載有 水師提督後咨
情由遂不知有未可以一闡爲定之故是以
再具咨商有應否符一之請今奉貴部院大
咨遽欲與水師提督各爲一議以本部院管
見此案原係奉

旨公同詳定不過期於人地相宜非如他事之可
以存兩議者比矧水師提督之闡拈乃決諸
無心嘿定之天貴部院之酌分乃義歸因材

而使之正皆由於至公無我究竟須議歸合
一相應請貴部院將今番闡拈不如前議萬
全緣由移明水師提督諒必不以成見是執
而或疑四鎮之難於適從即會同面加確商
自無有不愉快而交孚者也等因到臣准此
又准昭武將軍管提督事臣楊 咨前事
內開爲照浯嶼圍頭永寧日湖獺窟平海烽
火門七處侍郎溫 原疏

題令陸兵水師酌調共相防守內查浯嶼烽火
門二汛乃係海中島嶼巡防勢須船隻方克

有濟在陸營官兵既無舟楫難以飛渡應聽
水師專防似不必撥發陸兵協防外如圍頭
一汛與東石形勢毗連本將軍近經咨請貴
部院將江東橋左營遊擊鄭興調令帶領該
營官兵駐防東石在案今應就遊擊鄭興所
帶防守東石官兵之內着令撥出四百名分
防圍頭彼此互相聲援殊爲妥當其永寧一
汛擬調雲霄營新增守備賴益桐帶領增設
兵丁五百名駐守日湖擬令泉州城守營撥
兵汛防查該汛咫尺汪洋大海與內地隔離

頗遠若多派官兵出防便當建築寨城又多
費一番民力惟着令該管酌量撥兵瞭探巡
防可耳至于獺窟一汛查與洛陽營形勢相
連本年五月二十一日爲移會事一案經本
將軍咨議着令洛陽營守備帶兵出防獺窟
等因在案今似應照舊議行令該管或守備
或千總一員帶日兵三百名前往該汛防守
遇有警息該管將官帶兵聲援其平海乃興
化府所轄應就興化撥兵出防但查興化鎮
標三營內中左二營係屬水師右營官兵

千名分守沿邊錦墩後架白沙一帶尙恐兵力不敷實難再撥城守一營除守城分汛并撥防仙遊之外亦無多餘之兵今似當調令漳浦營增設守備侯世裔帶領所增兵丁五百名前往防守此陸兵派防事宜管見末議是否有當惟祈願畫酌定可也若厦金銅山海壇等處水師總兵各員以某人鎮守某處此屬水師機宜諒貴部院宏謨遠畧蚤有定見或移咨水師提督萬再少加酌妥分布鎮守

題覆可也今准前因合就咨覆爲此備咨貴部
院請煩察照酌奪主稿

題覆仍祈示覆施行等因各移咨到臣准此該
臣會看得水師額兵二萬五千名業經兵部
侍郎臣溫 所題酌留二萬名分撥銅山海
澄廈門金門海壇閩安六處分防汛守尚剩
官兵五千名理應卽行裁去議以臺灣尚未
掃除各處須防汛守將老弱逃故停其募補
裁兵一千名卽去一營之官况地方初定海
濶汛廣水兵未易裁汰更浯嶼圍頭永寧等

七處令臣等酌量地方設立防汛茲准撫臣
及水陸二提臣各議覆前來臣集衆議會商
謹列各汛一浯嶼水師提臣議以浯嶼上至
破龜下至井尾以遊擊王朝俊帶兵一千名
防守今會議得如水師提臣所議發王朝俊
兵一千名守之一圍頭原議應于同安鎮內
撥出陸兵二千名移出守之續准水師提臣
以同安右營兵一千名分巡臣等會議得圍
頭水兵應如水師提臣所議用同安城守右
營水兵一千名配船巡防但水師已經設兵

一千名則同安鎮不必撥兵二千名應令同
安鎮再撥兵一千名駐劄圍頭分守東石上
至福全下至石井巡防可也一永寧日湖原
議以晉江營水師一千名防守水師提臣以
日湖上至莆田之界下至福全之界擬以晉
江營兵一千守之今臣等會議得日湖永寧
俱係晉江所轄應如水師提臣所議令晉江
營兵一千名守之一獺窟原議將洛陽橋營
兵八百名移出守之陸路提臣以獺窟與洛
陽形勢相連照前議行令該營或守備或千

總帶兵防守今臣等會議得獺窟崇武係泉州府所轄陸路可通應如陸路提臣所議仍令洛陽橋遊擊帶兵六百名守之留守備一員帶兵二百名守洛陽橋上至平海塘汛交界下至晉江營汛交界一平海原議以新設興化楓亭營陸兵移出守之水師提臣以平海上至福清交界下至惠安交界議發遊擊章雲飛帶兵一千名今會議得平海衛係興化府所轄陸路可通其水師應如水師提臣所議令章雲飛帶興化水師一千名巡防其

陸路應仍令楓亭遊擊帶兵七百名守之留
守備一員帶兵三百名防守楓亭可也一烽
火門水師提臣以烽火門上至沙埕下至北
茭以閩安右營兵一千守之今會議得烽火
門水師提臣議以閩安右營兵一千名守之
應如水師提臣所議巡防可也其銅山副將
既屬水師統轄今准水師提臣議令興化中
營兵一千名與江東橋副將詹六奇兵一千
名輪班更換今查江東橋陸兵三千名現今
議裁無可輪換應如水師提臣所議將興化

中營兵二千名原遊擊一員帶兵防守銅山
可也但兵一千名不必設立副將况現在興
化中營原係遊擊應仍以遊擊管銅山城守
事務查金門廈門銅山海壇四鎮大師恢復
之後今准水師提臣所議沿邊設鎮貴度人
地海壇勢據上風爲福興要地又與厦金相
去懸隔設若賊寇窺伺逆風敲戢以相夾勦
則鞭長莫及故必選擇能將自爲操縱始可
無虞查左鎮林賢夙嫻水戰康熙十七年巡
撫臣吳 嘗委以總統水師之任歷著戰

功細加審量謂該鎮處此似爲不爽也右鎮
陳龍仍守金門前鎮黃鎬仍守銅山後鎮楊
嘉瑞仍守廈門而水師提臣駐劄海澄仍以
時來往廈門其相彈壓磐石之計實爲萬全
今臣等會議得安設四鎮亦應如水師提督
分防者也但鎮海衛獨出海中最爲險要陸
路可通前議未及今應令漳浦鎮發兵一千
名守之其石碼三叉河已屬內地向係海澄
鎮汛地今海澄鎮經臣

題請改爲漳州鎮應令漳州鎮發兵防守相應

一併

題明臣謹會同巡撫臣吳 昭武將軍營提

督事臣楊 水師提督臣萬 合疏密

題緣係安設要汛事理字多逾格貼黃難盡查

部咨內註語未經全叙合併聲明伏乞

皇上睿鑒全覽

勅部議覆施行

康熙十九年九月

初六

日

閩頌滙編

閩頌滙編

[illegible]

請還邊界

題爲請

旨事康熙十九年八月二十二日准兵部密咨內
開該議政王等會覆侍郎溫等題前事等
因康熙十九年七月十一日題本月二十七
日奉

旨議政王貝勒大臣會議具奏欽此該臣等會議
得侍郎溫等疏稱前議先經未設有邊界
時海逆鄭成功盤踞廈門金門等處恣意搶
掠後設立邊界遷移百姓賊勢漸衰陸續大

半投誠餘剩賊寇我兵進征卽棄廈門等處
逃遁臺灣耿精忠反叛復行平定之時將叛
時越界百姓未經遷移以致賊寇鄭經仍踞
廈門等處任意妄行續後因叛時越界居住
百姓收入內界賊勢又衰我兵一進鄭經等
敗遁臺灣澎湖遷界二十餘年且賊寇敗遁
未久今不便開界仍照順治十八年例將界
嚴禁或賊投誠盡淨或賊萬不得來之日該
督等開界之處議題後議今界外之廈門金
門等處已經設立水陸官兵防守則所遷界

外之地已在內地應復還還民開墾輸課但恐奸民透越止准無篷桅平底小船沿邊採捕除水師官兵船隻外其一切有篷桅船隻相應折毀如違卽照定例處分等因查侍郎溫等旣稱賊寇敗遁未久不便開界等語應照前議將邊界仍令嚴禁今海內廈門金門等要地俱設官兵駐劄俟官兵俱各安設完畢之時如開界無有妨碍可以移令百姓照舊墾種聽該督撫等公議具題請

旨可也等因康熙十九年八月初一日題本月初

五日奉

旨依議著俟廈門金門等處安設官兵完畢如果
地方無虞將應開界之處該督撫提督等具
題請旨欽此密封到部移咨到臣准此遵即
咨移巡撫臣吳 將軍管提督事臣楊
水師提督臣萬 酌議示覆會

題各去後今准撫臣吳 咨爲散陳平海善

後十策永奠海疆事內開案准貴部院移送
會疏稿內開福建邊界急請開還今兵部侍
郎溫 刑部尚書介 禮部侍郎吳 等

議得止還金門廈門銅山海壇四島遷地昭
武將軍楊 巡撫部院吳 水師提督萬
併臣皆議邊界斷須還民已經兩議具
題請

旨立案該臣等再議得復還遷界乃今日救民裕
國之良謀且海汛地方延袤遼濶已經僉議設
立水陸官兵防守則所遷界外之地已在官
兵防守之內矣其原舊界限似應復還遷民
開墾輸課不惟沿海抽稅膳養水兵上可以
足

國闢疆而下可以救無告窮民于饑溺之中又可將投誠官兵安插開墾免費撥給月餉矣衆議僉同特請

乾斷勅議還界施行于康熙十九年八月二十三日奉

旨議政王貝勒大臣會議具奏欽此于本年閏八月十四日准兵部咨前事內開該臣等會議得海界急請開還之處亦據侍郎溫等兩議具題臣等會覆奉

旨依議着俟廈門金門等處安設官兵完畢如果

地方無虞將應開界之處該督撫提督等具
題請旨欽此已經行文相應將該督所請海
界開還之處現今亦無容議等因奉

旨依議欽此移咨到部院已經備移貴部院查照
在案爲照展復舊界一議誠貴部院爲國爲
民至計現今邊海要地已經酌定水師鎮營
官兵分布扼守外防旣設內禁宜開蚤展一
日之界非特流離失業殘黎得蚤沾一日之
恩卽投誠解散之衆亦蚤安插得所

國計民生實兩有攸賴匪淺至于土田墾而賦

稅增窮民安而盜賊息變一二千里之荒蕪
爲任土作貢之樂地其利益不可殫述皆貴
部院宏籌碩議之所蚤及者伏祈察照原疏
迅賜定議主稿挈銜會

題本部院不啻延領以俟也等因准此又准昭
武將軍咨內開爲照開復邊界裕賦稅而甦
殘黎貴部院暨撫部院爲

國恤民至意但事關邊防大計本將軍已經奉
旨復任江南邇來凡有部文俱填發新任提督則
本將軍于閩省之事似不便越俎擅議應候

貴部院碩畫主持可耳等因准此又准水師提督萬 咨開爲照復界一議裕

國安民且可安插投誠誠今日之急着者貴部院與撫部院及本提督蚤有同心今官兵設防已定亟宜舉行本提督舊疾復作再懇休致恐卸事在即有應言而不及言者條陳內一疏爲沿海邊界亟宜開復事于本月十八日繕疏拜發去後今准大咨詞意懇切深見碩畫本提督自愧粗庸詞不達意尤藉貴部院主稿挈銜迅爲具

題以永奠海疆者也等因到臣准此該臣看得
閩省邊界宜還一事臣等前疏已備言之矣
因奉有候廈門金門等處安設官兵完畢如
果地方無虞將應開界之處該督撫提督等
具題請旨之

旨臣等遵奉會議逐一安設

題覆在案星羅棋布數月來仰仗

皇上威靈漸見海波不揚矣此時正宜臣等遵

旨請還海界之日也况賊遁臺灣而遷民之爲盜
猶有相隨而去者實因遷界無地可耕故不

得不隨波逐流耳今日臺灣逃歸之衆咸稱
人人皆望回鄉止因邊界嚴切歸恐無地即
今投誠數千之官數萬之兵臣等備極委曲
安插之法而尙多未盡者總因無伍可入無
地可耕耳若一還邊界則上可以增

國課下可以遂民生併可以收魚鹽之利以餉
新兵安投誠之兵永無反側遠可以使臺灣
之衆望風來歸近可以使春夏之交米不騰
貴是還界一事實今日閩省第一要務也况
時已歲暮春耕屆期若再差池眼見又悞一

年矣臣等受

國厚恩見真知切不敢隱諱臣謹會同巡撫臣
吳 昭武將軍管提督事楊 水師提督
臣萬 合疏密

題伏乞

皇上勅部議覆施行

康熙十九年十一月

初四

日

閩頌滙編

[illegible]

繳還砲位

題爲第十二本爲

請發西洋砲位以資攻擊事康熙十八年八月十七日准兵部密咨內開該議政王等會覆福督姚題前事等因康熙十八年七月初一日題本月二十二日奉

旨已有旨了欽此密封到部該臣等會議得福督姚疏稱切今海寇與我師對壘連營數十里晝夜用砲攻擊

朝廷新鑄西洋砲甚是輕便止用八人十人即可

擡行伏乞

皇上恩賞西泮砲十位俾臣得以効力疆場蚤遂
平海之志等因查該督姚 旣稱西泮砲
準體輕而能擊賊賞給十位蚤遂平海之志
等語此紅衣砲係在內鑄造應交與湖廣巡
撫張 將湖廣所有西泮砲十位砲子式
樣一併委賢能官員作速遞送江西江西巡
撫委賢能官交送總督姚 仍將起程日
期報部可也等因康熙十八年七月二十八
日題八月初一日奉

旨這西洋砲著發與二十位餘依議欽此密封到
部密咨到臣欽遵外該臣看得福建一省山
多水廣原與北地平川曠野不同南方地勢
率多依山阻海島道崎嶇與賊爭尺寸也遇
此高下灣轉崎嶇之地或在上臨下或以下
攻上或出奇設伏或乘虛搗險其間皆利用
步兵必用大砲進則可攻退則可守故先海
寇披猖臣已

請西洋砲十位蒙

皇恩賜給二十位臣於賊營要口設築砲臺將西

洋砲請上緊對賊營攻打賊衆受傷實多今
逆孽逃竄臺灣海波不揚皆仰仗

皇上聖筭威靈赫濯閩疆底定所有前

請西洋砲位例應繳還但此砲原從湖廣遞交至

閩今楚省已定應否解京解楚相應請

旨臣謹密疏具

題伏乞

勅部議覆施行

康熙十九年十一月十七日

閩頌滙編

[illegible]

請卹用間忠魂

題爲泣陳伯父捐驅矢報懇乞垂憐

題卹以慰忠魂事康熙十九年七月十六日准
兵部密咨內開職方清吏司案呈奉本部送
密封內該本部覆福督姚 題前事等因
康熙十九年四月二十一日題五月十二日
奉

旨該部議奏欽此密封到部該臣等議得福督姚
疏稱康親王劄授副將施齊卽施世澤
出師海澄城陷被執與賊授總兵族兄施亥

卽施明良謀擒鄭逆假心事賊真心爲國不
料事露被拿磔殺弁吏男施馨施偉全家沉
死在海施齊施亥雖失身海上忠義難泯題
請優卹等因查該督雖稱施齊施亥謀擒鄭
逆事露磔殺全家沉死在海等語但施齊等
俱授海賊僞職今不便據家人一語爲憑遽
議相應行令該督俟剿滅海賊之日將施齊
等被殺情由詳加查明具題再議可也等因
康熙十九年六月初五日題本月初七日奉
旨依議欽此密封到部送司案呈到部移咨到臣

准此遵卽咨移巡撫部院具 昭武將軍

管提督事楊 并照會同安鎮及行同安縣

與投誠候補總兵官陳昌等各確查去後今

准巡撫部院具 咨開爲報

國之慘已極優

卹之典未昭再詳具始末伏乞迅咨

題明等事開准寧海將軍都統喇 叅贊刑

部尙書介 署理福建將軍叅贊禮部侍郎

吳 咨前事內開據施士軒呈稱伊父世

澤緣隨提督段 從征海澄致陷賊手貞

誠不泯矢志滅賊自奉將軍老爺密諭遂與
族伯僞援勦前鎮施亥舍郎明良及族叔僞
副將施琦施廷輔海澄被陷田香五僞僉事
道王捷僞都事施典國等歃血私室密圖獻
逆不意被書辦呂運首發事露兩家七十三
口盡被磔殺士軒聞報心裂業經具呈將軍
老爺併族叔施琦等被獲殺脫歸誠亦經稟
報在案蒙面諭卽爲移咨督撫提具

題士軒私心自揣從此生死沾恩存歿感戴先
蒙總督老爺垂察圖逆孤魂死國異慘密疏

具

題而內部尚以家人一語難憑另行查覆此誠
內部持重士軒何甘隱忍而不碎首再爲披
瀝切父世澤失身海島報効末由得遂臣子
之私獲全忠孝之名論當日情節豫通信息
授以秘計者將軍老爺也畫謀計策引見關
通者隨征知府王麟通判蔡搏萬副將王振
勲也冒險下海密賚令諭往授伯父者則有
施良辰也伯父先差僞道來投見將軍商畧
機宜者則有王捷施典國也被獲殺脫輸誠

標下則有副將施琦施廷輔也逆賊懼遁身
膏斧鉞滿漢官兵聞者心傷海上僞黨見者
慘目豈特家人一語此皆將軍老爺身爲目
擊之事乃竟以軍務倥傯未蒙

題卹是忘滅賊之本根沒靖海之先謀致蒙部
駁

卹典久懸使父世澤及伯明良舉家七十三口
拋屍巨浪號冤海底似非所以表旣往而勵
將來伏乞俯念草野血誠闔家殉節電察始
末迅容

題明不特忠魂獲見天日卽臺灣餘孽亦望風
踵至矣等情前來據此案照先爲泣陳報
國情由事本年三月初三日據副將施琦等稟
稱琦等闔家頂戴

朝廷洪恩所以姪世澤明良等雖脅從在海無不
陰謀以圖報稱迨奉將軍密諭遂陰謀各鎮
營翼陽啓設造烟墩欲圖內外夾殺擒獻鄭
經于

闕下不意劉國軒偵知密啓後又林文口傳鄭經
尚未深信于十八日抽兵三千排列街巷前

後園房勒揪下船令往臺灣二十三日不料
明良書辦家人呂運具芳葉任新等不願跟
隨過海將情出首登時就船搜出各位老爺
扎諭遂于二十三日夜立將世澤明良等兩
家七十餘口盡行砍殺下水琦等聞知率兵
殺脫至于同謀將弁立即陰散從來報國未
有此慘理合揮淚泣陳伏乞老爺察奪庶忠
魂無憾臣子知勸等情到本將軍據此案據
隨征知府王麟通判蔡搏萬同稟稱僞援勦
前鎮總兵施明良有謀擒逆魁反正報國之

意密令伊兄施辰良前來請給憑據等情本
將軍隨發綾書內開足下識時俊傑必有勲
猷以自表見所以屈身海島決非素心實迫
于時勢萬不得已耳來使到備悉高懷知足
下有去逆効順之心深樂虛左以待果能從
中幹旋蚤立不世奇勲我

朝廷報功之典原有成規自當力疏推引裂土分
茅以上公之爵相待願足下乘機決計自有
勝籌以相接應毋懷猶豫也翹企等語密交
知府王麟等轉發去後續據王麟等繳到僞

總兵施明良回稟稱明良朽樗棄材淪落海隅每同功第世澤深懷

朝廷鴻恩蚤有歸輸之志茲奉將軍德諭益以捐軀爲期第事非苟且一時難就明良已屯兵集美吳潛爲明良知契吳國俊素有報

國之心仰冀鑒宥容良設法徐圖以報不次之恩等情在案本將軍撫其前後通信情由具見僞總兵施明良雖失身賊穴而惓惓不忘朝廷希圖盡傾賊巢反手歸正已足覘其忠誠矣茲擬投誠副將施琦等稟稱明良及伊弟世

澤謀擒逆經被首事露兩家七十餘口盡遭
賊害則其始終陰謀以致闔家殉難事敗身
亡尤堪憫卹第我

朝褒義勸忠原有成典矧現今賊島雖平而餘黨
游魂尚泊外海正宜闡幽忠以示鼓勵如明
良等之抱義遭慘應否表彰合咨督部院請
煩查照希將施明良等懷忠死義緣由查明
確實或應優加卹典卽爲

題請以慰忠魂以昭激勸施行等因咨會督部
院查明題卹間續爲泣陳父親捐軀矢報等

事本年三月初四日攄施士軒呈稱祖鑲黃旗伯原任水師提督施 叨受

國恩父施齊舍矢志忠孝緣從前任提督段

死守海澄城陷被執父抱忠矢死隱忍蓄謀屢奉將軍密諭與伯施亥舍密圖大事將擒鄭逆獻廈門以報

本朝不幸被左右呂運首發其謀二月十八日父齊舍及伯亥舍被鄭逆擒拿囚禁金門蓼羅地方至二十三日未時父與亥舍俱被磔殺極慘前後家人洪辰黃志李巧從廈門逃回

奔報軒功伯提標隨征副將施韶經稟報昭
武將軍提督楊 在案痛父一劍從戎陷賊
忍死抱忠密謀事洩被殺雖大計弗就未遂
吞賊之心而殺身成仁已畢報

國之事獨念俠骨飄棄于海流忠魂托哀于杜
宇死者未慰生者何安謹瀝情泣陳伏乞憐
死忠之慘嘉報

國之誠恩賜

題卹父九原感且不朽等情據此查施士軒呈
稱伊父施齊舍同伊伯施亥舍謀擒逆經事

露被殺緣由具見施齊舍同謀報

國殉忠死義均足嘉憫隨經備叙前由咨會貴
部院會

題去後及貴部院作何具

題未准咨明本將軍亦無由逆知茲據施士軒
呈稱部駁緣由瀝陳始末懇爲咨會

題覆本將軍竊念明良世澤等孤忠遭慘歷有
確據且經親給密諭往返通信備知始終情
節若不再爲據實咨明會

題請卹似非所以闡幽忠而昭激勸也合就咨

會請煩查照希將明良世澤等懷忠死義緣
由查明確實

題覆以彰卹典以慰忠魂施行等因到部院准
此相應咨達爲此合咨貴部院請煩查照會
題等因到臣准此又准昭武將軍管提督事楊
咨前事內開准貴部院咨開施齊施亥等
當日在于廈門賊中被殺事故情由茲准部
咨詳加查明具

題等因請煩察照迅賜查覆以憑會

題等因到將軍准此隨經檄行中軍叅將馬勝

詳加確查俟其詳覆到日另覆外合先咨覆等因到臣又據同安鎮總兵官王英咨呈前事內開該卑職查得康熙十九年正月內奉部院密諭有偽援勦前鎮總兵施亥即施明良原親王劄授副將施齊即施世澤二人雖脅授偽職立心圖間報

國令本職密差前往宣諭因訪有施亥舊人林易即密遣前往開諭隨據林易回稟施亥說機務重事不便紙筆來往倘有洩漏身命不保現有胞姪應元在同安可令其速來面商

隨密令伊姪外委隨征都司施應元前去偵探迨至十九年二月初一日據應元回稟叔施亥等謀擒鄭逆欲建立大功以報

朝廷求請旗號候期舉事本職時卽隨帶施應元密稟本部院復奉憲令又遣應元前去約期隨據應元回稟訂在省城船到賊必發兵出救乘其空虛密糾同志擒獲鄭逆歸命永清逆孽茲據施齊家人黃志洪辰李巧從廈門逃回據稱機事不密被書辦呂運出首于二月二十三日施齊施亥全家俱被擒殺蓼羅

等語此本職當日奉諭密差施應元招撫之情由及施亥施齊等被殺之事故也至查當日在廈門賊中今來投誠各官則有總兵陳昌備悉此中始末現在憲轅就近行查取具確結而施亥施齊之殉忠自有明據可邀憲鑒覆

題卹叙者也等緣由到臣據此又據隨征候補總兵官左都督陳昌咨呈前事內開奉總督部院姚 照會開施亥施齊等當日是否假心事賊謀擒鄭逆事露被殺情由該總兵

在於廈門時係親信重鎮必知詳細立即據實逐一聲說明白具文回報以憑具

題卹叙施行等因計粘抄原疏一紙到卑職奉此該卑職細查當日施世澤自海澄陷城被執下海吞啞避時對職則出忠憤之言密圖滅敵矢志報

國洵非朝夕矣迨康熙十九年二月初一日據施明良胞侄施應元冒險密到陳洲營盤對職備稱叔施世澤施明良施琦等奉總督部院密諭誓約擒逆令應元先在同安王總鎮

處請兵進援併望聲應等語至本月十九日
又據施明良轄下中軍僞副將施琦到營密
稟同謀擒逆被人出首今世澤等被擒等語
該職一面整棚一面差探確息不料于本月
二十三日果報施世澤等係在蓼羅被殺揆
厥情由是世澤明良等先以謀擒報

國繼而洩事捐軀此皆海上投誠各官所共見
知者也況職當日在海受僞職時見海賊雖
因憲臺總統水陸官兵齊時并進勢大難當
而亦因施世澤等供出同謀共擒鄭經之人

皆係鄭經左右親隨之人以致鄭經倉忙奔
逃將古器金玉等物不及搬移下船放火自
焚不可謂非施世澤等之功也職等在海目
擊不敢不爲申明施應元施琦等與事同謀
忠誠可念併當據實開報仰聽憲恩隨附其
結呈繳以便

題叙等因又據投誠隨征候補僉事道黃性震
隨征總兵張勝羅士鈐副總兵方卻陳世林
柱康王郭華副將莊澤柯錄等各結狀呈報
到臣據此該臣看得施齊舍即施世澤奉康

親王劄授隨征副將施亥舍即施明良授援
勦前鎮僞總兵因世澤海澄城陷被執與其
族兄施亥隱忍蓄謀密圖舉事不料呂運出
首被賊擒拿在金門蓼羅地方磔殺全家沉
死在海情慘實甚經臣會疏

題明請卹在案茲准部議行臣勦滅海賊之日
將施齊被殺情由詳加查明具題等因遵即
移行詳查去後續准巡撫臣吳 寧海將
軍喇 參贊刑部尚書介 署理將軍禮
部侍郎吳 會咨查照煩請題

卹等因前來又據同安鎮總兵王英新投誠候
補總兵陳昌咨呈咸稱奉臣密諭誓約擒逆
令伊姪施應元請兵進援以至事洩被殺情
由及隨征候補投誠各官黃性震張勝等各
具甘結呈報到臣是施齊等謀擒被殺已經
萬耳萬目昭著天壤歷歷可憑實非止家人
一語而已也此雖謀擒之功未遂而鄭經因
之內變內外夾攻賊衆奔走金厦全收揆厥
所由二人之功似不可泯茲准巡撫將軍叅
贊大臣會咨及同安總兵咨呈并海上新投

誠各總兵各具并結前來相應

題請從優卹獎以闡忠魂臣謹會同巡撫臣吳
昭武將軍管提督事臣楊 合疏

題伏乞

勅部議覆施行

康熙十九年十二月

二十二

日

閩頌滙編

[illegible]

密探臺灣

題爲報明事康熙二十年四月二十一日辰時
據舉人先用知縣黃金從呈繳僞官傳爲霖
密稟內開稱修來固在耀德進取尤貴乘時
閩海用兵三十餘年良由勦撫無定局故蔓
延至今制臺文武宏才德威懋著奚難削平
爲霖雲霓望切不揣謬陳管見以資採擇鄭
人正月十八日丑時病故三十日縊死其長
子監國以非的派故也二月初一日立秦舍
年十二乃馮侍衛之婿其叔耽舍攝政陳馮

互相爭權劉擁重兵主外叔侄相情文武解
體政出多門各懷觀望若將現在舟師直抵
澎湖彼必盡掃境內兵屬劉拒守主幼國虛
內亂必萌內外交并無不立潰時乎時乎不
可失也等情到臣等又本年四月二十四日
據漳州府龍溪縣送到僞官廖康方稟稱方
于康熙十三年春遇耿王變亂無奈遂迫協
入僞留守內幕潛身前歲冬授僞總制坐營
中軍職銜去歲春故鄉版圖幸歸

本朝康方隨即告歸不意僞藩禁海又被淹延至

今僞藩于正月二十五夜中風不語至二十
八夜丑時身故長子僞監國以非僞藩血脉
係僞藩之母并僞藩之弟其廢不願交印遂
被絞死亦于三十夜絕氣至二月初一日即
立僞藩次子鄭秦年方十二歲又係僞藩之
弟鄭聰攝政二月二十五日始准開港康方
係二十八日開船由粵海而來三月初十日
到十字門船上剃頭十一日曉香山灣登岸
十三日到香山縣步行脚傷在店十八日始
下渡船到廣東省城由石龍老龍長樂三河

坦平和縣一路而來此四月十九日到漳賊
勢內亂機實可乘速懇發兵救民水火等情
到臣等據此該臣會看得鄭逆竄伏臺灣飄
突靡常是臺灣不滅三省海患終未除也今
擬舉人黃金從繳到偽官傳爲霖密稟禮單
三紙差來家丁楊申又有從臺灣逃回偽官
廖康方呈冊俱與臣等密探相符是鄭經已
伏冥誅長子縊死僞馮侍衛自立其婿乃
天亡海逆之時也但事關重大臣等刻期單騎齊
赴泉州并集水陸各鎮總兵官公同會商竊

謂兵家之要不外勦撫兩端茲水師船隻現在鳩工修理所有官兵現在按期操演一面先遣能員開示禍福多方招撫若復冥然不顧則散遣間諜離其腹心會合水陸官兵審機乘便直搗巢穴庶幾再藉

國威廓清外島亦可永奠閩方于衽席之安矣但臺灣孤懸海外處處皆險統師遠勦時地難測非臣等所敢擅定也除家丁楊申僞官廖康方交發龍溪縣看守禮物貯庫僞稟禮單呈冊地圖一并咨部查核外臣等公議會

同具

題請

旨密示臣等遵奉施行

康熙二十年五月

十九

日

閩頌淮編

1

議定採捕船隻

題爲第三本爲沿海船隻宜歸畫一事康熙二十年正月十一日准兵部咨開職方清吏司案呈奉本部送密封內該本部覆福建提督萬 題前事等因康熙十九年十一月十八日題十二月初十日奉

旨該部議奏欽此密封到部該臣等議得福建水師提督萬 疏稱投誠船隻除不堪用者悉令拆燬變價其堪用者將水師額船內有不堪用者拆卸不修而以前船頂補若展界

之請

俞允又必嚴行設法如某地漁船屬某汛管轄者務使編定某汛字號以聽稽查船既畫一而透越無虞等因查應拆兵船關係地方之事該提督疏稱接誠堪用船隻不堪用者悉令拆燬變價其堪用者將水師額船內有不堪用者拆卸不修而以前船頂補其聯絡船隻亦令分配水師勿俾散泊之處請

勅下該督撫提公同詳議具題到日再議至漁船編號稽查之處應俟該督撫提應否開界之

處具題請

旨開界安確之日該督撫提等另疏具題到日再
議可也等因康熙十九年十二月二十日題
本月二十二日奉

旨依議欽此密封到部送司案呈到部移咨到部
院准此又准水師提督萬 咨前事內開

本月十一日准巡撫部院吳 咨擬布政

司呈詳奉本部院案驗前事等因奉此遵卽
轉移驛傳巡海興泉汀漳四道并福興泉漳
四防廳福寧州欽遵去後該本司布政使佟

康年查得水師提督萬

具題將校誠船

隻不堪用者拆燬變價堪用者須補水師額
船內不堪用之數奉部覆以應拆兵船關係
地方之事請

勅督撫提公同詳議具題到日再議等因奉憲行
司隨即移行各道廳州欽遵在案但折船與
頂補額船均屬軍務在本部院與督部院提
督自必移商碩畫詳議回奏非本司所敢輕
覆至漁船編號稽查今沿海地方已經奉
旨展界亦應遵候本部院酌商會疏具

題施行等緣由到部院據此擬合移商合咨請
煩察照裁奪會疏具

題施行等因到提督准此細思水師惟賴舟楫
正厓修葺之維艱按誠現有船隻竟置擱壞
之可惜故有額船不堪用者易按誠船隻堪
用之舉至聯絡船隻亦令水師配查俾無渙
散之虞部覆請

勅下該督撫提公同詳議具題又恐漁船叢雜必
滋透越故欲歸汛防編號以便查詰此皆本
提督分內事也部覆又云開界妥確之日該

督撫提等另疏具題到日再議在案查此案
已經五閱月展界亦奉

俞旨本提督責任水師管見只此祈貴部院暨撫
部院會同詳議另疏具

題者也除咨覆巡撫部院外合就咨會備咨貴
部院請煩察照詳酌會

題等因又准巡撫吳

陸路提督諾 咨回

前事等因各到臣准此該臣看得水師提臣
疏請展界之後則漁船採捕須聽民便部覆
亦以開界妥確之日該督撫提等另疏具題

到日再議在案今界已奉

旨開復矣沿海小民原以採捕資生似應如提臣
所請准其開採提臣又以漁船叢雜恐滋透
越之弊議定沿海採捕漁船定以平底布篷
無桅小艇編立某汛字號印烙船上裝載人
數預先造冊呈送互相查核仍令巡海道給
以由卑朝出暮歸按日查驗聽其資生至于
出灣入港責令水師汛守官兵巡哨稽查如
有龍骨大桅出入應令汛守水陸官兵卽行
拿解亦應如提臣所議舉行者也所有漁船

採捕應徵稅銀容臣另行查報外至水師船隻拆燬修葺臣現與提臣萬

酌商估勘

另報臣謹會同巡撫臣吳

陸路提督臣

諾水師提督臣萬

合疏密

題伏乞

勅部議覆施行

康熙二十年六月

初九

日

此頁無文字

會議裁兵

題爲請

旨事案准兵部密咨內開該議政王等會覆侍郎
溫等題前事等因康熙十九年七月十一
日題本月二十七日奉

旨議政王貝勒大臣會議具奏欽此該臣等會議
得侍郎溫等疏稱總督標下現在兵一萬
二千六百九十五名閩省近海之地應將總
督標下設立五營兵五千名提督標下額兵
五千名將現在五千名兵馬內調來河南山

束歸入提督標營三千名兵馬發回則止剩
二千名尙少三千名兵馬應將總督標下裁
汰七千六百九十五名兵馬內歸入三千名
巡撫標下原無經制兵馬今現有四營兵三
千名各省巡撫等標下俱經設兵相應照例
立爲二營設兵一千五百名至通省鎮守兵
馬原有五萬一千七百五十名福建通省陸
路綠旗兵馬八萬一千七百四十五名量留
舊制兵馬數內其應裁兵一萬九千九十五
名相應交與該督等查現在老弱不堪者裁

去五千名其餘剩兵馬內老弱逃故者停其募補又查總督提督巡撫總兵官標下馬三步七今減爲馬二步八至餘剩官兵裁去之處亦聽該督姚等應裁何處官員何處裁去兵馬若干何處鎮守兵馬若干之處逐一詳細造冊報部等因查侍郎溫等親到地方相視情形將應裁應留官兵既經與該督撫提等會議具題均應如其所題督標立爲五營設兵五千名提標設兵五千名所少兵三千名以督標裁汰之兵歸入撫標立爲

二營設兵一千五百名至通省量留防守應
裁兵一萬九千九十五名亦應照題裁去見
今將老弱不堪者查裁五千其餘應裁之兵
將老弱陸續裁汰逃故缺停其頂補以足應
裁之數至總督巡撫總兵官標下准爲馬二
步八此所減官兵並分守地方等事聽該督
等公同詳定具題可也等因康熙十九年八
月初一日題本月初四日奉

旨依議欽此密封到部移咨到臣准此遵卽陸續
裁汰過陸路官兵八千零五名并咨移巡撫

臣水陸二提臣遵照酌議公同詳定具題去
後該臣等會議查得兵部侍郎溫等疏稱
閩省陸路綠旗兵丁共八萬一千七百四十
五名內議裁一萬九千零九十五名實存陸
兵六萬二千六百五十名是當日會議留兵
之實數也今於邊海要島等事案內安設金
厦等處四鎮浯嶼圍頭永寧等處七汛又將
興化鎮中左二營兵二千名同安城守右營
兵一千名晉江營兵一千名閩安鎮兵三千
名共計兵七千名今已撥歸水師二萬五千

名數內則陸兵只有五萬五千六百五十名
再有海澄公標舊兵一千二百名奉文撥入
各營則閩省陸兵實只存五萬六千八百五
十名矣較之議留之數尙少兵五千八百名
但賊踞臺灣耽耽虎視善後久長不可不慮
況閩省反覆不常更不可不計久遠臣思一
省以督撫提四標之兵爲根本如根本厚實
方可居重馭輕如康熙十三年時督標止兵
二千五百名撫標無兵提標雖有兵五千名
而分防出汛者將四千名一旦有事孰與爭

衡寶爲前鑒臣與撫提諸臣細加商酌一切
地方汛守俱歸各府城守分派如兵不足卽
發各鎮兵補之而督撫提四標之兵必須厚
集操練精勇四出策應小賊固易撲滅卽忽
有大寇亦有所畏懼而不敢輕動如撫標兵
議裁去一千五百名止留一千五百名今請
再留兵九百名提標兵五千名矣今撥去銅
山一百五十名又分防惠安大小盈南安等
處兵不足額今各處俱應量留新兵以足提
標五千之數臣標議裁七千六百九十五名

止留兵五千名今請再留內標兵二千六百六十名是督撫提三標已有強兵一萬五千零六十名卽有意外可恃無患當今

國帑匱乏臣等焉敢額外留兵查閩省八府一州而陸路現有五鎮似覺冗贅今議福寧鎮管延建二府福寧一州興化鎮管福興二府漳浦鎮管河邵二府同安鎮管漳泉二府則漳州鎮可以裁去況督臣現駐漳城大兵尙在者乎但石碼要地現經漳州鎮發兵八百名鎮守此處最爲要汛又應補還提標發防

銅山兵一百五十名此二項官兵似應仍留
其餘二千零五十名俱可裁汰今雖請留督
撫提三標兵三千七百一十名然已裁去漳
州鎮兵二千五十名所留不多况因會議陸
師原留六萬二千六百五十名今歸還水師
七千名陸路缺兵甚多如蒙

俞允統計閩省陸兵止五萬八千五百一十名合
之侍郎溫等原題應存陸兵六萬二千六
百五十名尙少留兵四千一百四十名矣至
興化鎮標兵三千名已歸水師二千名應將

現留平海營兵一千名鎮東營四百名蒜嶺
營四百名俱交興化鎮標統轄分爲左右二
營以成一鎮者也臣等因欲重集四標根本
之兵以固封疆而弭後患臣等謹會同巡撫
臣吳 合疏密

題緣係奉

旨裁兵事理貼黃難盡伏乞
皇上全覽勅部議覆施行

康熙二十年六月二十四日

閩頌淮編

閩頌滙編

[illegible]

夾擊臺灣

題爲進勦事關重大微臣斷難坐視仰冀

隆恩允臣所

請遂臣初志早奏蕩平事本年十月十五日巳時
准水師提臣施 移到密題疏稿爲臺灣進
勦方殷等事內稱督撫二臣各有封疆之寄
內地責任匪輕今二臣矢志決行辭極意切
非臣所能中止且未奉有督撫同征之

旨等語臣閱之不禁中心如焚如溺而不能自己

也臣與撫臣吳

均蒙

皇上特拔隆恩同心合力誓以死報今進勦臺灣
何等重大臣等焉肯貪生怕死一聽提臣自
爲決戰而不竭力相助有成乎臣等見得欲
取臺灣勢必先取澎湖然止靠此一路進兵
風浪順逆利鈍尙未可知密探臺灣幅幘上
至上淡水離福州之定海僅四更天船下至
下淡水離廣東之南澳僅九更天船此臺灣
之裒延長濶如此也內多土番半歸海賊但
自上淡水至臺灣計程二十餘日崇山險惡
溪港七十餘條自正月至九月雨水泛漲勢

難進兵惟此十月十一月十二月天晴水涸
可以計進臣等若攻尅上淡水則恩撫土番
結陣而進如能直抵臺灣則澎湖進兵易於
取勝卽不能而中途遙應深入賊後亦可以
寒賊之膽而壯我兵之威臣捐造修戰艦七
十隻捐募勇兵三千二百名撫臣亦竭力捐
造捐募然上淡水一路必須先進二十餘日
臣欲同撫臣先進兵淡水安布已定而後飛
棹圍頭復與提臣進兵此臣等四月間鄭經
死時卽造船募兵措餉置械直至今日矣况

數十年來因海賊而費

朝廷錢糧者不知幾千萬萬卽閩民因海賊蹂躪數十年困苦已極是以今日進勦臺灣臣等不敢上請

國帑一分不敢下派百姓一件一切造船募兵各項費用并水師提臣及四鎮所需軍械犒賞等項皆係臣等捐辦左右支吾千萬艱難總係臣二人相憐相痛不敢瀆陳

君父之前也今如提臣所請不幾置此兵於可惜乎且水師提臣與挑選四鎮官兵所用水兵

止一萬一千餘名所用陸兵實有二萬餘名
水兵自服提臣調度臣若不出海則陸兵無
人總統萬一臨期退縮不大悞此盛舉乎卽
提臣水陸官兵盡皆勇奮船隻戰守悉已諳
熟臣身任總督猶不敢坐視况提臣到任未
幾水陸配船未定臣安肯逍遙緩帶一聽提
臣之自爲戰乎或提臣因臣於九月三十日
之夜二更嘔血盈盆不能卽起督兵乎或提
臣以臣二人書生不諳軍務可以不行乎但
提臣所請爲內地計者常時之舊規臣等所

請出兵夾擊者出奇之勝策卽臣等出師海上自將內地安頓妥當而後行亦不敢冒昧從事也如過此冬月後卽不能再攻淡水然二臣各統捐兵助戰或合攻以壯軍聲或分途以亂賊心亦未必於提臣無小補也幸逢皇上神武膺仁削平反叛蕞爾臺灣豈容鼯睡臣等所以碩壻區區者實欲仰望

皇上混一區宇使六合向化四海同風炳垂千古昭示來茲卽肝腦塗地臣之願也况臣屢經拜疏督師出海豈今日進兵反可旁諉臣謹

會同巡撫臣吳

合疏密

題緣係進勦臺灣事理字多逾格貼黃難盡伏

乞

皇上全覽勅部議覆施行

康熙二十年十月

十六

日

加叙過洋將士

題爲特

請循例加叙過洋將士以鼓用命事坊臣督師漳
南日事行間每見將士捐軀血戰効力疆場
者莫不思沾一命之榮目今修整戰船乘機
進剿汪洋巨浸險涉波濤比從前之勦海者
功實倍焉但水陸不同陸路之賊嘯聚穴處
不過恃山阻水平常之險隘已耳今海賊盤
踞臺灣欲過澎湖此種險惡迥出尋常茲名
將士會師進剿必須破格賞罰以鼓用命案

准兵部咨內開提督楊 所帶官員相應遵
旨俱實陞一級俱照所加之銜食俸換給新劄其
舊劄繳部查銷等因又准兵部咨內開各官
自湖廣前赴福建破勦海賊酌量加等以示
鼓勵勤勞之人應將總兵官萬 標下各
官俱加一等換給劄付等因各在案所有現
今過洋勦滅臺灣各官生死頃刻其冒險捨
命之苦更有甚于將軍楊 自松至閩各官
提督萬 自楚至閩各官之艱辛者應請
皇恩勅部照例准加一等以鼓用命庶軍聲大振

人人思奮矣臣謹會同巡撫臣吳陸路

提督臣萬水師提督臣施合疏密

題伏乞

勅部議覆施行

康熙二十年十月 二十一 日

安插投誠

題爲

題明安插投誠開墾界外田地以免再給俸餉
事切照閩省惟漳州逼近海賊巢穴年來狂
逞又惟漳地罹患最慘臣駐師漳州對壘賊
營眼見我兵克捷殺賊數千亦損數百思維
宣布

皇上恩威頒立賞格廣示招徠分散黨類從者如
歸計自康熙十七年六月起至十九年六月
二十六日止十次

題報除厚資勸令解散歸農外實在食俸官五千一百五十三員實在食糧兵三萬五千六百七十七名其從前耿藩變後投誠及泉州零星投誠官兵已經撫臣具彙報外而

海上大夥投誠漳州實收十分之九但投誠官兵計至數萬猶慮糜費錢糧臣卽遵照部文查汰通省經制老弱陸續撥入補伍併于題准投誠官補授副將陳士愷遊擊林翰許毅及千總劉德林惠蔡連高信等帶去歸營隨標入伍安插回籍外案爲第八本爲請發協

餉等事據漳州府開報康熙十九年十二月
分實在食俸官二千零三十九員食糧兵一
萬三千一百二十四名造冊到臣經于本年
六月十九日具

題在案查前項官兵內

題請寄劄先用併留閩候補千把總共官一百
九十四員又陸續歸籍事故官一十九員又
補授浙江平陽鎮總兵朱天貴一員挑選帶
赴隨標官九十七員入伍兵三百一十名并
帶安插回籍兵一百七十名續投誠先用千

總陳永得帶去歸標兵六十五名又奉文閩省并江南浙江江西各省將裁汰空缺撥補授誠官兵查浙豫兩省該省裁兵尙溢屢催並無文移至閩調兵惟准江南移開空缺已撥授誠官部劄守備李良帶兵一百八十六名如數前赴頂補又授誠官補授福寧鎮標守備陳士亨帶去歸標安插兵一百五十八名又陸續歸農并事故兵六百四十九名外計尙官一千七百二十五員尙兵一萬一千五百八十六名外歷年捐俸給膳文官除歸

籍事故外尙一百三十七員皆無家無產可歸且不諳正音止願在閩而閩省又乏空缺可補臣查經爲備陳善後十策等事案內

題請開展界外田地安插開墾今邊界已奉

俞旨照舊展復于本年二月奉到部文臣卽于四月停給投誠銀米查將福興泉漳福寧各府州屬界外田地有主者聽民復業無主者分給投誠官兵開墾隨據各官兵紛紛籲呈給田開墾浩蕩

皇仁誠爲得所但赤窮孤身界外旣無室廬復乏

牛種實難播種臣隨傳集道鎮府廳公議分別授誠總兵每員給田五十畝牛種銀一十兩副將每員給田三十五畝牛種銀八兩叅遊都每員給田三十畝牛種給銀七兩守備每員給田二十五畝牛種銀六兩千把總每員給田二十畝牛種銀五兩兵丁每名給田一十二畝牛種銀三兩文官每員給田三十畝牛種銀四兩內有官兵自己原有界外田地領回者不給別田照例給銀以爲資本使若輩各安生業編入家甲分墾田地照例起

科則官及兵數口之家可以無饑矣前項應
給各官兵開墾牛種共給銀四萬七千零一
十六兩當茲司農告匱無堪資給臣陸續倡
捐銀兩倂勸率文武各官捐輸所捐銀兩體
照海賊負水繁多等事捐賞招撫投誠案內
事例計捐銀數准與加級紀錄以勵急公投
誠官兵得資開墾感激安業庶幾不費
國帑收招撫之全效安反側于無虞所有未分
墾田之前正二三月分漳州府給過官兵銀
米俟該府造冊核實另

請外是數年來所有投誠官兵俱已安頓妥當
一勞永逸自今四月起不復再費帑金矣除
將捐給投誠牛種銀兩分發各屬安插開墾
田畝另催造冊到日另行具報所有撥赴各
屬縣界外開墾投誠官兵員名備造數冊送
部查核外臣謹密疏具

題伏乞

睿鑒

勅部議覆施行

康熙二十年十月二十二日

閩頌淮編

閩頌淮編

1

2

3

4

5

6

7

8

9

10

11

12

13

14

15

16

17

18

19

20

21

22

23

24

25

26

27

28

29

30

31

32

33

34

35

36

37

38

39

40

41

42

43

44

45

46

47

48

49

50

51

52

53

54

55

56

57

58

59

60

61

62

63

64

65

66

67

68

69

70

71

72

73

74

75

76

77

78

79

80

81

82

83

84

85

86

87

88

89

90

91

92

93

94

95

96

97

98

99

100

酌定賞罰

題爲特

請破格酌定賞罰則例以鼓用命以定海疆事竊
照海賊盤踞臺灣數十年負固荼毒生靈倏
忽千里乘隙則狡焉犯疆戰敗則遁歸海島
恃險逆命五十年來未能勦除今荷

皇上仁武洪福天齊叛藩授首海逆內亂特整舟
師大張撻伐此番大舉非比尋常臣思兩軍
相對之際必須三軍奮勇乘風破浪擒渠奪
船若不重加賞罰無以大振官兵故賞必從

重罰必從嚴獲船之大小與跳船之先後原奉有一定之部例茲再于部例之外另立優格及嚴定退縮參差之條臣再查臺灣負山阻海汪洋島嶼必先攻尅澎湖然後可攻臺灣然進攻臺灣又係陸兵登岸鏖戰及淡水進兵俱係山港阻隔此二處陸兵之廝殺皆有進路而無退路者更不可不嚴定賞罰另立優格及嚴定退縮之例併臚列爲我

皇上陳之

一 跳船賞格

一跳僞藩坐船及劉國軒馮侍衛本身大船者不論現任授誠効用等官俱超陞六級遇缺卽補本船每兵賞銀五十兩舵工賞銀一百兩兵丁第一名先跳過船者以叅將用賞銀五百兩第二名以遊擊用賞銀三百兩第三名以都司用賞銀二百兩各官內先跳過船者第一名另加六級賞銀六百兩第二名另加四級賞銀四百兩第三名另加二級賞銀二百兩本船上督兵官於加級外再加四級督兵總統及本總

兵另外優叙

一跳何祐江欽林陞本身大船者不論現任
投誠効用等官俱超陞四級遇缺卽補本
船每兵賞銀三十兩舵工賞銀六十兩兵
丁先跳過船者第一名以遊擊用賞銀三
百兩第二名以都司用賞銀二百兩第三
名以守備用賞銀一百兩各官內有先跳
過船者第一名另加四級賞銀四百兩第
二名另加二級賞銀三百兩第三名另加
一級賞銀一百兩本船上督兵官另加級

外再加三級督兵總統本總兵另外優叙
一跳僞鎮頭本身大船者不論現任投誠効
用等官俱加三級卽陞本船每兵賞銀二
十兩舵工賞銀四十兩兵丁先跳過船者
第一名以都司用賞銀二百兩第二名以
守備用賞銀一百兩第三名以千總用賞
銀五十兩各官內有先跳過船者第一名
另加三級賞銀三百兩第二名另加二級
賞銀二百兩第三名另加一級賞銀五十
兩本船上督兵官另加二級督兵總統及

本總兵另外優叙

一 跳賊頭號大船者與跳僞鎮頭大船例叙

功陞賞

一 臨敵進船罰例

一 先鋒副鋒各船整齊在蓼羅圍頭候風開
船賊船必在澎湖接戰我船連夜而行或
有奮勇先往者或有畏怯落後者或亦有
船隻蓬桅原不利便不能爭先者天明到
澎湖必難取齊如賊船備齊依山以待我
船零星前後而到則難迎敵取勝此第一

可慮今定各船帶起火爲號開船行半更
大總統船上放起火三枝如各船俱相隔
不遠不必接應起火各船尾後齊舉燈籠
一盞如有船落後與總統船離遠本船卽
放起火三枝總統船與各船俱畧住以待
後船到近卽後船再放起火三枝各船齊
行或有一船並非失桅失舵遲留在後者
明係臨陣退縮聽總統會同各鎮卽將本
船督兵官不論副叅遊不待揭叅同本船
正舵工卽時正法後報

一臨敵時船篷各卽編定字號以便認識如
我船一隻與賊數船攻打如本艚內船觀
望游移不卽奮力應援者認定篷號卽將
該船督兵官不論副叅遊不待揭叅卽同
正舵工一同正法後報如別鎮船現在附
近或游移觀望或過而不應援者亦認定
篷號報明總統會同各鎮照例將督兵官
並正舵工正法後報

一或某鎮與賊船攻戰別鎮見而游移觀望
不卽赴敵應援者各鎮會同總統公同揭

報

題叅以申

國法

一我船與賊船一隻對敵未能勝賊附近之
船再一隻幫之如賊船果是高大者方准
三隻合攻一賊船勝之必矣不許再幫希
圖混功如違卽將後船以躲避混功論罪
一陸路進兵賞格

一登岸遇賊或築土城木城我官兵有能奮
勇首先爬進攻開賊城者官實加四等陞

轉賞銀三百兩兵實授守備賞銀三百兩
一登岸遇賊或隔溪隔港不能卽渡我官兵
有能奮勇渡河擊開賊營者官卽實加四
等陞轉賞銀三百兩兵卽實授守備亦賞
銀三百兩

一賊踞險要路口我官兵有能衝鋒奪隘者
官實加四級陞轉賞銀三百兩兵卽實授
守備亦賞銀三百兩

一陸路有能活擒偽藩劉國軒馮錫範者不
論現任授誠之官實陞總兵仍賞銀五百

兩有能斬僞藩劉國軒馮錫範之首者官
實陞副將仍賞銀三百兩如兵有能活擒
僞藩劉國軒馮錫範者實授叅將賞銀五
百兩有能陣斬僞藩劉國軒馮錫範之首
者實授都司賞銀二百兩

一陸路有能活擒何祐江欽林陞者不論現
任授誠之官實陞副總兵仍賞銀四百兩
有能斬何祐江欽林陞之首者實陞叅將
仍賞銀二百兩如兵有能活擒何祐江欽
林陞者實授都司賞銀四百兩有能陣斬

何祐江欽林陞之首者實授守備賞銀三百兩

一官員有能陣擒官兵偽總兵者官實陞三級兵以都司用賞銀二百兩有能陣擒官兵偽副將者官實陞二級兵以守備用賞銀一百兩有能陣擒官兵偽叅遊者官陞一級兵以把總用賞銀三十兩陣擒偽千把總等官者官兵量加恩賞

一陸路進兵罰例

一遇賊土城木城不奮勇攻爬私先退縮者

除總兵叅拿外副將以下不論官兵俱應立刻梟斬

一遇賊列營廝殺官兵不奮勇向前拚命血戰臨陣退縮者除總兵叅拿外副將以下不論官兵俱應立刻梟斬

以上申明賞罰之例用昭信嚴之紀俾將士知奮軍聲大振矣但官兵跳船水戰與陸路登岸廝殺者必須重賞以鼓用命所有獎賞銀兩臣與撫臣竭力捐給不費帑金外至于各官加級超陞之典出自

閩頌滙編

皇上特恩事關軍機臣謹會同巡撫臣吳 陸

路提督臣萬 水師提督臣施 合疏密

題伏乞

皇上睿鑒

勅部議覆施行

康熙二十年十月二十二日

閩頌淮編

[illegible]

報明捐給

題爲報明微臣捐給平陽鎮官兵行糧事竊照
進勦臺灣必須廣積舟師臣于本年四月聞
賊內離之信卽將平陽鎮帶來校誠船隻除
經水師提臣萬 共挑去一十三隻外臣

卽擇其可修者前後兩次共捐修四十隻又
打造大趯繒鳥船前後兩次共捐造二十隻
調回朱天貴下分墾界外田地精勇官一百
二十七員精勇兵三千二百名自五月起支
按月應需俸餉銀三千七百零八兩糧米九

百六十石臣逐月捐給督令該官兵操練配
船又

題請調回浙江平陽鎮總兵朱天貴入閩帶領
隨標官九十七員兵三百名坐馬一十六匹
至閩之日隨據該總兵呈稱出征官兵照前
年援勦之例請給行糧自十月初一日爲始
起支每月應需廩給鹽菜銀三百七十二兩
三錢糧米一百一十九石一斗料穀三十八
石四斗草四百八十束等因呈請前來但進
勦臺灣辰下修造戰船以及水戰器具等項

工料槩臣捐發現銀購辦上不動

國帑下不派小民茲該鎮帶來官兵馬匹日需
行糧銀米草料例應給發臣亦不敢上動

國帑一併捐給但係調勦官兵行糧相應

題明然後敢行捐給所有捐給前項官兵銀米
草料俟出師凱旋另造清冊報部外臣謹密
疏具

題伏乞

皇上睿鑒施行

閩頌滙編

康熙二十年十月

二十二

日

額請撥補

題爲第八本爲

請撥協餉置辦軍器火藥給散投誠俸餉以資進
勦免動兵餉事康熙二十年九月二十四日
准戶部咨開福建清吏司案呈奉本部送戶
科抄出該本部覆福督姚 題前事等因

康熙二十年六月十九日題七月十三日奉
旨該部議奏欽此欽遵于本月十四日抄出到部
該臣等查得福督姚 會同巡撫吳

將漳州投誠官兵自康熙十七年六月起至

十九年十二月止給過銀米俱係部文未到
之前那借支給無項可補或撥鄰省協餉補
還或將捐納銀米并清查稅銀准臣補還等
因造冊具題前來查冊開自康熙十七年六
月起至十九年閏八月止官給全俸兵給八
錢給過銀四十九萬七千三百七兩九錢零
又自十九年九月起至十二月止官給半俸
兵給四錢給過銀三萬六千二百七十六兩
三錢零除部撥銀二十五萬兩外未撥銀二
十八萬三千五百八十四兩二錢零共一十

三萬七百七十四石零等語查康熙十八年十二月內臣部會同兵部議將十七年七月以前投誠官兵照議政王會議官員支給全俸兵丁每名支銀八錢之處已經題准應准支給其給過官兵七月以後應支俸餉并七月以後投誠官兵支給俸餉照例支給撥銀十五萬兩又于十九年閏八月撥銀十萬兩仍照官員半俸兵丁四錢之例支給等因具題俱行文在案應將十七年七月以後支給全俸八錢銀兩扣除但該督于部文未到之

前已經支給應將十八年十二月二十七日
止給過全俸八錢銀兩准其撥補其十二月
內半俸支給四錢之部文已到自十八年十
二月二十八日起至十九年閏八月止仍給
全俸八錢不合應扣除銀一十二萬三百二
十三兩零不准撥補外除臣部先撥銀二十
五萬兩應找撥銀一十六萬三千二百六十
兩米一十三萬七百七十四石零于捐納銀
米并清查稅銀內動用補還仍將支過銀米
數自造冊報部查核再此校誠官兵原令于

閩省八府并江西等三省各營官兵空缺補
入應自二十年起停其支給錢糧可也等因
康熙二十年八月初六日題本月初八日奉
旨依議欽此欽遵抄部送司奉此案呈到部移咨
到部院准此隨將扣除銀兩轉行漳州府扣
追去後續據該府知府吳廷貴詳稱查得漳
州地臨濱海年來海逆披猖山海交訐侵犯
內地滿漢大兵雲集對壘奉憲

題設賞格招徠准給俸餉海上官兵投誠接踵
賊勢日衰是以水陸大舉克奏蕩平屢奉憲

行按月給發以安其身且漳南一切米物騰貴若驟減俸餉實難度日倘挺而走險幾廢前功債事卑府遵奉掛領按數支給造冊請補在案今奉文以十二月二十八日起至十九年閏八月止給過俸餉減半核筭共銀一十二萬三百二十五兩六錢八分六釐零行令追扣卑府敢不凜遵但投誠之人悉係光身窮漢已故者固無可問而現存安插開墾之官兵分與田畝又捐給牛種銀兩多方撫綏俾其安業彼時所領之銀已克口腹又安

敢施鞭撻還項則此一十二萬三百二十餘兩之金銀原係通融兵餉以濟急需今追無可追扣無可扣卑府點金無術餉項此盈彼縮難以久懸合無請乞憲察迅賜剴切具

題請撥餉銀歸欵庶一勞永逸錢糧得以清楚等緣由到臣據此除將奉撥捐納稅契奏銷冊領俟催該府冊領到日另報外該臣看得校誠官兵

題明給與俸餉所以安其反側之身心海賊未敗之前輸誠所給者使其勢孤既敗之後向

化所給者收其黨類惟從前給過銀兩因餉撥未敷發領漳州府經權兵餉支給臣是以有將閩省展例捐納清查稅契各項銀兩撥補還項之

請也茲奉部行自康熙十八年十二月二十八日起至十九年閏八月終止給過投誠官兵俸餉減半應扣除銀一十二萬三百餘兩不准撥補等因遵行漳州府按數扣追去後今據該府知府吳延貴詳稱投誠官兵光身窮漢從前領過銀兩已克口腹亡故者已無可問

現存安插開墾者不能鞭撲還項追無可追
扣無可扣點金無術兵餉難以久懸詳請
題撥餉銀歸款等由前來臣查當日海上附逆
之徒多方招撫惟恐其不亟來歸旣歸之後
按月給發惟異其身心帖服今已給之銀奉
文減半行追但此輩赤貧官兵或存或故無
可追扣合無仰懇

皇恩俯鑒已給撥誠官兵前項餉銀一十二萬三
百餘兩賜將閩省捐納清查稅契銀兩併准
撥補俾通融之餉得以直補無缺矣臣謹會

閩頌滙編

同巡撫臣吳

合詞具

題伏乞

勅部議覆施行

康熙二十年十一月

初六

日

總督福建少保兵部尚書姚公奏疏

閩中 子民 錄

題明捐辦

題爲勦海軍需浩繁微臣竭力捐辦謹疏

題明仰祈

睿鑒事切照閩海逆賊自金廈敗遁之後盤踞澎湖臺灣耽耽虎視則臺灣一日不滅非特閩民受禍最烈而沿海之浙粵諸省百姓均未得寧謐也臣誓必滅此朝食茲奉

旨進勦正臣報國之日但過洋外海奇波異浪非

精銳慣習水戰官兵無以張其撻伐出海船
隻必須堅固盔甲器械必要鮮利砲火藥彈
更要多備不時操演轟烈方可克敵制勝臣
一聞海賊內潰信息卽調回挑選朱天貴舊
授誠官一百二十七員兵三千二百名又疏
請調回朱天貴自平陽鎮帶來隨征官兵三百九
十七員名按月捐資膳養臣又捐造大趯繒
鳥船二十號雙蓬船二十隻捐修水師提
鎮各營戰船捐辦船上合用桅舵含檀鹿耳
牛皮棕蔴旗幟并一切器棋又製造軍火甲

械內除選出原造配給捐膳水師續募繳回
盔甲弓箭排鎗大刀牌刀藤牌百子砲火藥
鉛彈等項已經報銷今止修給不開捐造外
實捐造過鹿鎗鉄甲弓箭火藥鉄鉛彈子火
礮火箭等項又綠旗出海水陸征兵惟藉糧
餉足食資飽騰以鼓用命查閩省本色米貴
米折不敷買糴臣捐添價銀照民間時值買
米支給通計捐辦軍需各色俱備共用銀一
十三萬九千三百五十七兩四錢一分零此
所捐銀兩數年以來臣罄家所有并借貸賣

產僅奏捐銀九萬七千四百九十三兩九錢
一分零更銀四萬一千八百六十三兩五錢
零緣出征軍機呼吸將不出海官兵月餉暫
挪應用以副師期容臣勦海回日陸續措處
苴補而此奮出海總不敢上請

國帑下派里民然臣所以鞠躬盡瘁不敢自安
者總期鼓舞官兵奮勇前驅犁庭掃穴除淨
逆孽數十年根株以紓我

皇上南顧之憂永奠閩粵江浙邊海殘黎之後患
臣之願也除將所捐數目備造簡明細數各

清冊送部存查外臣謹密疏

題明伏乞

睿鑒施行

康熙二十一年三月二十五日

閩頌滙編

驚聞奏改師期

題爲見疏驚異特請

殊恩始終臣志事臣聞水師提臣施 於本月初
一日拜發清字密疏將出師日期改定五月
臣卽於本月初八日有爲

奏聞事一疏以練兵辦餉修船製械鼓舞官兵奮
勇殺賊臣之職也敢不竭蹶以期無悞至風
信之南北海道之從違臣不敢以訪聞爲實
擬自應以水師提臣之議爲政此臣但聞其
改期五月而具疏

奏聞尚未見提臣原疏也寧海將軍以事關重大
令臣等齊集泉州公議本月十七日午時水
師提臣乃出疏稿與寧海將軍內有督臣生
長北方雖有經緯全才汪洋巨浪之中恐非
所長令臣駐廈門居中節制等語臣見之不
禁驚異欲死念臣以革職知縣沉埋困頓永
無奮興之日蒙

皇上特恩超陞得有今日是臣功名性命皆我
皇上再生再造者也豈肯貪生怕死辜負
隆恩况勦滅臺灣原臣素志于康熙十八年九月

內已有請定一統規模等事一疏請于克復
金厦之後乘勝直搗臺灣于康熙十九年三
月內克復金厦之後又有條陳善後事宜一
疏內有請即乘勝進取澎湖臺灣因會議未
決蹉跎至今昨因鄭經寘誅荷蒙

皇上神武獨斷特拔施 爲水師提督專命王征
將見海賊立見敗亡臣喜不寐將一切兵餉
糧米各項器械木料罄家不足稱貸挪用各
色具備不動

國帑不派里民臣復親自督兵出海操練數月

正望滅此朝食仰報萬一而不意提臣忽有
是請臣思天下無難事只怕苦心人臣銳意
滅賊視死如歸雖生長北方然今出海數月
荷托

皇上洪福臣亦安然無恙不嘔不吐何以知臣出
海竟無所長卽令在海操演深見老水師教
演之法有必應遵行者亦有必須更改者叅
今酌古籌今萬全在臣亦自知覺有微長今
提臣所需各項械料甚多甚難豈旦夕所能
辦乃提臣朝呼而臣卽能夕應者原非今日

始辦也實臣勦滅臺灣之心數年于茲故辦料製械數年之中亦無一日間斷今以臣數年辦修軍料之苦心數月出海捺演之苦志一旦令臣回駐廈門此臣寧願戰死于海而斷不肯回廈門偷生者也伏祈

皇上憐臣一片赤膽數載苦心准臣與提臣戮力同心勦滅海賊肝膽塗地實所甘心況鼓舞將士之法不免虛實相兼若使鼓舞一番而未出兵再鼓舞一番而又不出兵則臣鼓舞之法窮捐貽之力盡兵心一懈卒難振興是

在提臣看定風信決意進兵滅此巨憝以報國恩不宜再更者也臣謹密疏具

題緣係請勦臺灣事理字多逾格貼黃難盡伏

乞

皇上全覽施行

康熙二十一年三月

二十九

日

閩頌滙編

勦海機宜

題為遵

旨瀝陳勦海機宜事康熙二十一年五月初一日
准兵部密咨為密陳航勦海務機宜等事內
開奉

旨進勦海賊關係重大總督姚

提督施身

在地方務將海面形勢賊中情形審察確實
如果有可破可勦之機着同心合意勿失機
會酌行勦撫欽此今臣等統領船隻官兵已
于本月初五日俱抵銅山寧海將軍都統喇

叅贊大臣禮部左侍郎吳于本月
十三日帶兵俱抵銅山正在會商臣等進兵
但既奉

明旨臣等敢不細心體察加意詳審當即會集同
安鎮總兵官吳英興化鎮總兵官林永海壇
鎮總兵官林賢金門鎮總兵官陳龍平陽鎮
總兵官朱天貴及出海大小將并用心察審
大約俱言乘南風由銅山蘇尖開洋如遇西
南風則係順風乘其上風上流以取澎湖提
臣之見未嘗不是但澎湖臺灣北風濤多如

北風進兵可以分艚攻擊南風止娘媽宮一處可以灣船現賊牢據娘媽宮我兵使一時未能尅破我舟衆多無灣停泊此南風之可慮一也查澎湖在臺灣之北而臺灣則在澎湖之南如乘南風取澎湖卽得澎湖不能逆風取臺灣必待十月小陽再圖進取如乘北風取澎湖一得澎湖卽可長驅直取臺灣此南風之不如北風二也如乘南風取澎湖不能取臺灣則澎湖必用重兵鎮守澎湖柴草不生一切柴米俱須金門運送六七八月颱

風不時生發誠恐運送柴米之船被風阻絕澎湖守兵難堪如乘此風取澎湖即可以取臺灣則無阻糧之慮此南風之可慮三也此臣等察審海面形勢確實如此也至賊中情形查問各鎮大小各官皆言康熙十九年二月二十七日得廈門時賊兵四散逃遁澎湖臺灣俱無兵守把一日數驚遙傳大兵已到直至四月初七日劉國軒始傳令齊兵此時一大機會又康熙二十年四月報到鄭經初死之時人心風鶴止僞將董騰一員帶兵三

百二十名守澎湖此又一大機會後有僞賓客司傳爲霖僞鎮蔡愷等十一員并本朝續順公分頭起兵內應此又一好機會十二月
中僞鎮朱友出首將傳爲霖等一槩殺害今此機會俱已錯過目下實無機可乘昨據偵探人回見賊衆萬餘盡守澎湖戰守之具亦已俱備而賊竟禁港四個月不通船隻賊中消息頗難遽得此臣等審察賊中情形如此也卽前提臣密疏五月進兵者止以報國心急滅賊心堅欲乘南風順風之便上仗

朝廷洪福冀望血戰破賊原非有機可乘果有可
破可勦者也今過洋征勦自須慮出萬全臣
等同五鎮衆議僉同皆言不如十月可乘北
風分道進兵皆願奮勇拚死血戰必取澎湖
臺灣以報

國恩如或優游退縮甘受國法此實臣等同心
合力誓以滅此朝食非敢逡巡改觀有悞進
勦者也臣等謹密疏奏

聞緣係勦賊事理字多逾格貼黃難盡伏乞
皇上全覽施行

康熙二十一年五月
壬
日

閩頌滙編

請禁鄰封接濟

題爲請

勅鄰封嚴禁接濟以杜透越事切照海賊盤踞臺
灣惟望沿海奸民私通貨物以濟其所無今
閩省現在進勦各處要島星羅碁布沿邊巡
緝已絕賊望矣但聞粵東香山灣十字門外
乃界外大洋此則粵東官兵及粵彞皆所不
到之處奸民得以通其接濟海賊或發趲繒
四五十隻滿載而歸自去年四月至今傳聞
已三次矣又南澳爲粵閩共轄之區兩省皆

不設兵以致奸民憊兵肆行無忌假巡哨之名通接濟之實此二處者最爲通賊接濟大害卽臣等密訪所聞及偵探所報亦莫不以十字門外南灣二處爲通賊之最者也厦下雖征勦之策日事講求而通濟之奸最難寬縱其南灣一處臣現與提臣會商批發巡緝快哨三十五隻令銅山左營遊擊廖春統領專司巡緝以絕奸通但南灣爲兩省共轄誠恐此勦彼遁易于藏奸伏祈

勅下廣東督提亦發趲繒快哨三十隻專令能將

一員統領會同巡拿此處海賊大船必不能
來卽來不過趲繒等船我兵日夜登山瞭望
遠見賊艖放砲爲號我船卽整備出戰庶接
濟可斷矣至十字門外此則臣等法令之所
不及聞順德鎮水師總兵蔡謀勇兼長
善于水戰伏祈

皇上勅下廣東督提令順德鎮蔡總兵挑選快船
三四十隻命能將一員統領專泊十字門外
凡有賊船到彼奸民接濟卽行擒拿則賊通
接無路矣臣今亦遣心腹在彼密察共濟巡

拿務必絕賊通濟以孤賊勢緣係嚴禁出洋
接濟事理臣謹會同陸路提督臣萬 水
師提督臣施 護理巡撫印務按察使臣張
所志合疏密

題伏乞

勅部議覆施行

康熙二十一年五月

二十七

日

閩頌滙編

議撤滿兵

題爲請

旨事康熙二十一年七月初七日准兵部咨奉開

該議政王等會覆寧海將軍喇

題前事

內開該臣等會議得寧海將軍喇

等疏

稱臣等星夜來至銅山眼看總督提督起程

隨會總督姚

提督施

問說進兵之處

總督提督稱南風不及北風五月內停其進

兵俟十月內進兵等語切思若改一次進兵

日期卽費一次錢糧臣等如不催趲過意不

去如欲催趙渡海征勦事宜關係重大又不
便妄行催趙且跟隨伊等各處行走官兵馬
匹疲困羸瘦况伊等每每遲延日期有推托
之意相應停止臣等與督提會商等因查近
經坐塘筆帖式譚木哈圖呈報臣等會議行
文總督姚 提督施 如現今風大有難
進勦之處即統官兵回汛整理船兵俟有可
破可勦機會再進等因具題奉

旨欽遵行文在案今將軍喇 等既稱如不催
趙進兵過意不去如欲催趙渡海征勦事宜

關係重大又不便妄行催趲跟隨伊等名處
行走官兵馬匹疲困羸瘦至等不得深知海
內情形似宜停止臣等與提會商具題之
處雖是但將軍喇等現統大兵在關仍
令與督提等照舊會商而行等因具題奉
旨
在閩滿洲兵馬應否撤回之處着再議具奏欽
此該臣等再會議得寧海將軍喇等停
止會商具題臣等會議仍令照舊會商而行
等因具題奉

一在閩滿洲兵馬應否撤回之處着再議具奏欽

此查閩省水陸綠旗官兵數甚多且福建設
有漢軍將軍前去以此兵之力進取臺灣防
守地方未爲不敷况總督姚
提督施
進取臺灣如有難進之處卽統官兵回汛俟
有機會再進等語今滿洲大兵雖留福建又
不出海進取臺灣相應將在閩滿洲大兵俱
行撤回京城應行文將軍喇
等將在閩
太兵盡行帶領回京總督姚
提督施
仍遵前

旨如有進取臺灣機會一面固守地方一面進取

臺灣可也又一議查閩省俱已平定所有漢
軍水陸綠旗兵數甚多理應將滿洲大兵卽
行撤回但總督姚 提督施 等如有機
會仍取臺灣其滿洲大兵應否留閩之處不
便遽議總督巡撫提督等身在地方深知情
形應行文總督姚 巡撫董 提督萬

施 等將滿洲大兵應撤之處公同定
議速行具題到日再議可也康熙二十一年
六月十八日題本月二十一日奉

旨依後議欽此移咨到臣准此臣當卽會商撫臣

咨請水陸提臣公同會議定奪隨准陸路提
臣萬 回稱在攢造軍政冊籍繁多未能
倉卒就道爲照閩省自平復各島之後山海
晏寧于茲三載若不遠攻臺灣則綠旗官兵
星羅碁布足資防禦似可無勞滿兵在外久
駐若臺灣外國現欲攻取則滿洲官兵似未
可遽議撤回也等因到臣并覆咨撫臣在案
又准水師提臣回稱時下南風盛發逆孽全
踪灣泊澎湖密邇廈門賊艘時常遊移當防
飄突似爲未便遠離其議撤滿洲大兵今閩

省地方處處平定惟有臺灣逆孽負隅逋誅
游魂海上海疆勦防事宜本提督自當一力
擔承至于陸地應留應去是在貴部院與撫
部院陸提督共相區畫酌妥

題覆可耳等因各到臣臣因事關重大未便咨
移定議隨經臣與撫臣面商會議該臣等會
看得平定福建實賴大兵之力寧海將軍臣
嘯 恢復全省底定海疆叅贊部臣吳
 削平海賊全賴謨畫若能久鎮福建則海
晏山寧閩省安如磐石矣但今奉

旨大兵應撤之處令臣等公同定議臣等敢不矢
加詳慎深計久遠今據陸路提臣回咨陸路
已有綠旗官兵星羅碁布足資防禦似可無
煩滿兵水師提臣回咨閩省處處平定惟有
臺灣通誅海疆勦事宜本提督自當一方擔
承是水路陸路已經水陸提臣各爲身任大
兵似爲可撤矣臣等未敢輕定復加詳議細
繹部文前後兩議亦皆以滿洲大兵應行撤
回惟有機會仍取臺灣大兵應否留閩行臣
等公議今查可取臺灣機會如厦金初得之

時鄭經初死之際及傳爲霖續順公等內應之期今俱錯過雖臣等各竭愚忠分用謀間斷絕接濟造船整兵阻其洋販擾其播種然欲得其或有餉匱糧斷或有內應內潰之機實未可預定時日大兵在閩每歲需餉三十餘萬兩今水陸二提臣既稱無煩滿兵一力擔承而且機會難定糜餉實多卽遇勦海大兵果難下船過洋閩省已有綠旗官兵又有漢軍甲兵則進取臺灣防守地方可以敷用大兵似可撤回臣等公議會同具疏密

題請

旨緣係議撤滿兵事理字多逾格貼黃難盡伏乞
皇上全覽行臣等遵奉施行

康熙二十一年七月初一日

海賊差員

題爲稟報事康熙二十一年八月二十一日據
晉江營遊擊許毅呈稱本月十五日酉時據
卑職差役駕哨船至廈門賁回本部院公文
一角內開據該遊擊報稱據兵丁蔡進望見
有雙蓬艍船二隻從海外駕入問是本部院
差往臺灣今帶得僞船一隻俱係長髮現留
船中等情到部院據此合亟吊詢爲此票仰
晉江營遊擊許毅文到卽將僞船長髮人員
併本部院前往臺灣差官着令星飛一同赴

省或由陸路或由水路聽從其便該遊擊撥兵護送前來毋得踈虞遲悞火速等因奉此案照前事本月初十日戌時復檄中軍守備蔡斌覆稱蒙諭馳赴永寧親詢情由回報到職該卑職看係招撫事情所關重大既經水師提督見有哨船前來守護似應並差轉送隨再馳報本部院察照併具文通報在案仍于十一早五鼓親赴永寧汛督押仰候解赴間續于十二日奉提督施令牌內開今二船俱到梅林地方屬在該遊擊轄汛查汛明

白應否解送何衙門是在該遊擊酌妥裁行
立等呈覆等因又奉硃標仰將蔡猷雄一名
送到問訊毋聽支飾奉文卑職不敢不遵隨
于十三早親帶僞差官蔡猷雄赴厦叩見當
施提督面詢明白奉發回汛着令解送本部
院軍前今奉前因卑職遵再會商僞差官蔡
猷雄黃學等俱由水路往省較爲妥便第時
際秋半南風甚少又恐耽延時日據稱黃學
帶女眷三口長髮林奕阿二二名由陸往省
蔡猷雄帶長髮林玉舵工李剛梢翁際張龍

陳和陳奕楊贊吳卽蔡孟等共十人由水坐
船往省等情開報到職除將由水道僞船一
隻長髮十名行撥本營把總達養棟帶兵駕
哨弁同本部院原往臺灣差船一隻于本月
十六日自泉開駕護送前至平海仍移會平
海營撥船沿海接護赴省外所有由陸僞差
官黃學等及女眷三口遵奉憲票取給入夫
弁撥目兵俱于十六日解送前赴本部院軍
前察奪等緣由又據巡海道按察司副使線
一信報稱本年八月十四日亥時據泉州府

海防同知周士賢報稱查得本月初八夜有
雙篷艍船二隻從海外駕入晉江縣永寧灣
梅林地方離城五十里經防守把總陳伯印
報晉江營許遊擊委中軍蔡守備初十早前
赴查詢據問內船一隻舵工高同稱係奉總
督老爺差往臺灣偵探現有照票五月二十
二日在銅山放洋因風不順至六月初三日
到澎湖船上現載短髮十八人今于八月初六
日帶有臺灣船一隻自澎湖放洋至初八夜
到梅林地方又有偽劉國軒差翼將蔡猷雄

船一隻稱係奉劉國軒差載總稿黃學有書
欲見總督老爺船上有女眷三口長髮十三
人因北風敲戢不前暫泊本地方十一日晉
江營許遊擊親赴該灣查詢卑職仍一面委
員前往着落地方弁備文移營再行查實外
事關海上船隻合就塘報等緣由到道據此
隨行泉防廳卽將來船弁人口差解赴本部
院轅門發落外合就塘報等緣由又據閩安
副將蔣懋勲報稱康熙二十一年九月初六
日據防守鎮口中營千總馮正龍報稱本日

有海壇鎮標把總潘鳳等稱蒙本營許遊擊
差坐哨船護送前奉總督部院差舵工高同
前往沿海哨探今帶回偽船一隻內裝偽官
兵蔡猷雄等共十名船共二隻進口理合具
報等情到職據此卑職查驗奉有部院差委
高同印照一張又有海壇鎮標遊擊許英差
委護送照票一張卑職隨差把總鄭朝堅押
護至省送赴本部院轅門查汛等緣由各到
臣據此該臣看得海賊自金廈敗遁固守澎
湖臺灣臣等整船練兵統師出洋于五月初

一日廈門海面接兵部密咨奉有酌行勦撫之

旨臣商之前撫臣今陞兩廣總督吳 聞原任

福州城守副將黃朝用舊與劉國軒交好令其寫書往宣

朝廷勦撫並行德意船兵已經齊集雲屯等進兵弁發還賊探米紹熹遣行去後當在銅山候風未順隨經班師

題報在案茲于八月二十一日據晉江營遊擊許毅巡海道線一信等各報稱有臣差艍船

帶來僞船一隻俱係長髮僞差官蔡猷雄黃
學弁隨從十三名乃海賊劉國軒所差到臣
等希議輸誠及帶女眷三口從海外駕入晉
江永寧灣梅林地方臣聞報隨卽檄行撥兵
護送到省今僞員黃學蔡猷雄到省見過寧
海將軍喇 叅贊侍郎吳 巡撫董
提督萬 施 諸臣所來僞書臣卽遍
送將軍部堂撫提諸臣同看訖臣細閱僞書
有屈

使赴議之請似乎慕化向德今詢據僞差黃學稟
閩頌滙編

稱僞侯劉國軒與僞侍衛馮錫範商議回過
僞藩請照琉球高麗外國之例稱臣奉貢奉

朝廷正朔受

朝廷封爵接

詔者削髮過海在臺灣者求免削髮登岸請示何

處通商弁請道府正員過海訂議等語臣與

撫臣董

提臣萬

施

責以大義查

琉球高麗其地係外國之地不在版圖其人
卽係外國之人可免削髮今臺灣雖屬外國
之地而爾等俱泉汀之人據險阻化豈容不

肯削髮不讓臺灣請比琉球高麗之例今旣
擬海賊遣僞員前來請官往撫相應

題明請

旨臣等業將僞差黃學留候外應否准其所請遣
發道府正官前往宣布

皇仁訂議妥確仰祈

皇上勅部議覆行臣等遵奉施行現今臣與水師
提臣各將船隻官兵出海擬上風上流以便
相機進兵更望

勅部速議迅行庶勦撫俱無悞矣至所帶女眷三

口查係去歲會議征勦之時官兵回省修造
戰船不敢動費民夫臣卑騎就道所有兵眷
及臣家下人口及卷箱器皿各項俱用船運
赴省以省夫力不擬遭風飄失七號船一隻
此三眷口卽係七號船內所載之眷口業已
彙冊

題報在案今經海賊送來仍令在僞差黃學等
同居相應一併

題明請

旨遵行除將僞書咨部外臣謹會同巡撫臣董

陸路提督臣萬

水師提督臣施

合

疏密

題緣係海賊差員到閩事理字多逾格貼黃難
盡伏乞

皇上全覽施行

康熙二十一年九月

十六

日

海船宜歸畫一

題爲第三本爲沿海船隻宜歸畫一事康熙二十
十年八月初五日准兵部密咨內開職方清
吏司案呈奉本部送密封內該本部覆福督
姚 題前事等因康熙二十年六月十一
日題七月初二日奉

旨該部知道欽此密封到部查先經福建水師提
督萬 䟽稱展界之請

俞允則漁船採捕須聽民便等因臣部議漁船編
號稽查之處應俟該督撫提等應否開界之

處具題請

旨開界妥確之日該督撫提等另疏具題到日再
議在案該臣等議得福督姚 疏稱沿海
小民原以採捕資生似應如提臣所請准其
開採沿海採捕漁船定以平底布篷無桅小
艇編立字號印烙船上仍令巡海道給以出
單按日查驗至于出灣入港責令水師官兵
巡哨稽查如有龍骨大桅出入卽行拿解漁
船應徵稅銀容臣另行查報等因查閩省海
界雖經照舊展復但見在分派綠旗船兵前

進取澎湖臺灣其沿海居民採捕之處不便
遽議應俟澎湖臺灣恢復之時聽該督撫提
等具題到日再議可也等因康熙二十年七
月十五日題本月十九日奉

旨沿海採捕關係小民生計准其用不設桅蓬小
船行走欽此密封到部送司案呈到部移咨
到臣臣遵卽檄行布政司巡海道并府州縣
查報各去後茲據署理布政司事督糧道龔
事趙之彪呈前事內稱奉本部院牌案奉

俞旨沿海採捕關係小民生計准其用不設桅蓬

小船行走等因欽遵在案本部院隨卽檄行各州縣聽民採捕以資生業去後惟是魚稅一項業已屢催各州縣造報未據呈繳前來合就行催爲此備牌仰司文到立將各州縣漁稅數目清冊立刻催令造報等因奉此隨該本司遵奉憲檄立即轉行各州縣造報前來合就彙造轉繳計呈繳清冊二本等緣由到臣該臣看得閩省當凋殘之後民困已極幸蒙

皇上如天之仁沿海與小民採捕生計

准其用不設桅蓬小船行走欽遵在案臣隨即
檄行各縣遵

旨聽民採捕以資生業至于出灣入港仍復責令
汛防官兵嚴加稽察但採捕船隻繙網等項
既樂利自應輸稅臣查賦役內開載沿海各
州縣原有存留附徵魚課額銀五千四百七
十餘兩內遷移無徵銀四千五百一十二兩
六錢零尙有徵銀九百六十三兩九錢零除
行各州縣查明原額照舊輸納外臣于便民
起事特瀉裕餉之籌是以通行藩司巡海道

併各州縣再行從長清查估報今據藩司彙
繳各州縣總冊共報增銀五千九百兩零併
原載賦役附徵漁課銀五千四百七十六兩
零連舊漁課共銀若干兩經臣覆核無異除
將數目清冊送部外相應

題報臣謹會同巡撫臣董

陸路提督臣萬

水師提督臣施

合疏密

題伏乞

勅部議覆施行

議裁安塘

題爲歷任年滿伏乞咨

題更換事康熙二十一年六月二十六日准兵
部咨開車駕清吏司案呈奉本部送兵科抄
出該本部覆福建總督姚 題前事等因
康熙二十一年二月十三日題三月十二日
奉

旨該部議奏欽此欽遵抄出到部該臣等議得福
建總督姚 疏稱閩省安塘筆帖式七員
叅贊衙門筆帖式一員將軍衙門筆帖式四

員臣衙門筆帖式二員撫臣水師提臣衙門
筆帖式各一員共一十六員似覺太多且臣
衙門番譯無多筆帖式一員儘足供用今羅
密年滿回部員缺不必再補至各塘俱幫有
臣標員役似應量留筆帖式三員其餘俱應
撤回至將軍衙門筆帖式或仍舊四員或量
留二員等因題請前來查先經奉

旨自閩省福州府以北將安塘筆帖式各越一站
撤回現今止有六處且閩省現有大兵又進
剿海賊其該督所請應留筆帖式三員其餘

撤回之處應無容議至筆帖式羅密員缺不必再補將軍筆帖式量留二員之處應聽吏部議可也等因康熙二十一年四月十三日題本月二十四日奉

旨這本內事情着再議具奏欽此欽遵抄出到部該臣等再議福建總督姚 䟽稱閩省筆帖式共一十六員似覺太多應酌量撤回等因臣部以閩省現有大兵又進勦海賊其請應留筆帖式三員其餘撤回之處應無容議至筆帖式羅密員缺不必再補將軍筆帖式

留二員之處應聽吏部議等因具題奉

旨這本內事情着再議具奏欽此查該督既稱應
留安塘筆帖式三員其餘俱應裁回各安塘
處所俱設臣標員役奏章自可無悞等語該
督身在地方深知其閩省安塘筆帖式應聽
該督酌量緊要處所留設三員其餘筆帖式
俱應發回至筆帖式羅密員缺不必再補并
將軍衙門筆帖式量留二員之處仍應吏部
議可也等因康熙二十一年五月初四日題
本月初七日奉

旨依議欽此欽遵抄出到部奉批車駕司照行送
司奉此移咨到臣准此該臣看得閩省向因
海寇侵犯連歲用兵安設塘馬馳報軍機今
逆賊敗遁臺灣地方底定奉

旨酌行勦撫辰下軍務較省是以臣前疏

題明在閩止議留安塘筆帖式三員其餘俱應
撤回部覆在案茲查福建通省自上游浦城
以至漳南計其塘站臣議留筆帖式三員止
留漳州府福州府石陂街三塘所有延平興
化泉州三塘相應裁去今議以在漳筆帖式

譚木哈圖仍駐漳州府城福州安塘筆帖式

巴錫隨寧海將軍喇

叅贊禮部侍郎員

回京議以興化筆帖式邁圖改設福州

省城建寧浦城石陂街安塘筆帖式蘇赫現

請告病以泉州筆帖式文布移駐建寧浦城

之石陂街其延平安塘筆帖式納勒庫亦應

裁去如此則上中下三處塘務交接不致乏

員料理且飛遞跑差臣與撫臣衙門各有差

承員後互相接替但筆帖式已經裁撤三員

而各塘原設馬匹有一十四匹者亦有一十五

匹者時多倒斃責之民間購買賠補但聞購馬價值應動站銀容臣查明另疏

題報查各塘除設馬外原設有兜夫一十五名馬夫八名五名不等且閩人善走較馬相去不遠留此二項人夫儘足供用所有原設馬匹相應裁去節省錢糧今行據驛傳道報稱各塘現在馬五百一十三匹着令驛傳道照數撤回變價可收原報購買價值銀一萬四千八百七十七兩發司候撥充餉嗣後喂馬錢糧買馬賠補每年約銀二萬六千兩有奇

可以節省而小民亦免賠補之累卽按遞軍
務亦不至于遲悞矣再查各省驛站錢糧奉
文留六裁四于康熙二十年十二月二十四
日欽奉

恩詔復給二分尙裁二分閩省向因大兵進勦安
設馬塘將驛站錢糧協應馬料馬夫工食等
用部覆暫停裁四俟大兵回京議裁今塘馬
裁撤大兵現在奉

旨陸續回京所有閩省驛站額徵該銀六萬五千
六百五兩六錢五分零奉

恩詔雖應裁二留八但閩省僻處海疆事簡差少
相應仍照裁四留六之原行裁去站銀二萬
六千二百四十二兩二錢六分止留站銀三
萬九千三百六十三兩三錢九分可也臣謹
會同巡撫臣董 合疏具

題伏乞

勅部議覆施行

閩頌滙編

康熙二十一年九月

三

日

稟報臺灣差員

題爲稟報事康熙二十一年十月二十七日准

兵部咨內開議政王等會覆福督姚 題

前事等因康熙二十一年九月十九日題十

月初八日奉

旨議政王貝勒大臣會議具奏欽此該臣等會議

得福督姚 疏稱海賊劉國軒所差僞官

黃學帶來僞書細閱有屈

使赴議之請今據僞差黃學稟稱僞侯劉國軒等

回過僞藩請照琉球高麗外國之例稱臣奉

貢奉

朝廷正朔受

朝廷封爵接

詔削髮過海在臺灣者求免削髮登岸請示何處
通商併請道府正員過海訂議等語應否准
其所請遣發道府正官前往宣布

皇仁訂議妥確行臣等遵奉施行等因查臺灣賊
寇俱係閩地之人不可與琉球高麗外國比
賊若能誠心改惡削髮歸誠督撫等公同
詳確加意選擇賢能官員發往招撫一面奏

聞若賊知我大兵進勦故智差員與圖緩兵亦未
可定該督撫提等亦行詳確若有可行機會
提督施 等應遵前

旨統伊所派船兵毋失機會而行可也等因康熙
二十一年十月初十日題本月十四日奉

旨依議欽此移咨到臣准此隨卽咨移撫臣并水
陸二提臣各去後本年十一月初一日准水
師提督施 咨前事內開爲照征勦臺灣前
在銅山與貴部院會疏具

題北風進發今本提督統率舟師現次臬塗擬

此二十九日開駕北上平海相機進勦等因
到臣該臣查得海賊盤踞海島不時出沒奸
狡叵測賊心誠偽難以逆料應將偽差黃學
等遣回臺灣確詢真偽如海賊果肯真心嚮
化剃髮登岸再行請撫臣等確察具

題至原任福州城守副將黃朝用舊與劉國軒
交好應會同黃學過海方有確信回報者也
相應一併

題明遣行其送回婦女三口暫令原夫江一龍
領回不便再發過海并應

題明臣謹會同巡撫臣董

陸路提督臣萬

水師提督臣施

合詞密疏

題報伏乞

睿鑒施行

閩頌滙編

康熙二十一年十一月

二十三

日

閩省要務

題爲備陳閩省近日要務仰祈

睿鑒事臣荷

皇上不次洪恩叨任閩督將及五載凡闕封疆布置地方利弊俱竭愚衷次第具

題請

旨遵行矣臣昨自海上班師見臺灣之寇議撫則狠心未必卽馴議勦則機會未必卽得計惟禁三省之接濟阻臺灣之洋販擾海賊之耕種而并用間用謀使之餉絕糧單計窮力困

而且兵將離心則勦之必破撫之必來故臺
灣非不可勦而亦非專用兵威可以必得也
且閩省大兵初撤逆兵初裁駐防官兵初設
之時從前耿逆害民苛政正須徹底澄清未
便因仍沿習而閩民數十年來日事兵燹困
苦顛連較之他省猶甚凡有困革損益者臣
不敢不與撫提諸臣同心體察條分縷晰共
一十二疏爲我

皇上陳之臣謹會同撫臣董

提臣萬

施

合詞密疏具

題伏祈

睿鑒俯賜採擇勅部議覆施行

閩頌滙編

閩頌滙編

康熙二十二年正月

日

嚴絕接濟

題爲第一本爲嚴絕三省接濟以制賊命事竊
照臺灣乃海中孤島一歲之所入不足供一
歲僞官兵之俸餉所恃者奸民愍不畏死貪
利接濟以苟存耳江南山東其爲路迂曲透
越甚難惟近而閩省次則粵浙海面相聯易
於接濟除廣東十字門奸民走險私販臣已
經具疏請飭廣東督提諸臣設兵防勦奉

旨遵行在案矣南澳爲粵閩兩省接壤要區亦現
在奉

上旨議設總兵官鎮守矣惟烽火門爲浙閩兩省海面咽喉今止設遊擊一員兵一千名兵力甚爲單薄今應添兵一千名改爲叅將方足以資勦禦但今當缺餉之時焉可議增官兵查閩安鎮已設陸營叅將一員兵一千名又設水師副將一員兵三千名似爲過多前年雖撥出兵一千名前往烽火門鎮守但烽火門兵止一千名實屬單弱而閩安鎮又無須水陸三千名今應於閩安鎮再撥出官兵一千名前赴烽火門而閩安叅將一員兼管水陸

其水師副將應裁去則可免增餉之費而要
地已得實兵之用三省設兵旣已周密則接
濟自難飛渡矣臣謹會同巡撫臣董

陸

路提督臣萬

水師提督臣施

合詞

具疏密

題伏乞

睿鑒勅部議覆施行

閩頌滙編

康熙二十二年正月

E

擾賊機宜

題爲第二本爲選將挑船安頓上風擾賊洋販
耕種事竊照三省旣嚴接濟則內地之布帛
菽粟必無下海矣但賊尚有洋船九隻每年
出往外國販洋所得利息以爲僞官兵糧餉
之用又臺灣有草地甚多兵民屯種俱在此
處所以賊不缺糧去年賊知臣等奉

旨進勦將洋船改爲砲船安架大砲以拒我師今
聞賊因缺餉復欲將砲船改回洋船出外販
洋矣又去年賊聞臣等進兵將草地種田之

人挑出六千名教打鹿鎗派守澎湖以拒我
師今聞賊因缺糧復欲將鹿鎗手調赴草地
乘時耕種矣臣以爲賊之泮販耕種斷難聽
其任意也臣請于沿海水師各鎮內選其善
識水性勇往敢戰者卽于現在戰船內挑出
牢固輕便趕繒六十號不論南風北風時時
頃攄上風如係北風時候則將此船灣泊平
海如係東風時候則將此船灣泊將軍澳林
景嶼伺耕種之時出其不意一連數次乘間
順風宜鼓奮擊俾其驚疑莫定應接不暇如

賊用趕繒來戰我兵所坐之趕繒足以勝之
如賊用鳥船來戰然鳥船必用順風我兵所
坐趕繒可以順逆如意不致受賊之虧如此
則船隻不能改造而洋販無資耕獲不能及
時而糗糧不給一二年間自然困疲而我師
因利乘便勦撫皆宜矣臣謹會同巡撫臣董
陸路提督臣萬 水師提督臣施
合詞密疏具

題伏候

睿裁勅議施行

閩頌滙編

閩頌滙編

康熙二十二年正月

十三

日

談間機宜

題爲第三本爲談間用謀離其腹心事臣聞用
兵之道其一曰間然用間于深根固蒂之時
難而用間於我虞爾詐之日易查鄭經寘誅
長子溢死幼子承襲僞侍衛馮錫範恃戚怙
勢劉國軒擁兵跋扈上下離心間諜易入若
令接濟旣絕洋販耕穫計窮之時更易就中
用事似未可專恃兵威而忽此一着也除臣
已經屢次密遣談間外今水師提臣奉

命專征臣已經咨明提臣務須協力發問偵探用

濟勦撫至于續順公沈瑞僞賓客司傅爲霖
共糾聯十一鎮于康熙二十年十月內俱已
糾合停當已經領臣所頒綾劄重賞協謀內
應以待我師因師未進爲同謀僞鎮未友出
首賊將續順公沈瑞並傳爲霖俱全家被害
事雖未成而其一
片歸正死忠之心甚可軫
念伏乞

皇上或于常格之外量加優恤俾聞風者爭先慕
化此亦間謀招徠之一策也臣謹會同巡撫
臣董 陸路提督臣萬 水師提督臣

施密疏具

題伏乞

睿鑒勅議施行

康熙二十二年正月

十三

日

閩頌滙編

請裁無益鎮營

題爲第四本爲請裁無益之鎮營以資要地之實濟不致糜費錢糧事按查三省接濟之路惟南澳之汛最要現在奉

旨議設總兵臣現在會同廣東督提諸臣另疏會題外但增兵卽須增餉勢必須將可省之官兵裁去增兵南澳方不糜費查康熙十七年間臣因海澄金廈皆爲賊踞而漳州密邇巨寇題將海澄鎮改爲漳州鎮今幸伏

天威諸路蕩平則漳州已爲懷地況現有漳浦一

鎮可以兼制漳州且漳州現有城守副將分
防此一鎮總兵可以裁去今會議將漳州鎮
官兵三千名內撥出五百名增入漳浦鎮足
資防禦其二千五百名可以增入南灣又至
銅山已有一鎮不須再設銅山城守一營應
將銅山城守一千名官兵亦添入南灣又海
壇已有一鎮則密邇之平海水營一營官兵
一千名不必再設亦應併入南灣餘使粵省
督提再爲議補共雄師六千名鎮守此地則
南灣始成屹然巨鎮不特接濟之奸民無從

而出而閩廣兩省之海患亦無由而入矣況
移此就彼官兵俸餉不必更煩部撥者地
謹會同巡撫臣董陸路提督臣萬
水師提督臣施密疏具

題伏乞

睿鑒勅議施行

閩頌滙編

康熙二十二年正月

十三

日

請定儀注

題爲第八本爲請定固山大防禦章京各官與督撫相見儀注以肅觀瞻以安民命事臣查外省督撫原與駐防大小各官從無統屬故上自固山大以至防禦章京各官皆可走督撫之中門坐督撫之大堂南面而議事講話無所拘也况臣從事行間日多與滿漢各官情意最爲親熱今臣蒙

皇上特拔叨任總督臣焉肯忘櫛風沐雨同甘共苦之情而一旦妄自尊大也但漢軍駐防久

住之官兵似與出師暫住滿洲之大兵不同
且督撫亦係一省官兵之主如固山大防禦
蘓喇章京等官皆可騎馬直進中門而坐大
堂則萬民觀瞻似以章京等官同于督撫則
督撫亦何能束兵守法爲民作主耶卽各章
京亦何所顧忌而不睥睨恣肆乎近如浙江
鎮江駐防各官多不守法屢屢見告矣則相
見儀注似須請

旨較正頒發奉行臣等是由束兵安民起見非止
爲儀文度數之微近閱邸報駐防各官亦有

盜案處分矣臣查文武相見儀注止有文武
各官見守省將軍總管俱照見總督禮行尙
未有駐防各官見督撫儀注伏祈

勅發部議除滿洲出師大兵不議外其駐防漢軍
固山大見督撫應否照布按兩司禮防禦章
京各官見督撫應否照各道臣禮議定頒奉
施行俾往來知所遵守庶不致有兵強民弱
之慮矣臣謹會同巡撫臣董 陸路提督
臣萬 水師提督臣施 合詞密疏具

題伏乞

閩頌滙編

睿鑒勅議施行

康熙二十二年正月

十三

日

誦鼓用命

題爲閩海現在航勦仰額

皇恩寬宥責成以鼓用命事切照閩省自十三年
變起倉卒各將士兵少權輕多被迫脅迫

王師入境額首輸誠已蒙

天恩矜憫仍各授職內多隨征効命奮勇殺賊恢
復泉漳及十九寨海澄金廈等處身經百戰
歷著功績

題叙在案康熙二十年十二月十八日吏部奉
上諭明歲以後文武各官舉行大計軍政凡從逆

歸順後補任官員俟督撫提鎮開造計冊到
日吏兵二部察明罷黜着議政王貝勒大臣
會議具奏欽此近閱邸抄將閩省從逆救誠
各官開列閒散此實法紀攸關臣節所繫豈
可苟簡異求

恩寬法外第海逆盤踞多年流毒數省今提臣施
統師候風不時進剿所有投誠各弁現在
配船出海及汛守要島日夜提防隨臣沿邊
不時接應者尙思格外鼓舞策其用命一旦
功名無望罷黜已在目前惟恐恢心喪氣不

能戮力同心有關勦海滅賊大舉臣是以再
三思維不敢緘默除投誠各官目投誠後雖
俱戮力行間而陷陣先登功勞昭著者如張
仲賢等一百二十六員臣不敢妄請

殊恩應遵部議罷黜以勵臣節外但各官自投誠
後歷著戰功忘身報

國屢經塘報現蒙

聖恩功加都督世襲等官如謝思禮等共八十四
員雖前罪難寬而後効已著是不得不籲請
皇恩特加寬宥格外施仁准其立功勦賊以贖從

前逼脅從逆之罪則人人莫不倍加踴躍上
報

國恩下保功名者矣除將歷年効力行間功績
最著者今又現在征勦揆誠各官備造履歷
清冊送部外臣謹會同護理巡撫印務按察
使臣趙進美合疏密

題伏乞

勅部議覆施行

康熙二十二年四月二十四

日

閩頌滙編